

ASO LUA, 17 IUNI 2014

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2014.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA O MALIU

1. *Na faasilasila e le Fofoga Fetalai le tuumalo o le Tofa **TAUA Falaimo**, o le sa avea ma sui usufono mo le Itumalo Faaalaalafaga o Palauli Sisifo i le Palemene Lona XIV.*

*Na filifilia mai le Tofa **TAUA Falaimo** i le Paeaiga o le 2006-2011. I lea lava Paeaiga sa avea ai o Ia ma sui usufono o le Komiti o le Soifua Maloloina, Galuega Tau le Va Fealoai, Mataupu Tau Lotoifale ma Atinae o Afioga ma Agafesootai faapea le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa.*

2. *Na faapea foi ona faasilasila e le Fofoga Fetalai le tuumalo o le Afioga **TAULAPAPA LEAUPEPE Faimaala**, o le sa avea ma sui usufono mo le Itumalo Faaalaalafaga o Palauli Sisifo ma le Itumalo Faaalaalafaga o Aana Alofi Nu.1.*

*Na uluai filifilia le Afioga **TAULAPAPA Faimaala** e avea ma sui usufono o le Itumalo Faaalaalafaga o Palauli Sisifo i le Paeaiga o le 1970-1972. I le Paeaiga lea sa avea ai o ia ma Sui Fofoga Fetalai o le Maota.*

*Na toe fillfilia mai le Afioga **LEAUPEPE Faimaala** e avea ma sui usufono o le Itumalo Faaalaalafaga o Aana Alofi Nu.1 i le Paeaiga o le 1973-1975 i lona suafa Leupepe.*

O ia o le faipule tamaitai muamua o le Palemene.

Na tutulai filemu le Maota mo le minute e tasi e faaali ai le faaaloalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te manatu o lea ua tini pao le uto e pei o le faiva i vai. Ua le tunoa foi le falala o le niutea i le matagi i lenei taeao fou i le alafai mai ma le faafoisia o faguga lelei i lo tatou Maota i lenei aso.

Ou te ofo alofa atu ma ou faatalofa atu i le tulaga aloaia i le paia maualuga o lo tatou Maota i ona tulaga faalupelupe, o paia lava ia e faasino i le mamalu ma le paia o Samoa ua ee, i le afio mai ma le tala mai o aao i lenei taeao fou. O le aso na atofa, o le aso foi na faalagi e toe usuia ai le Fonousu a Samoa i le Maota i Tiafau.

O le agaga faaaloalo ou te faatalofa atu ai i tulaga aloaia; afio maia, maliu mai, talaaao mai ma susu mai. E manatu ma o le talitonuga o lea ua tatou toe potopoto i le Malae o le Faautugatagi a Samoa aua le toe amataina o a tatou galuega. E tumau ai pea le viiga ma le faafetai i le Atua ona o Lana pule faasoasoa i aso uma o lo tatou soifua. E ui ina soua muliavā, ae tatou te tutu pea i le too ma tepa i le ata i le alofa le mavae ma le alofa silisili ese o lo tatou Tapaau Sili i le lagi, ona o lo o tapuaaina pea lo outou soifua manuia le paia e ma le mamalu maualuga o le tatou Palemene.

Ua tatou faamavae foi i nisi o sui mamalu o lo tatou Maota o e sa tautua i totonu o lenei Palemene, sa asaasa le gasu o le taeao ma le vao filifili aua Upufai o Malo, ua tatou faamavae atu i nisi o i latou sa latou faia tulaga o le tautuaina o le Palemene i futia ua sola ma aso ua alu, tatou faafetaia le Atua ona o lo latou soifua auauna.

O lea foi e loma le lafo a Lualemana i le tuua foi o le Malo e se tasi o tama matua o lenei Paeaiga, tatou nonomanu i le Atua ma Lona finagalo. O se taimi, o se aso ona faatino foi lea i ona tulaga aloaia i le tatou Palemene. O lo o loma le taimi o saafiafiga ma tulaga i toe sauniga, e tatalo i le Atua ia taitaina lo outou soifua manuia i lea aso, ona tatou potopoto foi lea e faali lo tatou agaga faaaloalo i lea foi Tootouli o Samoa ua tatou le faatasi ona o le valaau paia a le Atua i lenei taeao.

O faamaisega e tumau pea i aiga alii, tama ma tina, alo ma fanau aemaise o itumalo, a o le agaga e faafetai i le Atua ona o lo o faaauuina pea a tatou galuega.

E ofo alofa atu foi i lau Afioga i le Taitai o le Malo ma le Kapeneta mamalu aemaise foi le Taitai o le Itu Agai ma sui usufono mamalu uma o le Maota Fono o Samoa, e manatu o se tasi lenei o a tatou Fono taua ona o le lauiliuina o le Tala Faatatau o Tupe aua le faatinoina o le galueaiina o le tamaoaiga o Samoa i ona vaega eseese.

E faafetai Samoa i lau tapuaiga; i lenei taeao matou te ofo alofa atu ma o matou afe atu. O lo o outou po pea le fala ma outou tui mai le mulipapaga e ala i le tatalo e le aunoa. O aso uma ma le faatauanau, e lagona le mafanafana ona o le pai mai o la outou tapuaiga lelea i aso uma ma tatalo ina ia manuia le alofaiva o lau Palemene.

E faafetai atu foi i le paia ma le mamalu i tupu ma ee, tamalii ma failauga, faletua ma tausii, saoa ma tamaitai aemaise o Faauluuluga o Matagaluega a le Malo ma Faalapotopotoga ua tatou faatasi i lenei aso, ia alo maia ia sagai ane ai o le tai aua le faataunuina o a tatou galuega e pei ona i ai le polokalame ua uma ona faataatia mo le Fonotaga.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. S.R.2014/2, Tulafono Faa-Poloaiga o le Faatulagaina o Tofi Faaminisita ma Matagaluega 2014.
2. S.R.2014/3, Poloaiga Aoa o Tau o Oloa (Nu.2) 2014.
3. S.R.2014/4, Tulafono o Falepuipui ma le Toefuataiga 2013 – Faasilasilaga o le Amata Faamamaluina.
4. P.P.2014/2015 Nu.30, Tali atu a le Malo i le P.P.2013/2014 Nu.91, Lipoti a le Komiti o Galuega, Felauaiga ma Siosiomaga i le P.P.2013/2014 Nu.6, Lipoti Faaletausaga a le Pulega o Malae Vaalele a Samoa mo le Tausaga Faaletupe Faaiuina aso 30 Iuni 2011.
5. P.P.2014/2015 Nu.31, Tali atu a le Malo i le P.P.2013/2014 Nu.85, Lipoti a le Komiti o Tupe Maua ma Tupe Totogi i le P.P.2012/2013 Nu.51 & P.P.2013/2014 Nu.14, Faamatalaga o Tupe a le Komiti o Petipetiga mo le Tausaga Faaletupe Faaiuina aso 30 Iuni 2011 ma le Tausaga Faaletupe Faaiuina aso 30 Iuni 2012.
6. P.P.2014/2015 Nu.32, Tali atu a le Malo i le P.P.2013/2014 Nu.58, Lipoti a le Komiti o Galuega, Felauaiga ma le Siosiomaga i le P.P. 2011/2012 Nu.65 & P.P.2011/2012 Nu.90, Lipoti Faaletausaga a le Pulega o Malae Vaalele a Samoa mo le Tausaga Faaletupe Faaiuina aso 30 Iuni 2009 ma le Tausaga Faaletupe Faaiuina aso 30 Iuni 2010.
7. P.P.2014/2015 Nu.33, Lipoti Faaletausaga a le Pulega o Faailoga ma Tusi Pasi Taualoa a Samoa mo Iulai 2008-Iuni 2009.
8. P.P.2014/2015 Nu.34, Lipoti Faaletausaga a le Pulega o Faailoga ma Tusi Pasi Taualoa a Samoa mo Iulai 2009-Iuni 2010.
9. P.P.2014/2015 Nu.35, Lipoti Faaletausaga a le Pulega o Faailoga ma Tusi Pasi Taualoa a Samoa mo Iulai 2010-Iuni 2011.
10. P.P.2014/2015 Nu.36, Lipoti Faaletausaga a le Pulega o Faailoga ma Tusi Pasi Taualoa a Samoa mo Iulai 2011-Iuni 2012.
11. P.P.2014/2015 Nu.37, Lipoti Faaletausaga a le Pulega o Faailoga ma Tusi Pasi Taualoa a Samoa mo Iulai 2012-Iuni 2013.
12. P.P.2014/2015 Nu.38, Lipoti a le Komisi o le Toefuataiga o Tulafono a Samoa i le Tulafono Faatonutonu a le Afaasalalau, Lipoti 10/12.
13. P.P.2014/2015 Nu.39, Lipoti Faaletausaga a le Matagaluega o Punaoa Faanatura ma Siosiomaga mo le Tausaga 2009-2010.
14. P.P.2014/2015 Nu.40, Lipoti Faaletausaga a le Faalapotopotoga o Mea Tau Fale mo le Tausaga Faaletupe 2011.
15. P.P.2014/2015 Nu.41, Lipoti Faaletausaga a le Faalapotopotoga o Mea Tau Fale mo le Tausaga Faaletupe 2013.
16. P.P.2014/2015 Nu.42, Tali atu a le Malo i le P.P.2013/2014 Nu.107, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P.2012/2013 Nu.76, Lipoti Faaletausaga a le Faalapotopotoga o le Esetete Tausi a Samoa mo le Tausaga 2011.
17. P.P.2014/2015 Nu.43, Tali atu a le Malo i le P.P.2012/2013 Nu.96, Lipoti a le Komiti o le Soifua Maloloina, Galuega Tau le Va Fealoai ma Atinae o Afioaga ma Agafesootai i le P.P.2011/2012 Nu.64,

- Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe Faaiuina aso 30 Iuni 2011.
18. P.P.2014/2015 Nu.44, Tali atu a le Malo i le P.P.2012/2013 Nu.90, Lipoti a le Komiti o le Soifua Maloloina, Galuega Tau le Va Fealoai ma Atinae o Afioaga ma Agafesootai i le P.P.2011/2012 Nu.33, Faamatalaga o Sini Autu a le Faaputugatupe mo le Lumanai Manuia o Tagata mo le Vaitaimi 2012-2014.
 19. P.P.2014/2015 Nu.45, Tali atu a le Malo i le P.P.2012/2013 Nu.94, Lipoti a le Komiti o le Soifua Maloloina, Galuega Tau le Va Fealoai ma Atinae o Afioaga ma Agafesootai i le P.P.2011/2012 Nu.59 ma le P.P.2011/2012 Nu.66, Faafoega ma Faamatalaga Tau Tupe mo Faamanuiaga a Tagata Matutua a Samoa mo le Tausaga Faaletupe 2010/2011 ma le tausaga 2011/2012.
 20. P.P.2014/2015 Nu.46, Tali atu a le Malo i le P.P.2013/2014 Nu.38, Lipoti a le Komiti o Ofisa o le Palemene i le P.P.2010/2011 Nu.13, Faamatalaga o Tupe o le Penisione mo le Palemene mo le Tausaga Faaletupe Faaiuina aso 30 Iuni 2010.

TUUNA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T.51.

1. P.P. 2014/2015 Nu. 47, Lipoti a le Komiti o Tupe Maua ma Tupe Totogi i le Tala Faatatau o Tupe Faaopopo Lona Lua o Tupe Maua ma Tupe Totogi a le Malo o Samoa mo le Tausaga Faaiuina aso 30 Iuni 2014.
2. P.P. 2014/2015 Nu. 48, Lipoti a le Komiti o Tupe maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaiuina aso 30 Iuni 2015.

FOFOGA FETALAI: Ua i ai le faamoemoe o le a tauaveina faatasi felafolafoaiga o le faitauga faalua o le Tulafono Tau Faaofi o le Faatatauina o Tupe Faaopopo (Nu. 2) 2013/2014 ma le Tulafono Tau Faaofi o le Faatatauina o Tupe 2014/2015. Ma ou te valaauina Tulafono Tau Faaofi e pei ona faatulagaina i Pepa o Galuega.

TULAFONO TAU FAAOFI O LE FAATATAUINA O TUPE FAAOPOPO (NU. 2) 2013/2014 MA LE TULAFONO TAU FAAOFI O LE FAATATAUINA O TUPE 2014/2015 – felafolafoaiga i luga o le faitauga faalua

FOFOGA FETALAI: E tusa ai ma le Tulafono Tumau 132, o le a faaauau felafolafoaiga o Tulafono Tau Faaofi nei e lua e pei ona valaauina, ma e tataua ona faamanatu atu i sui usufono e te saunoa sao lava i tulaga tau tupe ma le tamaoaiga e faapei o faiga faavae tau tupe a le tatou Malo.

Ia ou te manatu o lea ua tatou taunuu tonu i le soalaupuleina o le tatou Tala o le Tupe e pei o tatou tu ma aga masani a le tatou Maota, ia e talitonu e le o

se Tala o le Tupe muamua foi lenei i lenei Paeaiga, ua outou silafia ma nofo ilo le vaa a le tamaloa e ala i taimi faapenei, e avatu ai le avanoa i sui usufono, tou te tutulai mai e tou te tulei saunoa e ala i le Tala o le Tupe. E faapai foi i itumalo ia ma tulaga i le tapuaiga i le taputapu mai i lo outou alofaiva aua le faamoemoe o le soalaupuleina o upufai o Malo i totonu o le tatou Maota, ia sagai maia ai o le tai o lea ua tatou oo tonu i tulaga e masani ai ona lafo atu le avanoa i saunoaga faalauaitele a sui usufono e ala i le tatou Tala o le Tupe ua uma ona faataatia.

Ua avanoa le Maota mo se sui usufono e fia saunoa. Ia o lea o le a tamua le sui usufono mai Salafai, tulai maia lau Afioga i le sui usufono mo Faasaleleaga Nu. 2, e fai ia oe ma sui i le tatou nofo a Pule aemaise o le tapuaiga a Aiga. Tulai mai le sui usufono mo Faasaleleaga Nu. 2.

Susuga PAPALII LIO FAAVAIvaiomanu TAEU MASIPAU (Faasaleleaga Nu. 2): Faafetai i lau Afioga i le Fofoga Fetalai mo le avanoa. E muamua ona faatulou atu i le paia o le Maota, le afio o lau Afioga i le Fofoga Fetalai, afio foi lau Afioga i le Palemia ma le Kapeneta, afio foi le Afioga i le Taitai o le Itu Agai ma sui usufono mamalu uma o le Palemene.

E faatulou atu foi i le faafofogaaga tapuai a Lana Afioga Mamalu, O Le Ao o le Malo ma lana Masiofo, le Sui Usufono o le Fono a Sui Tofia faapea foi le Masiofo, le Faamasino Sili ma le vasega o Faamasinoga. Ae a le faafofoga tapuai a le paia o le atunuu i ona tupu ma ee, Aiga o Tupu ma Aiga o Papa. O Aiga ma a latou Tama, o Tama ma o latou Aiga, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti. Ae a le tapuaiga o Faauluuluga o Ekalesia ma so o se fata faitaulaga i so o se tafa o le atunuu, o e o lo o faanonomanu aua se manuia o le atunuu mo a taeao, malo tapuai.

E faatalofa atu foi lou itumalo pele o Faasaleleaga Nu. 2, le afio o Leilua ma Aiga, Sa Alaalatoa ma Alo o Malietoa, Tuilagi ma Namulauulu faapea foi le Maoputufuga le aai i malae lau fetalaiga Fauolo ma le mamalu ia te oe Safotulafai. Le susu i le Nofo ma Tooa, Aiga Sa Malietoa ma le alaalfaga o Usoalii Mago ma Luasiufanua. Ae a le tapuaiga i so o se Ekalesia i so o se fata faitaulaga i totonu o le tatou itumalo o lo o outou tatalo aua se manuia e le gata o le itumalo a o le tatou atunuu, malo tapuai. Ae a le mafutaga a tina faapea foi saoa ma tamaitai, aemaise foi le malosi o lo tatou itumalo, malo le soifua, malo le lagi e mama. E ui lava ina ua tatou faamavae atu foi i nisi o tina ma tama matutua o le tatou itumalo i lena vaiaso ua tuana'i atu ma le vaiaso atu i tua, le tina matua ia Vii Tauiliili Reupena, faapea foi le tina ia Lote Mauafu Gaunamalevaa, faapea foi le fetalaiga ia Alo Kerupi ia ma lau fetalaiga Safoini, ia o le soifuaga lava ua tatou i ai ua uma lava ona tuumatamaga e le Atua lo outou soifua ma lo tatou ola, a o le tatou tatalo, ia faamaise pea le Agaga o le Atua, ma tatou tatalo ia maua so latou nofoaga mau i le lagi.

E afaatasi foi lenei sui usufono i se faamaisega i le tina aemaise foi o le itumalo ma le aiga o le tama matua ia Tuiloa pei ona saunoa i ai lau Afioga i le Fofoga Fetalai. Ia e lagona lava le vaivai o le mafaufau ona o le tatou mafutaga faauso militino i totonu o le Palemene, ae pei lava ona e saunoa, e leai lava so tatou loto e fai, e fai toatasi pea le pule faasoifua a lo tatou Tama o i le lagi, tatou tatalo ia aualiitia mea uma o toega o lona aso fiafia, ma ia maua pea sona nofoaga i le ola e faavavau.

Lau Afioga i le Fofoga Fetalai, o nai talosaga lava a lou itumalo pei lava ona tuuina atu, lau Afioga i le Minisita mo Punaoa Faalenatura ma le Siosiomaga, ia o lena foi ua toe avatu le tusi a lenei itumalo, e tatalo ma tuitui atu lava e pei lava ona saunoa foi le Afioga i le Palemia, toaga lava e tuitui atu, ia o lo o tuitui atu pea lenei itumalo aua foi nai taligalu a lou itumalo o Faasaleleaga mai Fatausi sei oo mai i i i Sapapalii.

Lau Afioga i le Minisita mo Galuega, Felauaiga ma Atinae Eseese, o lena foi ua toe avatu le talosaga a lenei itumalo, e leai ou te talitonu lava e le faigofie le faaso, a o le tiute lava lea o sui usufono o le tatalo pea ma tuitui ma faatauanau, a o le faaso o lo o i ina le tofa i lau Afioga aua foi le faaso mo a tatou galuega. E i ai se faaopoopoga lena isi ou nuu o Tapueleele isi pitonuu lena e i lalo o Laloaega, e tele taavale a nai tama ma nai tina matutua, e timu loa, e le toe mafai ona toe feoai, ia e alofa i ai pe a omai i le falemai i Tuasivi po o Salelologa foi i a latou...ia ma malaga mai foi i Tumua nei, aemaise foi ia o nisi o mea o lo o manatu ai lea vaega o lou itumalo o Tapueleele faapea foi sina auala laupapa, e vaiti lava le alia lena e i ai. Aua ou te talitonu ua ese foi lenei vaitaimi i le tele o tafega ua seasea ina punitia ai le feoaiga a sia foi vaega o lou itumalo, aemaise foi e aoga tele foi i le aoga i Vaiola ma le tatou falepuipui i Vaiaata. Ou te talitonu lava e aoga tele se tatou auala i ina mo ia foi vaega o le atunuu o lou itumalo.

O lau tatalo lea i lau Afioga, lou itumalo o lea lava e fai le tiute a lo outou sui usufono, e le mafai lava ona tuua o lea lava e tuitui lava.....

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia ma le Minisita o Tupe): Lau Afioga i le Fofoga Fetalai.....

FOFOGA FETALAI: Ia malie le sui usufono o lo o saunoa, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E fesili tonu atu lava po o a auala laupapa ia, o au o i ina ou te feosofai solo ai pe a ou alu i Savaii ou te alu e matau auala sima la e i ai, o la e lelei auala sima. O gafea tonu o auala ia e agai mai i ai lau saunoaga?

FOFOGA FETALAI: Tulai mai le sui usufono mamalu.

Susuga PAPALII LIO FAAVAIVAIOMANU TAEU MASIPAU: E lua lava vaega na e tatalo atu ai lenei tofi, o le auala lea agai i uta i Vaiaata, ia po o i i le auala lea agai i Tapueleele, ioe, o nai auala na e pei lava ona ou fai atu, o aso nei ua tai sosoo lava timuga, ia a oo nei ina timu e fai lava sina umi o poloka ia femalagaaiga, o le uiga lena o le talosaga e faailoa atu i le Afioga i le Minisita. Ma le faaaloalo.

FOFOGA FETALAI: Tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Faafetai. E tau leai ni tagata i ina i Vaiaata, ia se i vagana le aufaifaatoaga la e i ai, ia se i vaai e leai lava se afaina o nei mea o timuga, o lea tatou te iloa, afai e oso se timuga tele e le atoa le itula ua toe maui i lalo, e

faapena aga mo mea o tafega o mea o vai-pe o alia pe, e oso mai ona toe mau i lea i lalo, a o lea lava ou te alu atu ma ou alu ai lava i uta i le mea tonu lea e i ai le lapisi, o la e leai lava se afaina o auala sima na e i ai, ae taatia mai lou finagalo.

FOFOGA FETALAI: Malo faafetai. Ia tulai mai le sui usufono mamalu e faaauau le saunoaga.

Susuga PAPALII LIO FAAVAIVAIOMANU TAEU MASIPAU: Malo faafetai. O lea ua saunoa mai lau Afioga e taatia atu.

Ona ou oo mai ai lea i le tala o le tatou tamaoaiga, ia malo lava faafetai, faafetai lava i lau Afioga i le Palemia ma le Minisita foi o Tupe e faapea foi le Matagaluega mo le tapenaina foi o lenei Tala o le Tupe. Ou te vaavaai atu foi ia e le faigofie foi lenei galuega, ae malo lava, ae o le tiute lava lea o so o se sui usufono e avatu pea ia fautuaga aua le tamaoaiga o le atunuu ma le agai i luma.

Lau Afioga i le Fofoga Fetalai, i lau faitau i le tusi lea o faamatalaga o fuafuaga mo tupe a le Malo, e ese le manaia o le tusi lea i lau faitau, ia aua o lea e faataga mai i le vaega 19 o le Tulafono lea o le Pulega o Tupe a le Malo. I lau faitau i ai, e pei o i ina lea e manino ai le atoatoa o le mea e agai i ai lo tatou tamaoaiga ma lo tatou atunuu. O lo o i ai le faamamafa le sini autu mo le tamaoaiga ma tupe a le Malo. E tolu la vaaiga taulai ia ua ou maitauina, e ao foi la ona avatu i ai se lagona, muamua, o le uunaia o avanoa faigaluega e faatupulaia ai tupe a le Malo. Lona lua, o le faatinoina o faiga faavae o le toe uunaia o faatoaga. O lona tolu, o le uunaia o faiga faavae mo tagata tafafao maimoa mai. I lau la tilotilo i ai ma lau maitau i le agai o le tatou tamaoaiga ma Tala o Tupe a lo tatou Malo. I le uunaia o avanoa faigaluega lau Afioga i le Fofoga Fetalai, ou te matua ioe lava i le tulaga lea, aua o le tasi lea vaega taua e le gata o le tamaoaiga o le afaigaluega ma aiga ma nuu, ae fesoasoani foi i lo tatou Malo i ona tupe maua. O lau vaavaai i ai i le Tala o le Tupe se i uma nei, e \$61miliona le sao o tagata faigaluega mo le tamaoaiga o le atunuu. Ia atonu o se sao taua tele lea mo tupe maua a lo tatou atunuu ma lo tatou tamaoaiga. A o le agaga lava ia, o le a la se faiga ua fuafua e le tatou Malo mo nei avanoa faigaluega? O lea ua maua ua i ai le faamoemoe foi e faaopoopo nisi tatou tagata faigaluega o lea ua maua fale'ia e pei ona taua, o lea o le a sauni i ai pei ona maua foi i tala faasalalau, ia e manaia, atonu o se avanoa taua foi lea e faaopoopo ai tatou tagata faigaluega, o lea e maitau atu pe maua le afe o tagata faigaluega faaopoopo. Ae pau lava le tatalo a lenei sui usufono mai Savaii, ae a pe a avatu ia lenei fale'ia lea e taua isi o matou motu i Savaii, ua lava ia le Yazaki iinei i Apia ae avatu ia lenei fale'ia mo Savaii, afai ua mamao Asau, e manaia lava le tafa foi lea i Salelologa i le vaega lea e i le tuaoi o Salelologa ma Tafua, o le manaia ia o lona togavao manaia, ioe, e omai vaa e tietie mai i Savaii ma tilotilo atu i ai. Ou te talitonu, o le agaga lona, o matou nei mai Savaii, aumai lea avanoa mo sia foi fale gaosi pe a faapea o le a faatino mo lo matou motu i Savaii, e maua ai nai nei tagata faigaluega e fesoasoani isi o matou motu i Savaii ia ma le tamaoaiga foi o le tatou atunuu. O le mea lea, ia faafetai mo ia avanoa.

O tulaga o tatou faatoaga, ou te talitonu lava e le fou foi lea mea i totonu o le Maota, aua ou te talitonu lava o le faatoaga lava lea sa fai ma ivitu o le tatou tamaoaiga i aso ua sola, a o lenei vaitaimi, ia pei e le o atoatoa foi le

tulai mai o tatou faatoaga, ae faafetai i lau Afioga i le Minisita faapea foi le Pulega lau Afioga i le Ofisa Sili o Pulega ma le Pulega, e tele foi le aoga o tatou faatoaga lea ua maitau atu i ai, ae pau lava le matou tatalo, o tatou maketi, o talo ia ua matua lava lava talo, o le talo lele e ola i lalo o niu e ola i le soata, vaeatu le paia o le Maota, e pau lava le mea o le maketi, o le maketi lava lea e tatalo atu ai. Lau Afioga i le Minisita, aua a tatou tilotilo foi i ai, o le tasi lea autu o le taiala mo le atinae o Samoa lena e i ai, o le faatupulaia lea o fua o faaeleeleaga mo se atinae manuia, o lona uiga o a tatou faatoaga. E pei o le agaga lena o lea e avatu, ina ia silasila pea. O lea foi ua saunoa lau Afioga i Ausetalia o le a maua ai le tatou fesoasoani mo le talo e i ai chips.

O le isi foi saunoaga manaia o le saunoaga a le tama matua ia Tuiloma, o se tatou fale foi lea PMD pei ona tatou i ai i aso ia. Ou te talitonu afai se tatou fale mautu faapena e agai mai i ai le aufaifaatoaga, ou te talitonu ua matua tele le sao mo a tatou faatoaga.

E pei o le agaga lena o lenei sui usufono, e lagolagoina mea tau faatoaga. Ae o le fesili; po ua lava ea se tupe ua ave e fai ai nei mea uma? O le agaga lena aua o lau maitau atu i le tausaga faaletupe talu ai, sa \$19miliona a o lea ua maitau atu pei ua pau i le \$13miliona. O le agaga lava ia ma le talosaga pei ona avatu, e pei e le mama i lou nei sui usufono le taua o tatou faatoaga aua le manuia, aua pei ona ou fai atu, masalo po o le 80% o le atunuu lea e faalagolago i mea tau faatoaga. Ou te talitonu e tele lava se fesoasoani mo i latou, o se sao foi lea mo i latou aua le tamaoiga, e le gata o aiga, o nuu, aemaise foi o le tatou atunuu.

Ona ou oo mai lea i tagata asiiasi maimoa mai fafo, ou te talitonu tasi lea vaega e ese le taua. I lau lava vaavaai, e leai se atunuu e sili atu ona tele ona mataaga pei o tatou. E tele tala faa-anamua, tele tulaga o mataaga matagofie, ae pau lava le mea, matuai ave tatou tupe e fai ai tatou mataaga ia lelei, aua ou te talitonu e tele talaaga eseese i totonu o le tatou atunuu lea e i ai. E pei ona outou silafia le atunuu o Saina i ana mataaga, lea na matou o i ai ma le Afioga i le Fofoga Fetalai ma le matou aumalaga, na o le Forbidden City ma le Great Wall, ae na o Saina lava tagata tafafao e o i ai, ae faitau miliona i le aso. Ae faamatala lava e latou ia latou mea sa tutupu, e malamalama ai lava latou ia, a o tatou, na o le io lava ma lue le ulu, ae le o malamalama ia tatou mea la e faamatala mai. Ae a fai ni a tatou mataaga faapea i totonu o le atunuu ma faaalua ai a tatou seleni, ou te talitonu e tele lava se fesoasoani mo le tatou atunuu. Sa talanoa foi ma si au uo Saina, fai mai lana tala, “E tatau ona sau se malaga faapitoa a le tou vaalele iinei i Saina, fai se malaga a le tou vaalele i Saina e aoga e o atu ai tagata tafafao maimoa mai, e omai ai foi tagata faatau.” Aua sa faapena foi le atunuu lenei o Fiti, sa fiu e talosaga, ae ana le alu atu lava le latou vaalele i Saina e le maua mai ni a latou tagata tafafao maimoa mai ma ni tagata feoi.

E pei o le agaga foi lena o lea e avatu ai foi se talosaga faapena i mea o mataaga, aua o lea sa \$19miliona a o lea ua toe \$10miliona. Ae ou te talitonu ana ave i ai sina \$40miliona i le Pulega o Tagata Tafafao Maimoa Mai e fai ai a tatou mataaga, faatosina ai ma aoga foi i tatou nuu ma aiga nei mea. Aua ou te fai atu lava au i nei mea, o le matou nuu ma le itumalo o le matua tele lava o mataaga la e i ai. E i ai le nuu lea e taua o Falealupo, e fesootai lava ma talaaga o Falealupo la e i o, lea e talanoa soo ia Nafanua, e i ai le fesootaiga ma Sapapalii, o la e i ai le igoa lena o Falealupo. E i ai foi le ava lena e i ina e tau o Avarua, e fesootai foi ma Avarua la e i o i Cook Islands. Ioe. O mea

faapena e mafai ona fai lelei faamaumauga ma faamatala lelei ona o atu lava lea o tagata faamatala i ai e maua ai a tatou seleni ma maua ai a tatou tupe. O le agaga lena o lou sui usufono, se matua aveane a tatou tupe e matua fai ai tatou tagata tafafao maimoa mai.

Ona ou oo mai ai lea i le isi vaega lea, i le tusi lava lea, ua manaia lava le isi ulutala fou lea ua ou maua i le tusi lea. Fai mai le ulutala lea, “Fuafuaga alualumamao aua le tuuitiitia o aitalafu a le Malo.” Ua e vaai la i le manaia o le matou fautua atu ma fesoasoani atu? O lea ua amata ona faamamafa mai ma taua mai i i, aua o lea ua sau nei i le Tala o le Tupe lena, na sau foi i le Tala o le Tupe lea na tea nei, ae le i sau i ona tua atu. Ia o lona uiga, ua taua tele le matou faamanatu atu.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o faiga faavae lava ia a le Malo, ua leva. Na amata mai lava e le i taitai ona oo mai le sui usufono lena i totonu o le Palemene. E le i faia la ananafi. O le vaega lena o a tatou fuafuaga i le tauave pea o le good governance, principles of accountability and transparency. Ua leva lava la ona fai, ae avatu e malamalama lelei ai outou lena e i le Itu lena o lea tou te le o iloa ni mea, a o lea e iloa uma e le Malo. O lea la e avatu uma mea nei tou te silasila i ai.

Lau Afioga i le Fofoga Fetalai, e le fou la. Ua ala ona ou tulai atu, ona o lea e saunoa mai le sui usufono o lea e mafua ona fai mea o le tou uunai mai. E leai ua leva ona fai e te le i tulai mai i totonu o le Malo.

FOFOGA FETALAI: Malo. Tulai mai le sui usufono e faaauau mai le saunoaga.

Susuga PAPANII LIO FAAVAIIVAIOMANU TAEU MASIPAU: Lau Afioga, e le ala foi lea o lou fai atu, leaga o lea ou te uuina tusi o le tatou Tala o le Tupe ua tuanai atu. O le ala foi lea o lou sau uma lava ma tusi mai le amataga o le tatou Paeaiga, o le ala lea o lou avatua. Ae ui i lea, leaga o lea ua e saunoa mai.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao. E tataua ona amata ona e tilotilo i tusi e avatu e amata mai le tatou Paeaiga, ae te le o iloa la mea i tua atu o le Paeaiga. O le ala lena na ala ai ona ou tulai atu e faasao, e le o ni mea nei faatoa fai ananafi.

FOFOGA FETALAI: Ia, tulai mai le Taitai o le Itu Agai.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai o se mea e fia faamalamalama. Masalo o lea e manino lava i le tatou Lipoti lea i le faatuputupulaia o tatou aitalafu, o lea foi ua fai le miti, e oo atu i le 2023 i le 2024, tusa lea po o le 10 tausaga o lumanai le miti lea e

manino mai i i. A o lea lava e tuitui atu le Itu lenei, o le miti lea e aumai le 2023 i le 2024 ua pau i lalo tatou aitalafu po o le \$350+miliona. O le mea lea e taua ai le saunoaga a le sui usufono, ona o le manulauti a le Vaega lenei, ina ia silasila le atunuu i le tulaga ua i ai aitalafu a le atunuu. E pei o mea ia o lea ua ova i le piliona.

FOFOGA FETALAI: O lea ua maua le finagalo o le sui usufono, Palusalua, o lea ua ou maua lou finagalo. Se i tulai atu le Malo e faamalamalama le uiga tonu na saunoa i ai le sui usufono mamalu, a o lea o le a faamalamalama atu e le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o le mea e fia faasao. O le mea lea ou te fia tulai atu ai, sa tatau ona tulai mai le Taitai o le Itu Agai faalo mai i le Itu lenei ona o lea ua faataoto atu fuafuaga mo le 10 tausaga o lumanai e faatatau i ai. Ia manatua foi tatou te le nofononofo i se mea e tasi. O atinae nei e fai nei e tatau ona fua mai ai ni fua lelei, o le ala lena e ala ai ona faapena le kalafa lena o lo o faataatia atu. E le o se mea e faataga fai. E tatau lava ona plan ahead le tatou atunuu i le 10 tausaga o lumanai ai.

O le ala lena o lea ou te fai atu ai, e tatau ona e faalo mai, o lea e mamao le vaai a le Malo i le lumanai. O lona uiga o fuafuaga ia faataotooto ma faataatia, o manulauti e fai i ai fuafuaga mo le lumanai. E le faapea ona fai se Malo faatoa e sau lava i totonu faatoa fai fuafuaga mo le tausaga e tasi. E leai, o aso nei, ia e fuafua mamao i le lumanai.

FOFOGA FETALAI: Ia, e manatu ua manino lea vala o lau saunoaga Papalii, o lea na e saunoa i tulaga o saunoaga ia e faapea e fou, e leai o lea ua tulai atu le Malo ma faamalamalama ua leva ona faataatia. Ma o lea foi ua faataatia le tatou programme o le 10 tausaga e faataatia ai le tele o atugaluga o lo o saunoa i ai le Taitai o le Itu Agai, ae see ese mai le mataupu lea ae faaauau le saunoaga. Tulai mai le sui usufono mamalu.

Susuga PAPALII LIO FAAVAIIVAIOMANU TAEU MASIPAU: Faafetai i lau Afioga i le Fofoga Fetalai. E leai o le a ou le toe oo lava i aitalafu, a o fuafuaga. O le manaia ia o le faaupuga lea e sau i lalo ifo lava o le parakalafa lea, “O lo o faaauauina foi le faasoaina o tupe a le Malo ina ia uunaia ai pea le pulea lelei ma le faaoga tatau o vaegatupe i lona aotelega.” Ou te iloa o se luitau taua foi lea, aemaise lava o le faafogafoga mai a Ofisa Sili o Pulega ma Pule Sili o Matagaluega ma Faalapotopotoga a le tatou Malo, e tele le luitau lea ua aumai. Aua o le mea moni lava ia, o lea ua i ai tatou Tulafono, o lea ua malu a tatou Tulafono. Na pau lava le mea, a tatou mulimulitai lava i a tatou Tulafono, ou te talitonu o le a leai se afaina, o le a taunuu lava i le sini autu lea pei ona taumafai mai ai ma aumai ai le tatou faamatalaga lea mo tupe a le tatou Malo. O lau lava fautuaga i Ofisa Sili o Pulega ma Pule Sili, aua le vaivai le fautua, fautua malosi aua lava le manuia o le tatou atunuu aemaise o le tatou tamaoaiga, o lena e i o outou aao. Ae talitonu e fesoasoani atili ina ia uunai ai ma faamautu a tatou Tulafono ma usitaia a tatou Tulafono ina ia faamautu ai le agai i luma o le tatou tamaoaiga.

Ou te faafetai i lau Afioga i le Palemia mo le tofia o le sui usufono mo Satupaitea, atonu o le isi lea matatia fou i le maitau, e tele lava sona aoga,

aemaise lava le faamaopoopoina o a tatou Faalapotopotoga ma ona tupe maua. Ou te talitonu o le tasi lea laasaga taua ua tatou oo i ai ma laa i ai, aua o le tiute lava lea o le Faalapotopotoga, faasao mai au, o le aoina mai o tupe a le tatou Malo. Ioe. Ou te talitonu o lea ua tulai mai tonu lava le Afioga i le Minisita aua le polokalame lea, o lea foi e faafofoga mai a tatou Faalapotopotoga i le taua aua le agai i luma. E le gata i le tamaoaiga o le tatou atunuu, ina ia tuuaititia ai foi tatou nonogatupe. Ou te talitonu lava, o tatou ia i le tatou atunuu e leai ni a tatou minerale e pei o Fiti, Papua Niu Kini ma Solomona, ae faalagolago i le tofamamao ma le galulue faatasi, ou te talitonu o le a maua ai se manuia o le atunuu mo a taeao. Ia, o lea ua saunoa i le taunuuga o le isi 10 tausaga, ou te talitonu ua matua manaia lava lea fuafuaga mo le agai i luma.

Ona ou mai lea i le tatou... atonu e aoga foi fautuaga e avatu i le tatou Tala o le Tupe. Ou te talitonu o lea ou te talanoa i le tatou lava Paeaiga, o lea ua fa nei a tatou Tala o le Tupe i le tatou Paeaiga, pei ona tatou amata mai i le 2011-2012, 2012-2013, 2013-2014 seia oo mai i le Tala o le Tupe leni. I lau lava vaai, e leai, e talitonu lava o se faamanatu. E le i i ai lava se Lipoti a le Pule ma Suetusi Sili ua oo mai i le Palemene i le tatou Tala o le Tupe Muamua 2011/2012, e faapea foi i le 2012/2013. Taatia ia la le 2013/2014 e le i oo i le taimi, a o le tatou Tulafono e pei ona fai mai ai, 107 ma le 104, ua manino i ina, e tataui totonu o le tolu masina po o le uma o le ono masina, o le fonu e sosoo ifo ai, ua tataui ona oo mai i le Palemene. O le taimi nei, o lena ua avatu se lagona, e le i faatinoina ia tulaga. Ma ua tuufesili foi le mafaufau pea aisea le mafuaaga, po o le mea ea o le faifaiaga o Matagaluega, po o le Matagaluega o le Tupe e mafua ai, po o le Ofisa foi o le Pule ma Suetusi Sili. Aua e pei o le agaga lena o lea e avatu ai, ona o lea e vaai i a tatou Tulafono, o lo o manino a tatou Tulafono i tulaga e tataui ona oo mai Lipoti i totonu o le Palemene ua uma le ono masina muamua pe a uma le Tala o le Tupe. Ia, o le agaga lena o lea e avatu.

Ona ou oo mai lea i le tatou Matagaluega o Tupe, o lea e vaai atu e i ai mea o galuega faatino ia e i ai, e i ai le vaaia lelei o fale tetele o le Malo lea e i ai le \$5miliona, e faapena foi le vaaia lelei o le fale o Fiamē Mataafa Faumuina Mulinu II, e faapena foi le fale o Tui Atua. I lau vaai i ai, po o le \$11miliona i le \$12miliona. O lona uiga, ua tau mai ai i ina e le faigofie, o lona uiga pei o le maintenance lea ou te vaavaai atu i ai i leni foi tupe tele, ae ou te talitonu e taua foi, ae na ona ou talanoa atu i nei tulaga ae ou te iloa e le faigofie foi le maintenance o nei fale. O lea e maitau atu pei o se vaimea faapena le tulaga o i ai.

Ona ou oo mai lea i le Ofisa o le Pule ma Suetusi Sili, o lea ou te vaai i a latou galuega faatino, vaaiga taulai ma auaunaga faa-Palemene, pei lava na o le \$914,000 le tupe a si vaega lea. Ou te talitonu e le taitai ona lava, ae ana faalava se tupe ma... aua ou te talitonu o le mea lea ua tuai mai ai le Lipoti a le Pule ma Suetusi Sili o le lava o tagata faigaluega. Ou te talitonu ana ave i ai sina seleni feoloolo, ou te talitonu o le a vave foi ma fesoasoani ia latou galuega i le faatinoina o latou galuega.

Ona ou oo mai lea i le Ofisa lea o Fuainumera Faamaumauina, ia, o la e i ai faiga faavae a le Malo, so o se suesuega, o faamatalaga mo tupe maua ma tupe alu a aiga. I le Tala o le Tupe talu ai, sa ave i ai le \$1+miliona i le poloketi lea, a ua leai la se mea i le Tala o le Tupe leni. A o lou agaga, e ese le taua o ituaiga suesuega faapenei i le suesuega o le tamaoaiga o aiga taitasi,

e lelei foi lena e faailoa mai ai po o le a le tulaga o i ai lea aiga, o lea aiga ma lea aiga. Ou te talitonu foi leaga o lea e matau atu ua le o i ai se tatou tupe faaagaga mo lea vaega taua, ae sa i ai lava le manatu e faaauau pea lea poloketi ina ia fesoasoani mai pea aua le faailoa mai o le tulaga o i ai le tamaoaiga o nai aiga. Ioe, e pei o le agaga lena o lea sa i ai le manatu.

Ona ou oo mai ai lea i tupe faavae mai fafo faameaalofa e fai ai a tatou galuega. O lou lava sui usufono, o lo o tuu fesili lava pe faapefea ona fai le faasoa i ia ituaiga meaalofa i Matagaluega, aua o lea ou te faitau i Tala o Tupe, o lea Matagaluega ua maua le vaegatupe o lea foi Matagaluega ua le maua se vaegatupe. O lo o tuu fesili foi lou mafaufau, po o le a le faiga o le faasoa.

O le isi tulaga, o lea foi na ou vaai i le Lipoti lea talu ai a le Pule ma Suetusi Sili o lo o i ai le fautuaga e toe faafoi i le Matagaluega o Tupe meaalofa faapenei ona e le o lelei ona vaai e Matagaluega. E pei o le agaga lea ma ou te talitonu o se agaga taua. E lelei lava le toe faafoi i le Matagaluega o Tupe e faasoa mai ai meaalofa ina ia talafeagai uma meaalofa mo lea Matagaluega ma lea Matagaluega mo le agai i luma.

Ona oo mai ai lea i sina au fautuaga ae e leai e le fai ai, a o lau lava fautuaga i galuega ia aemaise lava auala galue ma galuega tetele a lo tatou atunuu. E talitonu lava a ou faitau atu i le tele o a tatou galuega tetele ia e faasoa mai i Tala o Tupe seia oo mai nei, ua oo i le \$120miliona nai tupe ua faasoa mai, ae a ou tilotilo i o tatou itumalo na o le 43 lau faitau i o tatou itumalo ia e i ai nei, aua o isi itumalo ia e tai toalua. O lau tilotilo, o le tele lava o o tatou auala galue e le oo i se tai miliona. A o lau lena tatalo, o le a le mea e le aumai ai le paketi a le itumalo ia i galuega faapenei ae faasoa mai e le Matagaluega o Tupe? E manaia lena aua e uma ane le Paeaiga ua tofutofusia lava nai itumalo ma nai o latou auala galue. E pei o le agaga lena, o lau lena tilotilo ma lau vaai, ae ou te le pule aua e pule lava lau Afioga i le Minisita ma lena Itu, a o lau lena fautuaga ma lau faapai atu. E taua tele nai mea ia aua o i ina tatou te tilotilo ai i ai i e ua i ai ma i latou e le o i ai. E pei o le agaga lena ua avatu faafautuaga, ae e pule lava Sitafune i le la o lona vaa, a o lena ua avatu a matou fautuaga mo le agai i luma o lo tatou atunuu ma le faasoa ia talafeagai ma fetau.

O lea ou te vaai e pei o le la e tau tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lea lava e paleni le faasoa. Ou te le iloa po o le a le mea ua ala ai ona lagaia ma lagalaga, a o la lava e paleni le faasoa a Matagaluega.

Ia manatua foi e laitiiti lava la outou fuainumera, ae toetiiti lava o le atunuu atoa lea e i inei. A alu lava la sina luafulu i inei ae tasi outou, ua talafeagai lelei lava. E le faapea o le a faatutusa aua o le atunuu atoa lea e i inei. E toetiiti lava 80% o nofoa o le Palemene o lea e i inei. O lea lava la e paleni le faasoa. Ia manatua foi e le na o auala, a o auala, o faleaoga, o taligalu, falemai ma mea uma lava na e aafia uma ai i le faasoa lea e fai nei. Afai e misia oe i le isi mea, a o la e kava mai i le isi mea, o le faasoa paleni lava lena.

Lau Afioga i le Fofoga Fetalai, ave pea i le faasoa mea lelei o lea e le i taitai le tatou Paeaiga. O le a e fefe o lea foi e i ai le isi a tatou Tala o le Tupe? Ou te faia so o lava le faamatalaga lea, o le faipule e naunau e vave fai lona auala

e oo atu i le faiga palota ua galo i tagata, a o le faipule e toe lua masina fai lona auala, o le felesi ia. E oo atu lava i le faiga palota o lea e alu atu le manogi lalaoa o le auala.

Lau Afioga i le Fofoga Fetalai, aua e te popole o lea lava e faasolo atu le faasologa a le Minisita lima lelei i le tulaga i o tatou auala faapea foi ma taligalu ma faleaoga.

Lau Afioga i le Fofoga Fetalai, o le faasaoga lena leaga ua tele lava mataupu ua laga mai e le sui usufono i lenei taeao.

Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese): Lau Afioga i le Fofoga Fetalai.....

FOFOGA FETALAI: O le a avatu pea le avanoa i lau Afioga i le Minisita mo Galuega, Felauaiga ma Atinae Eeseese, se i tulai mai.

Afioga Hon Manualesagalala Enokati Posala: Na o se vaega laitiiti lea ona sa saunoa le sui usufono e tasi le miliona e le oo i ai le faagasologa.

Ou te iloa ana e auai i le tatalaina o auala galue ia e lua sa faatino i le itu o Anoamaa i le vaiaso na tea nei, e te manino lelei ai. E lua auala ae \$1.6miliona, e \$700,000+ le isi auala galue ae \$800,000+ le isi auala galue. O le fua la i ai e lua kilomita aua e le o toe taugofie le faatinoga o auala galue. A ou faasolo atua foi le faasologa la e i ai, e leai o lea lava e paleni mea uma. Na amata mai i o i le Taitai o le Itu Agai, na ou taua o la ua amata ona fai galuega ma ua maea le galuega ma faasolo mai ai aua e ui lava ina saunoa le Taitai o le Itu Agai e faamulimuli lona itumalo, a o la ua faatino galuega i Sataoa.

O Falealupo, o le suavai, o la foi e faatino ma faalelei le agai i tai, ae vagana ai se tasi o sui usufono mo Vaimauga Sisifo, Tofa Lefau Harry Schuster o lea ua oo i ai le faasologa. E faapena foi Saleaula, a o lau Afioga i le sui usufono mo Faasaleleaga Nu.2, o la foi sa fai le auala ma o lea sa fai le galuega, ua uma le isi galuega i Sapapalii. Soso o mai ai ma Faleata Sisifo, o le tele ia o auala ia ua faatino i totonu i Vaitele. O i ina lea sa mafuli i ai le tele o nai seleni ia sa i ai e faapena foi ia Faasaleleaga Nu.3, o lea ua uma ona faatino galuega ma ua tatala aloaia. A oo mai foi i Faleata Sisifo, le auala laupapa lelei ua fai mai ma talivai lelei ua faaleleia ai le itu i uta o Vaimoso. O le faasologa lena ma e oo mai lava i le sui usufono lea lea na saunoa, e leai o lea ua tofutofusia ma o le faasoa lena o lea e faatino nei. A o lena ua fai atu, afai e sefulu i inei, e tataua ona tasi outou aua o le faasologa lena e i ai pe a fua i pasene.

Ma le agaga faaaloalo.

FOFOGA FETALAI: O lea o le a te i fua ua oulua lagalaga i le lauga a Papalii.

Afioga Afualo Wood Uti Salele (Salega): O le mea e fia faasao. E leai lava ma se auala galue o Salega ua faia, faafetai.

FOFOGA FETALAI: Saleaula (*I le sui usufono mo Gagaemauga Nu.2 o lo o tulai*).

Tofa Levaopolo Talatonu (Gagaemauga Nu.2): Lau Afioga i le Fofoga Fetalai, faafetai lava o lea ua tau malamalama mai le vaega lea. O lenei itumalo lau Afioga i le Fofoga Fetalai, o lea o le a 40 tausaga e le i lalaoa lava lenei itumalo ae ua matua lalaoa faasolo atoa isi itumalo i mea ia o auala galue. Faafetai o lea ua faafofoga mai lou itumalo o lea ua saunoa manino lava le Afioga i le Minisita mo Galuega, Felauaiga ma Atinae Eeseese, ae ia tatou tapuai ia po o le a se taimi tatou te lalaoa ai.

FOFOGA FETALAI: Lafo le faatuatuaga aua masalo e le o lalaoa le itumalo a o le sui usufono lea e lalaoa.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, a foi lea na tatala le faleaoga o le sui usufono faatoa faamaui atu nei? O fesoasoani uma lava na e tauala mai i lo tatou Malo.

O le itu lea iinei lava i Faleata Sisifo, oka, oka, oka, o auala uma lava ia e alu i Tuanaimato ma le faafouina o auala uma ia e alu iinei i Apia, masalo a faatupe auala nei, o le mea moni lava ua le tataua ona toe faia se mea e tasi a le Itu Agai ona o lea ua goto uma i le latou sui usufono lea mo Faleata Sisifo i le tulaga i mea tau tupe, a o lea lava e taumafai le Malo e faasoaso atu.

Ua ala foi ona tau agai upu i lea mea ona o le le faautauta o le lauga a le sui usufono na faatoa maea atu nei, ona nofo lea ma tau leaga mai le faasoa, ae a tuu faatasi tupe ia na faatino ai mea ia ma tupe ia na faatino ai galuega pe a tuu faatasi le toatolu lea po o le toafa, e sili atu ona tele tupe na aemaise lava lo outou sui usufono lea mo Faleata Sisifo.

O le faaopoopo atu lena aua o mea lava e fai iinei i le taulaga, e alu uma lava i le sui usufono mo Faleata Sisifo ma le sui usufono mo Vaimauga Sisifo.

FOFOGA FETALAI: Ia, Palusalua ua uma ona fai ou auala, o le a la le isi mea? E te manao i se isi auala lea e te tulai mai ai?

Afioga Hon Palusalua Faapo II: E sao lelei lava le saunoaga a lou uso a sui usufono vaeatu le Afioga i le Minisita. Ona pau lava lau fautuaga lau Afioga i le Fofoga Fetalai i le Minisita, o lea ua tuumuli ia taua, fai uma o ta auala i le tausaga fou ae aua le faia i le palota, leaga e i ai le auala lea i Sataoa e faamanatu atu pea, na amata lava le Paeaiga o i ai i le lisi, ae oo mai lava i le aso nei o lo o i ai lava i le lisi ae leai se mea ua faia.

Na ona ou faamanatu atu i lou uso a sui usufono ma lou faaaloalo lava.

FOFOGA FETALAI: Malie lau Afioga i le Minisita, se i tuu atu le avanoa i le sui usufono mamalu mo Vaisigano Nu.2.

Tofa Motuopuaa Uifagasa Aisoli Vaai (Vaisigano Nu.2): Ona pau lava le mea e faanoanoa ai i le faasoa a le Afioga i le Minisita, ona o lea ua amata mai i le Taitai o le Itu Agai ae faagata i le sui usufono mo Faleata Sasae, ae na tilotilo mai loa ia maua ma Tuuu tuu loa. A o le talosaga ona o lea foi na tuu atu i lou Ofisa lau tusi. Aua o auala galue ia ou te talanoa atu ai, o auala i totonu o nuu na afaina i afa o Valelia ma Ofa ia malie ai lau Afioga i le Minisita aua o lea o le a le oo mai le faasoa ia maua ma Tuuu, a o lea ma te

tapuai atu lau Afioga, ia ma le faaupuga lea e faapea e tasi le matou Itu, a o lea ua saunoa le Afioga i le Palemia o le atunuu uma lea e ia i latou. Ailoga o silafia e lau Afioga i le Palemia, na o tino o le toatele la e i o, a o loto o lo o iinei.

Ma le faaaloalo lava.

FOFOGA FETALAI: Se i tuu atu muamua le avanoa i le sui usufono mo Siumu ona o lea e sootuli ma le sui usufono mo Vaisigano Nu.2.

Tofa Hon Tuuu Anasii Leota (Siumu): Faafetai lava, o lea ua saunoa le sui usufono mo Vaisigano Nu.2 ona o lea ua sau le faasoia i i, ae a pe a malie lau Afioga i le Minisita faaoo mai ia maua ma Toleafoa lau faasologa faamolemole.

Tofa Aveau Tuala Lepale Niko Palamo (Faleata Sasae): Lau Afioga i le Fofoga Fetalai.....

FOFOGA FETALAI: Aveautau, e te le i malie lava i lou auala laupapa lea ua uma ona fai?

Tofa Aveau Tuala Lepale Niko Palamo: E pei o le mea lena ua ou tulai atu ai lau Afioga i le Fofoga Fetalai. O le mea muamua, e momoli atu lau faafetai i le Afioga i le Minisita ona o lea e foliga mai e leai lava se auala o Faleata Sasae o faia, ae na o le alalaupapa. Lau Afioga i le Fofoga Fetalai, o le alalaupapa e le o se alalaupapa o Faleata Sasae aua o i ina e feoi ai le toatele o tagata. A le faia, e le mafai ona omai le toatele o tagata i le taulaga, ae faafetai o lea ua manino e le i faia lava se auala galue mo Faleata Sasae.

FOFOGA FETALAI: Ona o le auala laupapa o lea e tu i Faleata Sasae. O mea lava e fai i Faleata Sisifo o Faleata lava lena aua o Faleata lava o Faleata, ae onosai mai le paia ma le mamalu i sui usufono mamalu, o lea ua tulei saunoa ma ua malamalama le folasaga a le Palemia aemaise foi le Afioga i le Minisita e a ia le Matagaluega o lo o faasoasoa.

Silasila foi i le tatalo lelea a le isi sui usufono mo Salega, Afioga Tapuai Toese Ah Sam, e leai lava sona leo o faaalua ae na o le tatalo i le Atua.

Malie lau Afioga i le sui usufono mamalu Afualo, e alu atu lava le tufa. E faapena foi i atugaluga o le sui usufono mo Gagaemauga Nu.2, tatou faatalitali. O lea lava e maua le Afioga i le Minisita ma le Matagaluega. E alu atu pea le faasoia, e faapea foi i le tagisa a le sui usufono mo Vaisigano Nu.2, ae alofa foi le Minisita, ua fai sina leva o faalogo pea le Fofoga Fetalai i talosaga ia a Vaisigano Nu.2, ae lafo atu i lau Afioga.

E i ai se isi mea (*I se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi o lo o tulai*).

Afioga Hon Leaupepe Toleafoa Apulu Faafisi (Aana Alofi Nu.1): Lau Afioga i le Fofoga Fetalai.....

FOFOGA FETALAI: Tulai mai lau Afioga i le sui usufono mamalu.

Afioga Hon Leaupepe Toleafoa Apulu Faafisi: O se mea e fia faasao ma faamalamalama. Ou te tulai atu e momoli atu le faafetai i le Afioga i le Minisita mo Galuega, Felauaiga ma Atinae Eseeese i le faasoa ma le lufilufi lima lelei aemaise o le faasoa faatoeaina ma faatagata o le Atua, a o lea la e fautua e le isi sui usufono o lo latou itumalo po o le Taitai o le Itu Agai e ave le faamuamua i o latou auala mo le tausaga fou ina ia fai ia uma. E le o se faasoa lena amiotonu aua o le faasoa faatoeaina, o le tagata e faasoa, e le ai ma e le taumafa, tulou le faafofoga a le atunuu. Aua e te tuuaulafo i fautuaga sese ia ma na o se mea e fia faasao lau Afioga i le Fofoga Fetalai, leaga o lea e tusi lou aao i le itu lea ma faapea e 10% le Itu lea ae 1% le Itu lea. O lea la ua ou fefe ai ma au ina ne i t e i ua ou lavea ai i le pasene lea e tasi, ae faamolemole lavea ai pea Tuuu i o ae tuu au i inei.

Ma lou faaaloalo lava, faafetai.

FOFOGA FETALAI: Tulai mai lau Afioga i le Minisita, e faigata lau galuega i le tagisa o sui usufono mamalu, a o le a lafo atu aua o lo o i ina le tofa ma le faautautaga.

Afioga Hon Manualesagalala Enokati Posala: Lau Afioga i le Fofoga Fetalai, ua ou manatu lava ma le faaaloalo, o le avanoa lelei lea i tulaga i auala galue aua ou te iloa a maea i inei, ailoga e toe laga mai e ni sui usufono.

O le saunoaga a le Afioga i le Taitai o le Itu Agai, o lo o manino lava. O le itumalo i tua i Safata ia aua ne i faia se galuega, ia muliai lava i ai, a o la ua faatino galuega. Afai la e fai o ia ma faataitaiga i le la Itu, o se itu lelei. O la ua faatino ma o i ina i le Vaisigano, o le vaiaso na tea nei e manaia le tusi. O tulaga aloaia ina ia faamaumauina, o lea o le a maea le Paeaiga a o lea faatoa faaoo mai le tusi a le sui usufono mamalu, a o le la ua faagasolo i ai a tatou polokalame, a o lo o faasafua lava i o tatou itumalo taitasi. E lelei lava le tofu o le manu ma si ana i'a.

Ia manuia le Fono.

FOFOGA FETALAI: Malo. Tulai maia le sui usufono mo Faasaleleaga Nu. 2 e faaiu mai ua toe lua ou minute.

Susuga PAPALII LIO FAAVAIVAIOMANU TAEU MASIPAU: Faafetai i lau Afioga i le Fofoga Fetalai, atonu ua taua foi se sao ua avatu ua lagalaga ai foi le Maota ma faailoa foi nisi itu taua, ia malo faafetai. E pau lava o lea e faamalulu atu i lau Afioga i le Minisita ina ne i te i ua faapea ua tauleagaina le faasoa, e leai sa avatu lava lau faamaluluga i le taimi ua sola, leai o se fautuaga o se feau faa-fautuaga ae le o se mea e tauleagaina ai faasoa. O lea ou te talitonu lava i lau faasoa leaga o lau Afioga o le Tiakono Toeaina e te faasoa ia lelei mea uma. O le mea lea o lena ua avatu le talosaga a lenei itumalo, e lafo atu pea i lau Afioga mo se fesoasoani. E talitonu foi e le toe tele se manatu ua tele ina avatu foi se agaga o lenei sui usufono, ou te talitonu ia o le tatou tamaoaiga lava o lo o tatou talanoaina pei ona saunoa lau Afioga i le Fofoga Fetalai, e leai e talitonu lava e taua tele, e momoli le agaga faafetai i lau Afioga i le Minisita mo Tupe Maua faapea foi le tamaitai pule ma le Pulega o a tatou tupe maua, atonu o lea ua maua o lea ua faatino le polokalame lea o le ASYCUDA World, ou te talitonu o le tasi lea fesoasoani mo le tatou tamaoaiga, ia te au lava ia ma lau vaavaai ia e leai o lenei

Matagaluega aemaise foi o tiute mo a tatou oloa faaulufale mai ma tuu i ai ma le VAGST ma isi lafoga, masalo pe ova atu lava i le \$300miliona tupe o lo o aoina e lea Matagaluega mo lea tausaga faaletupe ma lea tausaga faaletupe. E talitonu foi, atonu e tasi lea laasaga taua ma le isi laasaga fou lea o lea ua laasia, ou te talitonu o le a fesoasoani tele mo le tatou tamaoaiga mo le agai i luma, ia a tuu loa i ai ma le fale'ia lea o le a fai i Salelologa pe a talia le tatou talosaga, ia ua manaia tele lo tatou agai i luma. Ia o se fesoasoani lea i le tatou Tala o le Tupe. E talitonu foi, e faamalulu atu foi i lau Afioga i le Palemia ma Kapeneta, o le a foi se faasoa, o le lagona lava faa-sui usufono, ia e le natia, o mea lava e ao ina avatu i lumamea ina ia lauiluu foi i ai le tofa ma le uta aua le lufilufiina o le tamaoaiga o le tatou atunuu. Ia manuia lau Afioga i le Fofoga Fetalai, manuia foi le paia o le Maota, manuia foi le faafofogaaga a le atunuu, faafetai.

FOFOGA FETALAI: Malo faafetai saunoa i le sui usufono mamalu mo Faasaleleaga Nu. 2, faafetai mo le sao taua aemaise foi o le saunoaga ua agiga i le Maota ma ua faafofoga foi i ai lo tatou Palemene aemaise Afioga i Minisita na agai i ai saunoaga i lenei taeao, malo faafetai tulei saunoa i lenei taeao.

Ia ua avanoa lo tatou Maota i se isi sui usufono? Tulai maia se tasi o sui usufono mamalu mo Falealili, Tofa Tusa Misi Tupuola, ua avanoa le Maota mo le saunoaga.

Tofa TUSA MISI TUPUOLA (Falealili): E momoli atu le faafetai tele i lau Afioga i le Fofoga Fetalai ona o se avanoa ua mafai foi ona maua e lenei itumalo o Falealili e tusa o le talanoaina o le Tala Faatatau Autu o le Tupe a lo tatou Malo 2014/2015, e faapea foi lo tatou faamaoniaina o le Tala Faaopoopo o Tupe 2013/2014.

Lau Afioga i le Fofoga Fetalai, o paia, sa ma faigata o Samoa ou te manatu ou te le toe oo i ai, aua o paia lava o Samoa, o paia e le popo, o paia mai le vavau e oo lava i le faavavau, e leai lava se isi po o se tautai matapalapala na te toe faaopoopo pe toe toese paia, sa ma faiga o lo tatou atunuu. Ae ou te faatulou atu, ma faatalofa atu foi i le faafofogaaga a Lana Afioga Mamalu, O Le Ao o le Malo ma le Masiofo, le Sui Usufono o le Fono a Sui Tofia ma le Masiofo, e faapea foi le Afioga i le Faamasino Sili ma le vasega o Faamasinoga.

Ou te faatulou atu foi i le paia maualuga o le tatou Maota nei i le paia o Tiafau aua le afio o lau Afioga i le Taitaifono, afio le Afioga i le Palemia ma lana Kapeneta mamalu, le Afioga i le Taitai o le Itu Agai ma le Sui Taitai aemaise le la Itu o le Maota, le mamalu maualuga i Afioga i Minisita Lagolago, o paia lava ia o Tiafau o lele ua saveioloolo ai le seuga o lenei taeao ona ua aliitia le seuga o sui usufono mamalu o le atunuu e pei ona filifilia aua foi upufai o lo tatou atunuu.

Ou te faatalofa atu foi i le paia maualuga o lou itumalo, le tapuaiga a Falealili, o paia lava ia i le Alaalagafa ma Lаланofo ma le Tauagaeseese ia te oe Falealili. Faamalo le tapuai, faamalo i la outou tatalo lelea e faia pea i le aso ma lea aso, aua se manuia o outou sui usufono na outou filifilia aua upufai a le tatou Malo, le Afioga i le Minisita le Afioga ia Tuiloma Lameko ia ma lou sui usufono faatauvaa. Faafetai tele i la outou tapuaiga. O le a foi sa outou silasila mai i le tele o a tatou talosaga ma le tele o tatou mataupu o le

tatou itumalo, ia e fai aso lava le Alii, o lo o faia pea e le tatou Malo mea lelei mo lo tatou itumalo aua le agai i luma o le tamaoaiga o lo tatou itumalo aemaise foi fuafuaga fai.

E le faagaloina foi le tapuaiga mamalu i lau susuga i le Toeaina Faatonu lau susuga Iosia Tunumoso ma le faletua ia Susana ma le paia maualuga i le Aufaigaluega Paia a le Atua i totonu o lo tatou itumalo i so o se fata faitaulaga, ua faamalo le tapuai, malo le tatalo, matou te ioe lava ma talitonu o matou faamoemoe, ana le seanoa la outou talosaga leleoa e faia pea i lea aso ma lea aso, ia e le manuia ni o matou tiute ma faiva pei ona outou tofofi maua e aumai i totonu o le Palemene. Ae ia alofagia e le Atua ia maua pea le soifua, maua lo outou soifua aua le auauna i le Atua ina ia maua pea le ola faale-Agaga o le itumalo, leaga o le itumalo o Falealili e fai i ai upu a le atunuu, 'e ta te fia Falealili fua i lo outou fai mea mafai,' i lo outou alolofa i le atunuu ma lo outou alolofa i le Faigamalo aemaise le Atua ma Lana feau, e pei ona tatou soifua ma ola ai nei.

E faatalofa atu foi i lau faifeau lou tama faale-Agaga le susuga ia Aмоса Vaetoa ma le tina ia Punipua, malo le galulue, a silasila mai foi e seasea lotu atu la outou sui usufono i le tatou nuu, ia o le tele lava foi o isi tiute, a o le agaga lava ia e fia faamaopopo mea uma aua lo tatou ekalesia.

Lau Afioga i le Fofoga Fetalai, e lagolagoina e Falealili le Tala Faatatau Autu o le Tupe, o lea ua maea ona saunoa le Afioga i le Minisita o Tupe le Afioga foi lea i le Taitai o lo tatou Malo, e manino ma malamalama folasaga o le Tala o le Tupe pei ona i ai nei o le 2014/2015. E moni lava e le o taitai lava ona lava a tatou tupe e faatino ai le tele o a tatou atinae lelei, atinae o le tamaoaiga o le atunuu mo le agai i luma, o lea ua tatou pasia le 50 tausaga, lea ua tatou agai i luma, ua tatau foi ona oo le tatou Tala o le Tupe lau Afioga i le Minisita o Tupe, i se piliona i lea tausaga fou faaletupe. Ua tele a tatou galuega, ua tele a tatou atinae, ae ua tau faasoaso lava. Ona ou lagolagoina ai lava lea o le tatou Lipoti le saunoaga a le Afioga i le Minisita o Tupe e pei ona ua maea ona tauaao i le Maota ma faafofoga i ai. O lona sini autu toe tapue le tamaoaiga, malo faafetai. O i e tatou te iloa ai le tulaga o le taumafai pea o le Afioga i le Palemia ma le tatou Malo aemaise le Kapeneta, se i toe tapue pea le tatou tamaoaiga ina ia saogalemu ma lelei mea uma i le faatinoina, o lea lava ua aumai ona vaega eseese. E manatu foi lea, e le toe oo lava i ai, e pau lava lea o le tatalo a lenei itumalo, tatou galulue faatasi. O Samoa ma lenei Palemene ma tagata uma e oo lava i le aufaigaluega, a tatou tutu faatasi, a tatou galulue faatasi, ona sao lea ma lelei mea uma aua le tamaoaiga o le tatou atunuu, e le mafai e le Malo ona fai toatasi, ae a tatou limalima, pei lava o upu a le atunuu, 'o le tele o lima e mama ai se avega,' o le saogalemu foi lea ma lelei o tulaga tau le tamaoaiga o lo tatou atunuu e pei ona tulai mai i le tatou Lipoti ma lenei Tala o le Tupe e tusa ma lenei vaegatupe e \$700+miliona tala, ae talosia o le tatalo ia tatou oo atu i lea tausaga faaletupe ua tatou oo i le piliona e faauma ai le tatou Paeaiga.

Lau Afioga ma le faaaloalo ou te tulai atu ai, i le tulaga lava o le tatou Tala o le Tupe, pei o vaega taua lava ia e ta te vaavaai pea i ai aua ua leva foi ona galue i le Malo ma tulaga uma faapea, o lea lava o lo o saogalemu lava mea uma, i lau lea vaai i le Tala o le Tupe. E leai lava se mea e tasi o faaletonu, e vagana o le tatou taumafai atili e tapue pea le tulaga o le fia faaaogaina faale-Tulafono o a tatou tupe maua e fesoasoani malosi lea i a tatou Tala Faatatau Autu o Tupe i lea tausaga ma lea tausaga. A o le faamoemoega lava ia e

faamoemoe lava i faauluuluga i afioga i Ofisa Sili o Pulega ma taitai o vaega o galuega a lo tatou Malo, ia e tatou te galulue faatasi, malo galulue i a outou afioga, i a outou afioga i Ofisa Sili o Pulega aemaise foi o faauluuluga o Pulega ma Faalapotopotoga Tumaoti a lo tatou Malo, aua lava le tau atinae ma faaleleia atili o le tamaoaiga a lo tatou Malo.

Ona ou oo mai ai lea i vaega ia pei ona taua pea mea ia o aitalafu. Lau Afioga i le Fofoga Fetalai ma le mamalu o le Maota, se o lenei itumalo e matua lagolagoina e fai pea ia tele aitalafu, fai ia tele ni a tatou.....ae o le a le mea e ala ai ona popole i aitalafu? E leai lava se tagata faipisinisi e le aitalafu. O le a le faamoemoe? Ia lelei le gasologa o le tamaoaiga i tulaga o le faasologa o so o se pisinisi. Ia a o le taumafai mai o nisi sui a usufono e taofi aitalafu, e le lagolagoina e Falealili lau Afioga lena tulaga. O le tatalo lava a lenei sui usufono ma lenei itumalo, vaai ni a tatou aitalafu tetele, e leai lava se atunuu tele i fafo e le aitalafu? A o le faamoemoe, e fesoasoani mai i le tamaoaiga aua le agai i luma o tatou tiute ma galuega aemaise le lelei lautele o le tatou atunuu. Lau Afioga i le Fofoga Fetalai.....

Afioga Hon Palusalue Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: Ia ailoga e i ai se mea e fia faamalamalama lau Afioga. O la e saunoa lava le sui usufono ia i lona finagalo. O lea lava e.....

Afioga Hon Palusalue Faapo II: Leaga o lea e tuuaia matou o lea taofiofi aitalafu lau Afioga.....

FOFOGA FETALAI: E le o taua na o le Itu Agai, o la e sagatonu lau o le fo i le.....se i oo atu

Afioga Hon Palusalue Faapo II: I nisi sui usufono, i nisi sui usufono lau Afioga.

FOFOGA FETALAI: Se i oo atu Palusalue. O le tatou taimi lea tatou te tau tilotilo i ai, alofa mai le sui usufono mamalu. O la lava e sagatonu le lauga a Falealili ia i lona finagalo, o lo o faalauaitele foi e le o faapea atu o le Taitai o le Itu Agai lea e manao taofiofi aitalafu, e leai, o la e tuu faalauaitele mai le saunoaga a le sui usufono mamalu, ona manatu lea, malilie ia sui usufono, tuu le avanoa se i faasolo le polokalame a le sui usufono mo Falealili, a oo mai i lou taimi e te saunoa ai faa-Taitai as a Leader, ia ona e saunoa lea e te talifuitau i le mea la e saunoa ai. Tulai mai Falealili e faaauau mai le saunoaga.

Tofa TUSA MISI TUPUOLA: Lau Afioga i le Fofoga Fetalai ia faafetai tele lava mo le faaulavea a le Taitai o le Itu Agai, e leai e sao lelei lau saunoaga lau Afioga, o lea lava e tautala Falealili ia i le mea e manao ai Falealili, ae le o le aia fua o Safata i le mea e manao ai Falealili. O le matou lava lea fautuaga lau Afioga i le Fofoga Fetalai i le Afioga i le Minisita o Tupe aemaise foi o le paia maualuga o le Kapeneta, o lo matou talitonuga, se e le toilalo se Malo i le tele o ni ana aitalafu, a o i ina e faatupulaia ai pea le

tamaoaiga o le atunuu, se i fesoasoani mai i le tele o atinae o itumalo, aua le tatou agai i luma.

Lau Afioga i le Fofoga Fetalai, ona pau ia o nai fuafuaga mo le tatou Tala Faatatau Autu o le Tupe, ona ou oo mai ai lea i nai nisi o mataupu mo lou itumalo lau Afioga ma lou faaaloalo.

Lau Afioga i le Minisita e ou ia le Pulega o Tagata Asiasi Maimoa mai Fafu ia po o lau Afioga i le Taitai o lo tatou Malo, o se tasi lenei o atinae e matua selau pasene le lagolagoina e lenei itumalo, ma e talitonu foi lo matou vaivai, o le atinae o tagata tafafao maimoa mai fafo, o le faatupulaia atili lea o le tamaoaiga o le atunuu.

Ua ala ona ou taua le itu lea, ona o lea lava ua vaavaai pea i le tele o tatou atinae o mea nei o faletalimalo i luga o le matafaga, tulou, le taeao. Ae ua ou talosaga atu i lau Afioga i le Minisita o le Matagaluega po o le Pulega foi o Tagata Tafafao Maimoa Mai Fafu, se i silasila ane lava i le tele o matafaga aulelei lanupaepae o lo o i ai i Falealili. Ua matou iloa ana faapea e mafai pea ona fesootai le Matagaluega ma lo matou itumalo i afioaga taitasi e amata atu lava i Saleilua seia tau i Sapunaoa, o matafaga lelei ia, ona va lea i Salani seia oo atu i Sapoe. O le tele ia o mataaga i ia mea. A o le matou talosaga, e naunau lava le itumalo e lagolago. E pei lava ona silafia tulaga o i ai nisi o tatou faletalimalo i Falealili, ae le o taitai ona lava. Ae pei na o se matou tuualalo ina ia tupu pea le atinae lea.

A silasila foi lau Afioga ma le mamalu o le Palemene i le tele o isi motu la e tu mai tai i gatai o Falealili, pei o Nuusafee. O le tasi lenei motu taua e tele lava i ai mataaga ma tafaoga a tagata, ae seasea lava ou vaai ua o i ai ni papalagi i tai. Ae ana mafai ona fai ma tatou promote ina ma tatou vaavaai i le tulaga o le faaogaina foi o tagata tafafao maimoa mai e o i Nuusafee, o le matafaga e matautia. O le tele ia o i'a e latalata i le matafaga, o la e e i ai nisi o niu, ae ua uma foi ona ou talatalanoa i nisi o tama o le afioaga o Poutasi i Falealili, e pei o i latou ia e ou le nuu lea, o lo o mafai lava ona maua se fesootaiga mo le lelei foi o le faatinoga, e maua ai foi ni tupe a i latou e fai vaa e o ai i tai e momoli tagata tafafao i ia nuu faapena foi ma isi nuu la e i talaatu, faapena foi ma Savaii. E pei o lau lea tuualalo i le tulaga o tatou tagata tafafao maimoa mai ina ia faalauteleina pea le tulaga o i ai lau Afioga i le Minisita e ou le Pulega o Tagata Tafafao Maimoa mai Fafu.

Ona ou oo mai lea i le vaega lea o le MNRE, o le vaega lea o le Siosiomaga. O lo o i ai le paka i Pue lau Afioga i le Minisita, e pasia pea i aso uma pe a malaga i Falealili. O lau lava tilotilo ma lau vaai, ai se manaia pe a fai ai se tatou paka, aua o le tele o laau ia e agai i le sami, o laau Samoa moni lava. O le tele lava o laau na e i ai, o i ina foi e tele i ai le manulele lea o le pea, lea e masani ona silasila pea i ai le mamalu o le Palemene pe a oo i afiafi, ae na o se tatalo pe le mafai ona toe silasila ane i ai, se o le tele o isi laau la e ola ai e le toe aoga, aemaise laau papalagi sa toto ai i aso ia, ae lelei ona toe tapue a tatou laau Samoa moni lava, ona fai ai lea o ni nai malologa foi nei e tafafao ai nai tagata tafafao maimoa mai, ma nisi foi tagata tafafao o le tatou lava atunuu ina ia malolo i ai, o le manaia o le malu ma le sami foi lale e latalata ane i ai, e maua ai foi nisi malologa a le atunuu i aso malolo. Na o se tuualalo, ae toe faamanatu atu foi i lau Afioga i le Minisita i le tulaga o a tatou taligalu lea lava ua maea foi ona e saunoa mai, ua sauni le matou taligalu i Matautu Falealili. O lenei taligalu na talosaga mai lava i le 2011, ona ua misi ona fai i le taimi o le Tsunami, ae na aafia si o matou pitonuu i le

taimi o le Tsunami. Ou te toe talosaga atu se i toe silasila ane lau Afioga ona ua aafia pea le matou vaiinu aemaise foi le tulaga o le elelee i tai i si o matou afioaga i Matautu. O le faafetai foi i lau Afioga i le Minisita ona o le tele foi o nisi o fuafuaga lelei aua le faatinoina o a outou galuega ma a outou polokalame i le itumalo o Falealili, aemaise o le lautele o le atunuu.

Ona ou oo mai lea i le vasega o leoleo i lau Afioga i le Minisita o Leoleo, malo faafetai i le galuega o lo o feagai ai i le silasila pea ma le vaaia o le saogalemu o si o tatou atunuu i so o se vaega. O si au fautuaga, ou te le iloa pe sao lau fautuaga, ae o le a tuu atu pea i le mamalu o le Palemene. I le tulaga i le vaai pea i le tele o pagota, se i tulou, e pei ua fai pea ma o latou aiga le falepuipui. E magalo mai nei ae toe o i le vaiaso lea i Tafaigata, toe magalo mai nei toe o foi, o le talepe fale, o le gaioi ma isi lava solitulafono. A ua ou manatu po o le a se silasila i ai a lau Afioga i le Minisita, pe le ua tatau ona faia se polokalame foi lea o le faatalatalanoa, counseling o i latou ia laiti, aemaise lava le fanau laiti. Ou te iloa lava a lelei ona faatalatalanoa latou nei, ona latou iloa ai lea o le taua ma le lelei o le mea lea e manao i ai le tatou Malo aemaise foi le Tulafono. A o le mea lea pei ua fai ma vaisu a tamaiti aemaise foi o le tupulaga, na o le o lava i Tafaigata ma toe omai. Ae a silasila ane i ai, pe le ua tatau ona fai se isi avanoa faigaluega i le falepuipui aua o lea ua tutoatasi le falepuipui, na ona tuu lava i ai o se avanoa o se tagata na te faatalatalanoaina i latou nei, se i fai pe maua se isi suiga foi o le olaga ina ia vave ona liliu ese mai le leaga ae fai mea lelei aua Samoa ma le atunuu ma le Ekalesia.

Ia ona pau lea o se fautuaga i lau Afioga ma le mataupu lea e tatau pea ona ou faaleo, ona o au sa ou galue ai i le Ofisa lea i tausaga ua mavae, le LTA. A o le mea lea ua ou iloa nei lau Afioga i le Minisita, ua le o galulue faatasi le Matagaluega o Leoleo ma leoleo auala a le LTA(ATOs). Ua maua ai i i le avanoa mo tagata solitulafono i luga o le auala ua latou le o toe amanaia, ua le toe amanaia leoleo le toe amanaia ATOs po o latou ia o traffic officers. O lea ua ou maua le faamatalaga, e pei ua le fia galulue faatasi vaega ia, ua oo ai lava lau Afioga i le Fofoga Fetalai ina le toe moliaina e leoleo se isi e faaoga pepa ia a le Ofisa o le LTA. A o lea lava e i ai le Tulafono, o lea ou te iloa o la e i ai le Tulafono, ae afai o le mea lea pei o lea e foliga mai ua mumusu e faatino le feau ma le galuega ma Tulafono a le tatou Malo, ou te fautuaina e sili ona fai se isi Tulafono e aveese ai pe afai ua le fiafia i ai. Ae o le fuafuaga lava lena ina ia maua pea le soifua saogalemu o le atunuu, ae aua le faia le mea o le sailiili foi lea po o ai e pule a o ai e le pule. A o le agaga lava ia ia saogalemu feoaiga a le atunuu i luga o aualatetele.

Ia na o se fautuaga lau Afioga, silasila totoa ane pea i ai ina ia aua ne i avea ma lape i le lumanai, ae ia mafai pea ona tatou toe tilotilo i ai.

Ia lau Afioga i le Minisita mo Galuega, Felauaiga ma Atinae Eseeese, malo faafetai, leaga o au o lau Minisita Lagolago. E le tele foi sau faamatalaga, ae na o le agaga faafetai e momoli atu i lau Afioga i le Minisita e tusa ai ma feau ma galuega. O lau faasoa, o le tamalii ia o lau faasoa, e kerisiano le faasoa. O lea lava matou te iloa o lo o e taumafai lava i le mea sili, ae paga lea e le o taitai ona lava a tatou tupe mai le Paketi a le tatou Malo ae fai lava i le mea ua i ai sia fuafuaga ua i ai aua foi a tatou galuega fai. Ae na ona toe tatalo atu pea, se i silasila ane pea i nai isi mataupu na ma talosaga a si ou itumalo a o le i maea lenei Paeai. Ma lou faaaloalo tele i lau Afioga.

Ia, ua ou manatu lau Afioga na pau ia o nai mataupu. Ou te faaiu atu ai e faapea, o lea ua alo atu i a tatou taligamalo, o se tuualalo foi a lenei sui usufono ma lenei itumalo, o le suafa lelei lava o le tatou atunuu e moomia, tauleleia, talimalo lelei pei ona saunoa le Palemia. Ma o le agaga foi lea o lenei itumalo, le tatou Malo ma le atunuu, ua outou faafogafoga mai i lenei itula o Fonotaga a le Palemene, o le tatalo lava a lenei itumalo, ia tatou galulue faatasi e faamama o tatou itumalo, faamama o outou tafatafafa ma aualatetele, aua foi le silasila ma le maimoa a i latou, aemaise o tu ma aga e masani ai ina ia aua ne i i ai se mea e gase, a ia tatou faafoi pea le viiga ma le faafetai i le Alii pe a maea ona tatou faia o se galuega lelei. Ia manuia tele lenei aso ma fuafuaga, ae o le matou tulai atu lau Afioga, matou te matua lagolagoina lava le Tala Faatatau Autu o le Tupe aemaise foi o fuafuaga uma pei ona i ai. Ia manuia tele lau Afioga manuia foi le Fonotaga a le Palemene.

FOFOGA FETALAI: Malo faafetai saunoa i se tasi o sui usufono mo Falealili, Tofa Tusa Misi Tupuola. Faafetai i lau Tofa mo le saunoaga ua faalogologo ma le totoa ma ua logona le tuleiga ma le saunoaga i le tatou Maota i lenei itula o le taeao.

Ia, o lea ua toe avanoa le Maota nei i se tasi o sui usufono e fia saunoa. O lea ua alu atu le afi i lea Itu o le Maota. Ia, tulai maia le sui usufono mamalu mo Aana Alofi Nu.3. Tulai maia o lea ua avanoa le Maota mo le saunoaga.

Afioga TOEOLESULUSULU CEDRIC POSE SALESA SCHUSTER (Aana Alofi Nu.3): E muamua lava ona faafetai i lau Afioga i le Fofoga Fetalai mo le avanoa o lenei sui usufono e faaali ai se manatu i le tatou Tala o le Tupe. E piiama foi lenei sui usufono lau Afioga i le Fofoga Fetalai i le faafetai ma le viiga ua e siitia i le taeao i le tatou Tapaau i le lagi i Lana puipuiga ia i tatou ua mafai ai ona tatou toe feiloai i le tatou Fonotaga. E le gata i lea lau Afioga i le Fofoga Fetalai, o le puipuiga a lo tatou Tama i le lagi mai lena tausaga seia aulia mai le faaiuga o lenei Tala o le Tupe, e ala lea i galuega sa feagai ai le tatou Malo ma le atunuu sa faatinoina i le Tala o le Tupe pei ona maea nei. E talitonu e viia le tatou Tama i le lagi ona e le i afea le tatou atunuu i nisi foi o mala faalenatura po o ni aafiaga foi faa-atinae e afaina ai lo tatou tamaoiga ma faapea ona afaina ai le faatinoina ma le faaleleia o galuega sa fuafuaina. Peitai, e faamalo foi i le Malo ona o lea ua siitia le tatou atunuu i le vaega o atunuu laiti. O le tatalo foi i le tatou Tapaau i le Lagi lau Afioga i le Fofoga Fetalai, ia faapea ona faatasi mai Lona Agaga i le tapenaina o lenei Tala o le Tupe ina ia faamamalu mai pea Ona aao alofa i galuega ua faapea ona fuafuaina i le Tala o le Tupe, ae le gata i lea o le fesoasoani mai foi i le feagai ai o le tatou atunuu ma le usugafono o le a faapea ona talimalo ai le tatou atunuu i lenei tausaga.

Lau Afioga i le Fofoga Fetalai, ou te muai faatalofa ma faatulou i lau Afioga i le Fofoga Fetalai faapea le afio o le Afioga i le Palemia ma le Kapeneta, afio foi le Taitai o le Itu Agai ma sui usufono mamalu uma o le tatou Maota Fono nei. E le gata foi i lea o Ofisa Sili o Pulega ma Pule Sili o Matagaluega ma Faalapotopotoga a le Malo ua mafai ona tatou faatasi i lenei taeao.

E faatalofa foi ma faatulou atu i le faafogafoga a le tatou atunuu, i le Afioga o Lana Afioga Mamalu O Le Ao o le Malo ma Lana Masiofo, le Sui o le Fono a Sui Tofia ma Lana Masiofo. E le gata i lea o le Afioga i le Faamasino Sili ma le Vasega o Faamasinoga.

E faatulou foi ma faatalofa atu i paia faale-Atua i le afifio o le Vaafaaola o le Talalelei o lo o talafaauto i nuu ma afioaga, nonomanu aua Samoa ma ona tagata, ina ia maua le manuia ae le gata i lea o le ola e faavavau.

E faatulou foi ma faatalofa i paia faaleatunuu i le afifio o Tama ma latou Aiga, Faleupolu o Tofiga, le pulega mamalu a alii ma faipule, Saoao ma Tamaitai, malosi o le nuu, i latou o lo o feagai ma le atinaeina o aiga ma nuu. Aemaise foi lau Afioga ou te faatulou ma ou faatalofa atu i si ou itumalo mai Maota ma Falealii ma le malae i Fogalefatu o tua o Maauga ma Nuuasala, seia paia Faleolo ma Togotogo ma le malae o le Papa. E faatalofa ma faatulou atu i le paia ma le mamalu i lenei taeao. Lau Afioga i le Fofoga Fetalai, a o le a fai loa se manatu e faatatau i le Tulafono Tau Faaofi o le Faatatauina o Tupe 2014/2015 e pei ona talanoaina.

Lau Afioga i le Fofoga Fetalai, o le auga o se tuualalo po o se faaoololomaau a lenei sui usufono, ou te fia aumaia nisi o vaega o le lauga a le faifeau na ia saunia le lotu o le Tutoatasi, Susuga Rev Kasiano i lona manatu sa ia faalia e faapea, “O le agasala i le Agaga Paia e le faamagaloina,” ma se isi foi vaega, “O le moa; moa lulu, niu; niu pulu.”

Lau Afioga i le Fofoga Fetalai e le o se isi lagona, a o le taua o lenei vaega ua ou aumaia e fuafua i ai se manatu ona ou te talitonu o lo tatou ai lea, tatou te taumafai ina ia faia mea lelei e tau leleia ai lo tatou atunuu. O vaega foi tatou te fuafuaina ina ia taunuu ma ia mauaa lelei aua lo tatou vaitaimi ae faapea le lumanai o lo tatou atunuu.

Lau Afioga i le Fofoga Fetalai, e lima la nai vaega laiti e fia oo i ai se faamatalaga e tusa o le Tulafono Tau Faaofi o le Faatatauina o Tupe 2014/2015, aemaise o atinae mo le lumanai o Samoa.

O le vaega muamua lau Afioga i le Fofoga Fetalai, e fia oo se manatu i le tapenaina o Tala Faatatau o Tupe. Ona pau le vaega e fia avatu ai se tuualalo ona ua matauina pea i Tala Faatatau uma o Tupe, o le vaega lea e taua o Performance Framework ona o le faigata ia ona malamalama. E talitonu foi o mea e taua o monitoring frameworks, o le tele o le faamatalaina o vaega o lo o sau i totonu iinei o inputs, e le mafai ona iloa po o le a se lelei o galuega faatino. O se faataitaiga o lo o i ai o le toto o le 100 tipolo po o le 1000 tipolo i le tausaga. E le mafai ona tatou iloa ai i le iloiloaina o le Tala o le Tupe po o i ai se suiga. O lona uiga lau Afioga i le Fofoga Fetalai, e tuualalo atu ai ia i latou o lo o faatinoina, e ao ona tagatagai i le faaogaina o outcomes po o outputs po o le iuga o ia galuega, e faigofie ai ona tatou iloa po o tupe faaalu ua fua mai ai ni lelei. E le na o le totona aua o se faataitaiga, a toto tipolo e 1000, pe na o le 10 e ola ma fua mai, pe na o se 3 foi e mafai ona lelei, a o lea ua tatou talanoa i le tele o le seleni e ao ai ona tatou vaavaai pe na i ai se aoga o nei tipolo e 1000 po o nisi foi vaega e faapea ona i ai. E talitonu lau Afioga i le Fofoga Fetalai, o le faigofie foi lea ona tatou iloa se aoga o le investment po o le tupe faaalu a lo tatou atunuu. Aua o le tele lava, e 100 workshops pe 250 faatalatalanoaga ma tagata i tua, ae tatou te le iloa pe ua i ai se suiga lelei o ia vaega. O le vaega lea ou te talosaga atu ai ma tuualalo atu ai i le tapenaina o a tatou Tala o Tupe pe a vaavaai i le faaogaina o outputs po o outcomes mai galuega fai.

O lona lua lau Afioga i le Fofoga Fetalai, e pei foi ona maua i se saunoaga a se tasi o sui usufono.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Malie le sui usufono mamalu, se i tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le Tala o le Tupe o lo o tatou talanoaina o le budget, o fuafuaga mo le tausaga fou. E le o se document tatou te talanoaina ai ni mea ua uma ona fai. O le mea lena a le Komiti o Tupe, a oo ina suesue, e fai ona o lea e matamata i ai ma faitau, a o mea tonu na e igoa o estimates, o fuafuaga au i luma. E le mafai la ona aumaia i inei tulaga na, na o le pau lava le mea a tatou o le talanoa loa i le budget estimates, o fuafuaga o le tausaga fou.

FOFOGA FETALAI: Tulai mai le sui usufono mamalu e faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa, e faafetai atu foi i le faamalamalamaga a le Afioga i le Palemia.

Ou te ioeina lona finagalo i le tulaga lea i tupe, a o le faatinoina i le monitoring frameworks e faaoga anticipated outcomes, e pei o lena na avatu ai se tuualalo, ae taoto atu ia i latou afai e talia, lelei. A o se naunautaiga ia mafai ona faaleleia le tapenaina o a tatou Tala o Tupe.

Lau Afioga i le Fofoga Fetalai, ona ou see mai lea i le vaega e lua, o le vaega lea i le tapenaina o a tatou annual accounts. E pei ona saunoa se tasi o sui usufono, o le matau atu o le Lipoti mulimuli a le Pule ma Suetusi Sili o le 2011, a o le Public Accounts Report mulimuli o le 2010. O le tatou Paeauga lena, e le i mafai lava ona faaoo mai se tapenaga a nei vaega taua a lo tatou atunuu. E le gata foi i lea lau Afioga i le Fofoga Fetalai, ua matauina o nisi o Pulega ua loa tausaga ua silia ma le lima i le sefulu tausaga e le i mafai ona faaooina mai ai ni a latou Annual Reports e pei o le vaega lea a le Ministry of Foreign Affairs, o le SSC ma le SLC. E talitonu lau Afioga i le Fofoga Fetalai, o itu taua ia tataua ona tapena i ai ma fesoasoani ai i le tapenaina o tupe maua ma tupe faaalu aemaise foi o le atiaeina o lo tatou atunuu.

E pei foi ona taua ua i ai a tatou Tulafono Tumau ma Tulafono e limataitaiina ai le faatinoina, le faaleleia ma le faamaeaina ma tuuina mai i le Maota o nei Lipoti, peitai ane, faafetai ona o le tele lava o Matagaluga ua matauina ua tele ina up to date, a o nisi nei o vaega taua aemaise lava le Lipoti a le Pule ma Suetusi Sili ma Public Accounts. E fautuaina ai ma tuualalo atu ina ia mafai ona tapena ma ia alualu i luma le faaleleia ona e taua, ona e mafai ai aua a iloiloina le Tala o le Tupe, o lea ua i ai se vaiga lautele a sui usufono taitasi o le Palemene i tupe faaalu i tausaga ua tuanai, ae le gata i lea po o a ni vaega e ao ona faaleleia. E faigata tele i lou lea talitonuga lau Afioga i le Fofoga Fetalai i le Komiti o Faamatalaga o Tupe a le Malo na o i latou ona vaai i se taimi itiiti pe afai e le mafai ona faaooina mai nei vaega taua.

Tofa Hon Fonotoe Nuafesili Pierre Laufofo (Minisita mo Pisinisi, Alamanuia ma Leipa): Lau Afioga i le Fofoga Fetalai, ona o.....

FOFOGA FETALAI: Malie le sui usufono mamalu, se i tuu atu le avanoa i le Afioga i le Sui Palemia.

Tofa Hon Fonotoe Nuafesili Pierre Laufo: Ona ua matau atu i le mataupu lea ua saunoa i ai le sui usufono i le mataupu e uiga i le Pule ma Suetusi Sili ua faalua ai lea ona taua i lenei taeao i saunoaga. Ona manatu lea mo le faasaoina o le taimi o le Maota faapena ai foi nisi sui usufono o lo o fuafua e saunoa i ai, e fia avatu ai sina faamalamalamaga laitiiti e tusa ai ma le mataupu lea.

O le galuega o lo o faagasolo e le faigofie, ia manatua foi o le Pule ma Suetusi Sili e lipoti sao mai lava i le Palemene ma e taua ma amanaia e le Tulafono lona tutoatasi i le faatinoga o lana galuega. O le taimi nei o lea ua agai mai i se tulaga lelei le tapenaina o lipoti. Sa i ai galuega tuua masalo po o tua i le 2008, o lea la sa faagasolosolo ma faapena ona tapenaina lipoti. E oo mai lava i le taimi nei o lea ua maea ona faatino le audit o Matagaluega uma a le Malo, ae vagana ai Faalapotopotoga Tumaoti po o Corporations po o se mea i le 90% ua maea i le taimi nei e tau mai i le aso 30 Iuni 2013. O le mea la lena ona e fai sina tele o le galuega, a o le taimi lava lea o lea foi o lo o faagaioi ai le tele o isi galuega faafou po o tulaga i Reforms i totonu o le Matagaluega a le Pule ma Suetusi Sili. E pei ona silafia ma molimauina, o lea sa pasia nai Tulafono tetele, e pei lava e i ai le Tulafono e tasi lea e le i maea ona o le tulaga lea i Reforms o lo o faagaioi nei i totonu o le Matagaluega.

E pei lava ona ou fai atu, o le tele lava o le tulaga i galuega ua maea e tau mai i le aso 30 Iuni. Sa i ai foi nai tuai laitiiti mai Faalapotopotoga Tumaoti aua ia manatua foi e faatino le galuega a le Pule ma Suetusi Sili i luga o tusi la sa teu po o faamaumauga a Faalapotopotoga ma Matagaluega uma a le Malo. E pei o vaega ia sa i ai, a o lo o i ai le faamoemoe o le Lipoti o le tausaga e oo mai i le aso 30 Iuni 2012 ma le 30 Iuni 2013, o lo o i ai le fuafuaga po o le Fonotaga ia Novema i le tausaga nei o le a faataatia ai i luga o le Laulau a Fono Lipoti ia.

Na ona faamalamalama atu le vaega lea lau Afioga i le Fofoga Fetalai ina ne i toe saunoa ai foi se isi sui usufono, ae mo le faasaoina o le taimi.

FOFOGA FETALAI: Faafetai, e manatu ua malamalama lea vala le sui usufono mo Aana Alofi Nu.3, ae a tatou taliiu mai i le malologa masani o le taeao, ona avatu lea o le avanoa e toe faaauau ai lau saunoaga.

Ou te faasilasila atu o le a faataatia ese Taulumaga a le Fono Aoaو Faitulafono mo lana malologa masani o le taeao.

Na faataatia ese Taulumaga a le Fono Aoaو mo lana malologa masani i le itula e 10:46 ma toe faaauau i le itula e 11:30 i le taeao.

FOFOGA FETALAI: E i ai le talitonuga ua maea ona palegaauau le taliga o le sua i lenei vaega o le taeao, e i ai foi le faamoemoe sa tuu atu lava le avanoa ina ia sausi lelei le malologa a sui usufono i lo tatou aso amata, tatou sailiili malosi ma tatou sailiili manuia ina ia tapuaaoina pea lo outou soifua manuia aua le faaauauina pea o a tatou galuega mo lenei vaiaso. O lea e momoli atu ai le agaga faafetai ma le faamalo i le onosai mai aemaise foi o sui usufono mamalu ua maea ona saunoa i lenei taeao. E faafetai atu foi i le

paia ma le mamalu o le Malo i le taumafai mai pea e talifuaitau i finagalo na laga e sui usufono.

A o le i toe tuu atua le avanoa i le sui usufono mamalu mo Aana Alofi Nu.3 e faaauau ai le saunoaga, ou te tuuina atu le avanoa lenei i lau Afioga i le Palemia mo le tatou taimi faatulagaina o a tatou galuega mo le aso aemaise o lenei vaiaso.

Tulai mai lau Afioga i le Palemia.

LAFO MO LE SUA O ITULA FONO

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te tulai atu e faatu le lafo, *Ina ia suia o tatou itula Fono e amata atu i le aso Fono lenei e amata i le 9.00 i le taeao i le 1.00 i le aoauli ona fai ai lea o se malologa, ona toe amata ai lea i le itula e 3.00 e faamuta i le 7.00 i le po.*

O le lafo lea ma le agaga faaaloalo.

Faaluaina e le Sui Palemia, le Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo.

FOFOGA FETALAI: E toe faamanatu atu i sui usufono le lafo faatu aua a tatou galuega, tatou te malolo nei i le itula e 1.00 i le aoauli ona tatou toe faatasitasi lea i inei i le itula e 3.00, seia aulia le itula e 7.00 i le po ananei.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015.

FOFOGA FETALAI: Tulai mai le sui usufono mo Aana Alofi Nu.3 e faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. E faafetai atu foi i lau Afioga i le Fofoga Fetalai ma le Matagaluega e tusa ai o le tausiga a le mamalu o le Maota i lenei aso.

O le a toe faaauau se faamatalaga lau Afioga i le Fofoga Fetalai, e faafetai atu i lau Afioga i le Sui Palemia i le faauilavea ma le faamalamalamaina o le tulaga ua i ai. Ona pau lea o se tuualalo lau Afioga i le Fofoga Fetalai atonu o lea ua maea ona tapena e pei ona e saunoa ua tapena le Tulafono ua faatinoina nei e aiaia ai tiute tauave o le Pule ma Suetusi Sili, e talitonu o le tuualalo ina ia mafai loa ona faaogaina nei avanoa e faamalasia ai Matagaluega ma Faalapotopotoga ina ia faautagia le Tulafono aua le faamaeaina o Lipoti ina ia lelei ma alualu i luma le faaleleia o le lipoti mai ina ia maua ai se malamalamaga o le Maota nei. E taua i lenei tuualalo lau Afioga i le Fofoga Fetalai, ona o lo o tatou faamalasia e le gata o nisi o Matagaluega ae faapea foi i Faalapotopotoga ina ia aumai Lipoti i totonu o

tausaga taitasi, e ao foi la ia i tatou o lo o vaaia le Malo ona uunaia Matagaluega ma Pulega i lea tulaga.

Lau Afioga i le Fofoga Fetalai, ona ou oo mai lea i le vaega lona tolu....

FOFOGA FETALAI: Malie le sui usufono o saunoa, se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te tulai atu e toe faataua le vaega lea sa molimoli atu e le Sui Palemia, o le Minisita foi lea o le Ofisa Suetusi Sili a le tatou Malo i Lipoti e aumai sao i totonu o le Palemene.

O mea ia o le sueina o tusi ma faamatalaga o tupe ua maea, e faalagolago le galuega a Suetusi i le maea ona tapena tala o tupe a Faalapotopotoga ona faatoa atoa ai lea o le latou galuega. O lona uiga la, e ese mai le galuega lena mai le galuega lea tatou te talanoaina. O le paketi po o estimates, o mea o tala faatatau o tupe. O le ala foi lena e faaigoa ai o tala faatatau o tupe, e le o ni tupe moni lea tatou te talanoa i ai, o fuafuaga faatatau. O lea tatou te tilotilo, e \$722miliona lea tatou te talanoa ai e faatupe ai galuega ia a le tatou Malo, o tatou lava ia tupe. O le \$544miliona ordinary receipts, o fuafuaga. Pe alu alu foi tupu mai se mala tele e le mafai ai ona afaina ai pisinisi, le mafai ona maua le tupe e oka mai ai oloa, ona le maua lea o le \$544miliona lea. O le uiga o lau faamatalaga, ona o lea sa aumai e le sui usufono, e tataua ona aumai mea e tutupu. E le aumaia i i ni mea ua tutupu, na o fuafuaga i le agai atu i le lumanai i le tausaga fou, estimates, fuafuaga taumatemate. O le ala lea na ou tulai atu ai aneleila ma ou avatu, e ese le paketi, ese mea o accounts. O le mea lena e tapena, o mea ua tutupu. O lipoti o mea ua tutupu, ua uma ona tutupu ma faaalu tupe. E le mafai la ona atoa le galuega a le Suetusi se i vagana ua faamaopopo uma mai tusi nei mai Faalapotopotoga ma Lipoti mai Matagaluega. O le ala lena e taua ai le Lipoti lea ua avatu e le Sui Palemia i fuafuaga ia ua taoto. A ia manatua foi e le Palemene, o le tele ia o le faaopoopoga i le auaigaluega a le Ofisa o le Suetusi na tatou faia i nai tausaga ua tuanai ina ia lava tapena latou ia lava Suetusi latou te faatino le galuega lea.

Lau Afioga i le Fofoga Fetalai, o le mafuaaga lena o lea ou te toe tulai atu ai, o le galuega a latou nei o le sue ae le o le tapena o le tala o le tupe, o le mea lena a Matagaluega po o Faalapotopotoga e fai, e faalagolago la i ai le latou galuega lea ona faatoa maea ai lea o le latou galuega ma aumai i totonu. O le taua la o le laga o le mataupu lea, o lea e faafogafoga mai Pule Sili o Faalapotopotoga, o le ala foi lena o lea e mamafa ai le faatonuga a le Malo i Ofisa Sili o Pulega i taimi e usu ai le Fono ia omai e faalogologo i le taimi e taoto ai Tala o le Tupe i totonu ma amata screening, aua ne i toe malaga se isi i fafo, ina ia omai e aumai faamatalaga e faamalamalama mai i le Komiti ma le Maota i galuega o lo o latou faia.

Lau Afioga i le Fofoga Fetalai, o le faaopopo atu lea i le saunoaga a le Sui Palemia, ma ou te faamalo atu foi i le sui usufono ua na lagaina mai le mea lea, ona e faataua tele e le Malo le tulaga lea i Lipoti ia vave mai. I aso la i le 20 tausaga talu ai, e oo lava i le 10 tausaga e le i aumaia lava Lipoti a isi, sa behind le tele o accounts nei. A o tatou i le taimi lenei, na o le lua tausaga lea e behind ai. O le matua maoae o le mea lenei. Masalo o le tele o isi atunuu, o le tulaga foi lena, e 20 tausaga e le i aumaia lava i totonu o latou Palemene

tala o latou tupe, ae amuia tatou, e ui lava ina faapea o lea e behind, ae sili atu le vaiitami lenei i lo le 20 tausaga talu ai.

FOFOGA FETALAI: Malo faafetai fesoasoani mai i le faamalamalamaga o le finagalo o le sui usufono na faaalua. Tulai maia le sui usufono mo Aana Alofi Nu.3 e faaauau mai le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa, faafetai atu foi i le Afioga i le Palemia mo le faaopoopo ma le faamalamalamaina o tulaga uma. Ona ou see mai ai lea lau Afioga i le Fofoga Fetalai i se tasi o vaega, o le faanaunautaga ina ia faaleleia le faatinoina o galuega a Matagaluega ma Pulega a le Malo. O se auga o lenei tuualalo lau Afioga, ona e maitau atu pei ona saunoa le Afioga i le Palemia, i le tele o seleni foi a tatou Matagaluega o lo o faaalu aemaise lava i tatou SOEs i le eletise, suavai, o auala foi o lo o faapea ona faatino. O le tuualalo lava lau Afioga i le Fofoga Fetalai, e fautuaina ai nei Matagaluega, aua e talitonu pei ona maua i faamaumauga foi, o le EPC ua silia ma le 25% le losses lea o lo o i ai. A mafai ona tuutuu mai i lalo, ou te talitonu o le a tele foi se sefe e mafai ona maua i tupe e mafai ona faaaluina i le eletise. O le suavai e silia ma le 60% le leakage. Ou te talitonu foi a mafai ona faaleleia ia auaunaga, o le faaitiitia foi lea o seleni faaalu e le gata i le tatou Malo, ae atonu foi e faigofie ona maua mai ai ni seleni, dividends po o ni vaega e fesoasoani ai i tupe faaoga a le tatou Malo. E le gata foi i lea a o nisi foi o aid projects lau Afioga i le Fofoga Fetalai, pei ona faalauiloa foi le poloketi lea o le SACEP, e maitauina ua savalia nei le fa tausaga pe tolu pe a, ae pei e maitau atu na o le \$150,000 ua mafai ona faaalu mo le atinae o mea tau faatoaga. Ou te talitonu afai e naunau le tatou atunuu aemaise o le tatou Malo ina ia faateleina faatoaga ma maua le tupe ia i latou faifaatoaga, e fautuaina lava le improve o le service ina ia mafai ona faamatuu atu nei seleni ma fesoasoani ia i latou o le aufaifaatoaga, ae le gata foi i lea o nisi o vaega taua o lenei poloketi, ina ia tele ai ni seleni e maua a o tatou tagata taitoatasi.

E le gata foi i lea lau Afioga, o nisi foi o poloketi o lo o faapea ona faatinoina e le Matagaluega o le Siosiomaga, Climate Change Project, e tele se seleni o lo o maitauina o lo o faapea ona faamatuu mai e tapena ma faaleleia ai nei poloketi, a o nisi foi o nei vaega ua tailua i le taitolu tausaga ua tuai ai le faatinoina. O le popolega lau Afioga, o le umi lava ona faatino, o le laitiiti foi lea o le tupe e mafai ona faaalu mo atinae ae tele le tupe e alu i le totogiina o i latou e faatinoina, officers. Everytime e extend ai le poloketi, e muamua aveese totogi o i latou e faigaluega ma administrations, ae laitiiti ai lava le tupe e mafai ona faatino ai galuega ia i le taua tonu na ala ai ona faaoo mai nei seleni. E pei o se tuualalo lea lau Afioga i le Fofoga Fetalai.

O se tasi foi o vaega lau Afioga, ua maitauina ua tele foi ina faaalua ni manatu o nisi o sui usufono o le Maota nei aemaise foi o le Malo i Komiti Faufautua. O le fautuaga e tuu atu pea lau Afioga, ua maitauina o se faataitaiga o le land management, pe 27 le aufaigaluega, ae maitauina o le Komiti Faafoe e 40 Upolu 40 Savaii. Ia ua 80 i latou o le Komiti Faafoe ae 27 le staff atoa o lea section.

FOFOGA FETALAI: Malie le sui usufono o lo o saunoa, se i tuu atu le avanoa i le Afioga i le Minisita mo Punaoa Faanatura ma le Siosiomaga.

Tofa Hon Faamoetauloga Lealaiauloto Ulaitino Faale Tumaalii (Minisita mo Punaoa Faalenatura ma le Siosiomaga): Lau Afioga i le Fofoga Fetalai o le mea e fia faasao. Atonu o lo o feaveai e le sui usufono mamalu le tulaga lea o le Komiti Faatino, Land Board ma le tulaga o le Komiti lea Faufautua i le Siosiomaga. E le o le land, i le tulaga, e patino lava le Komiti Faatino ia i mea tau eleele. Ma lou faaloalo lava.

FOFOGA FETALAI: O lea ua manino le faamalamalamaga a le Afioga i le Minisita. Le sui usufono mo Aana Alofi Nu.3, e 11 le tatou Komiti Faatino Taualoa, a o le Komiti Faufautua lea e agai i ai lau saunoaga. Tulai mai le sui usufono mamalu.

Afioga TOEOLESULUSULU CEDRIC POSE SALESA SCHUSTER: E moni lau Afioga. Ae pei o se faamaumauga lea na tuuina mai i le Matagaluega, masalo la o le Komiti lea e taua o le Komiti Faufautua o le Siosiomaga lea e 40 sui i totonu o Upolu, 40 sui i totonu o Savaii. Ou te talitonu o le tuualalo lau Afioga i le Fofoga Fetalai, pe le ua tele ea nei Komiti ae a pe a ua lava se 10 e faufautua mo Upolu 10 e faufautua mo Savaii? E tele foi se seleni e mafai ona sefeina mai i le atunuu, ae le gata i lea o nisi o tatou Komiti lau Afioga i le Fofoga Fetalai.

O se fautuaga foi po o se tuualalo lau Afioga i le Fofoga Fetalai i le vaai atu foi i a tatou SOEs, o lea e tele ina ave i ai fesoasoani mo le atiaaina o nei Faalapotopotoga. E le gata foi i lea o tatou CSO o lo o alu ai. Peitai lau Afioga ua maitauina ma le agaga vaivai nisi foi o Faalapotopotoga ia e aafia ai le tatou SROS, o le STEC, o le Kidney Foundation, e maitauina e tele atu le tupe lea e alu i tatou Boards pe toetiiti \$200,000 e alu ai, ae laitiiti se seleni e mafai ona maua mai ai. E fautuaina ai ina ia mafai ona toe silasila i Boards ina ia faalelei le galueaiina o nei Pulega ina ia mafai ona tele se seleni latou te maua o le faaitiitia foi lea o tupe faamatuu atu a le tatou Malo i a latou atinae, a o le talitonuga o le a lelei le latou service ma faapea ona tele ai se lumanai o le tatou atunuu.

Lau Afioga ona ou oo mai lea i se tuualalo i manaoga o leni foi itumalo. Lau Afioga e avatu le faafetai ona o lea e tau maitau atu o lea sa fesiligia foi le Minisita o Leoleo ma le Minisita o Galuega, Felauaiga ma Atinae Eseeese ona sa i ai se talosaga mo le afioaga lea o Satui, ua leva ona i ai le Primary School, ua loa foi tausaga o i ai nai talosaga, o lea foi e oso atu ai i le auala e tele ina faaaogaina mo le tatou vaega foi lea o le Toefuataiga i Olomanu. Peitai, o lea ua maua o lo o i ai se fuafuaga e faaleleia lea auala, o le talosaga lea o le a fai e faalelei uma atu ai ma aafia ai e le gata i le faleaoga, ma o le tele foi o lea afioaga, e le o se auala galue. O le talitonuga lau Afioga, e le o talosaga le itumalo i ni auala galue. O vaega o lo o nofoia nei e afioaga ma alaafaga, ua loa tausaga e le o mafai ona faatinoina i ai se fesoasoani. E faapena foi i le afioaga o Satapuala, o le tele o vaega o le atunuu ua mafai ona faaoo atu i ai se talosaga i le Afioga i le Minisita, ae taoto atu i le lufilufilima lelei a lana Afioga i le Minisita.

Ona pau ia o nai vaega lau Afioga e avatu ai se faafetai i le Afioga i le Minisita o Tupe aemaise le mamalu o le Kapeneta ma lau Afioga i le Palemia

mo le Tala o le Tupe. Ou te talitonu o le agaga lava lea pei ona avatu i le amataga ina ia mafai ona faaleleia lea atinae pei ona outou naunau i ai, ma o le fautuaga foi o lo o tuuina atu lau Afioga i le Fofoga Fetalai, e le o se vaega e faaleaga, a o le fesoasoani. Afai ua uma ona i ai fuafuaga a le Malo, lelei, a o le toe fagufagu, afai foi e le i afea, o le aoga lea o le tuualalo. Ae faamanuia mai lo tatou Tapaau i le lagi i vaega o lo o totoe o le tatou Fono. Ia soifua.

FOFOGA FETALAI: Malo faafetai saunao i le sui usufono mamalu mo Aana Alofi Nu.3. E talitonu e taua lou finagalo, aemaise foi o le fofoga taumomoli lea aua foi le tapuai mai a lou itumalo. Ia, o lea ua sii mai le aao o Palauli, tulai mai lau Afioga i le Taitaiu ua matagofie lenei aso i ou laei.

Afioga AFOAFOUVALE JOHN MOORS (Palauli): Faafetai mo le avanoa matagofie i lau Afioga i le Fofoga Fetalai. Ia, e muamua lava ona sii le viiga ma le faafetai i le Tapaau Sili i le lagi ona o Lana tausiga alofa lea ua ala ai ona tatou penei, ae taoto ia i mauga sa paia o si o tatou atunuu pele, aua o paia lava e faavavau, e le gafataulimaina foi e se auauna vaivai. Ae muai faatalofa atu i le tapuaiga mamalu a Lana Afioga Mamalu, O Le Ao o le Malo, Tui Atua faapea le Masiofo, ae a foi i le tapuaiga a le Sui Usufono o le Fono a Sui Tofia ma lana Masiofo. Le paia o le Malo le Afioga i le Palemia ma lana Kapeneta mamalu, faapea le Taitai o le Itu Agai, Sui Taitai ma le Vaega Faaupufai, ae tainane Minisita Lagolago, faapea le atunuu o lo o usi faafofoga mai aua le tapuaiga o le Fono Faitulafono a lo tatou atunuu, tulou, tulouna lava.

E le faagaloina foi lou itumalo pele o Palauli Sasae i le afio o Faasisina ma Sa Lilomaiaava, alaalatai Sa Faleletaua na potopoto, o Palauli ma lona itumalo, o oe lava o le Pule. Sa fesiligia au e le toatele o tatou sui usufono po o le a se mafuaaga taua ua ala ai ona ou ofuina lenei togiga faafitafita? O lea e ao ai ona ou faamatalaina se tala ina ia mafai ona tatou malamalama uma ai. Ona ua talafeauga lava le taua o lenei aso e manatua ai se tasi o sui a usufono o se uso foi o le autau a lenei Itu ua faapea ona tuumalo, e manatu ai, e ao ona ave i ai se faaaloalo leaga o le uso a pule, e ui lava i pule ma pule, ia a o le tulaga tonu lena ua ala ai ona ou ofuina ia lenei foi togiga i lenei lava aso. O lea ou te faamaise atu ai i le aiga faavavau aemaise le faletua ma le nofo a alo, ia alofagia e le Atua ia maua sona nofoaga mau i le lagi.

Lau Afioga i le Fofoga Fetalai, ou te tulai atu ma lou faaaloalo lava e momoli atu le faafetai i le Malo aemaise le Afioga i le Minisita, le Afioga lava lea i le Palemia e tusa ai foi ma le faamaopoopoga o le Tala Faaopoopo o le Tupe po o le Tala Faatatau o le Tupe o lo o faapea ona i luga o le Laulau a Fono. E faamalo atu foi i le Matagaluega, le Pule Sili aemaise o Pule Lagolago ma Pule o Vaega eseese na faapea ona tapenaina maeaea lenei Tala o le Tupe. E faafetai atu foi i le Komiti Faapalemene e tusa ai foi o a latou iloiloga ma sailiiliga. E maitauina lava le fita o le latou galuega i ao ma po, ae sa faapea ona onosai ina ia mafai ona manino ma sailiili uma so o se vaipanoa o vaega o faasino i ai le tupe ina ia malamalama lelei i ai, ma tatou omai faatasi tatou te tofu sao aua le faasoasoina o seleni e ui ina utiuti a lo tatou atunuu, aua se manuia mo Samoa. Ou te piiama i le faasoaa atu a lou uso a sui usufono o Falealili. E le mafai ona atinae se atunuu pe afai e laitiiti le tupe e faasoasoa. E pei lava o le faiga e masani ai pisinisi, a naunau e faapea ona faalatele le pisinisi, e saili auala e umia ai ni seleni, o le tulaga tonu lena ou

saili ai, e ui ina itiiti le seleni o le a maua mai i le Malo o Iapani, a o le a taumafai e fai auauai le faleaoga aua alo ma fanau o lenei itumalo.

Lau Afioga i le Fofoga Fetalai, pau lea o ni lagona o lenei sui usufono, ae ou te le i nofo i lalo ou te tatalo i le Alii ia faapea ona faatumauina pea lou malosi, ia maua pea le mau aua le faatinoina o lau galuega. Lau Afioga i le Palemia faapea le mamalu o le Kapeneta, o outou mama na. E liliu atu i lea itu i lau Afioga i le Taitai o le Itu Agai, ia maua pea lou malosi ma faatumulia pea i le uta mamao ma le tofa poto aua le faatinoina o le taitaiina o lena Itu. Ia alofagia e le Tama i le lagi le tatou Fono ia mafai ona tatou faatinoina o tatou tiute e pei ona valaaulia ai tatou, ia manuia faafetai.

FOFOGA FETALAI: Malo faafetai i le saunoaga a le sui usufono mo Palauli. E manatu o lea ua faafofoga ma le toto a le Maota, aemaise foi o le tuuina mai o manaoga o lo tatou itumalo, ia malo saunoa, malo faalaeiau i le tuua o le malo i lea itu o le tatou nofo a Pule i Finao. O tatou moomooga alofa uma na ua tatou tau fai misia uma Tuiloa i lenei aso.

Ua avanoa le Maota mo se sui usufono e fia saunoa. E manaia lava le felafuai. O lea ua sii mai le aao o le sui usufono mo Faleata Sasae. Tulai mai le sui usufono mo Faleata Sasae, lau Afioga i le Kapeteni o le tatou au lakapi.

Tofa AVEAU TUALA LEPALE NIKO PALAMO (Faleata Sasae): Faafetai lava i lau Afioga i le Fofoga Fetalai. Ua tu mai lagi le lagaali a Tamafaiga ua toto foi le tavaesina ina ua siva le teine o Tumupue. Ou te faatulou atu ai i le paia ma le mamalu o le Maota Fono nei i Tiafau, e faasoa ai ma faatulaga Tulafono aua se manuia mo Samoa.

Ou te faatalofa atu foi i le tapuaiga a Samoa i Lana Afioga Mamalu O Le Ao o le Malo ma lau masiofo, le Afioga i le Sui Usufono o le Fono a Sui Tofia ma lau Masiofo, le Faamasino Sili ma lou faletua aemaise foi i le vasega o faamasino aemaise foi i auauna a le Atua o lo o talafaauto i itu e fia o Samoa aemaise le lalolagi aua le tauasuina o le Talalelei.

Ae ua ou tulai atu e fai se sao o Faleata Sasae. Ou te faatulou atu ai i le Maota Fono i le Afioga i le Palemia ma le mamalu o le Kapeneta aemaise foi le Taitai o lenei Itu Malosi, Minisita Lagolago ae tainane foi Ofisa Sili o Pulega ma sui o Matagaluega ua tatou faatasi i lenei aso.

A o le i faia la sau tala i le Tala o le Tupe, e muamua ona ou faatalofa atu i lou itumalo, le itumalo malosi e amata atu i Fugalei alu atu ai e tau i le la vaega o Vailoa. Le paia ma le mamalu o le tatou itumalo, e le tau sulii atua o outou faalupega ma outou sa ma faiga aua ua maea lava ona taatia le paia ma le mamalu o le itumalo. Ou te faatalofa atu foi i Susuga i Faafeagaiga Tausi Matagaluega aemaise foi Susuga i Faafeagaiga o lo o i totonu o le itumalo.

E muamua lava ona ou talosaga atu i le afioga i le Minisita. Faafetai i lau Afioga o lea ua maea ona fau le auala laupapa o lenei itumalo. E pei lava ona tau faamatala atu i le amataga e sao lava o le auala laupapa o lo o tu i Vaimoso ae pei o i o lo o faafaigofie ai femalagaaiga a le atunuu. Ae ou te tatalo atu masalo e le i leva ona ou tatalo i le vaega lea aemaise lava le auala lea i Samalaga, masalo e silafia lelei e le Palemia pe a afio mai i le taeao ma le afiafi i ina i le tulimanu lena i nai tamaiti aoga ma e foi.....aua e le sao i ai se pasi i le vaega lea. Silasila foi i le auala lea, o le itumalo lenei i lalo o le faitauaofai o tagata, i le census lea na aumai toetiiti lava 25% o tagata e nonofo i le itumalo lenei le aofai o tagata i totonu o le faitauaofai lea, o lona

uiga toetiiti lava 50% foi le sao o lenei itumalo i le tamaoaiga o Samoa, aua e tele tagata faigaluega o lenei itumalo. E le gata i lea, a outou tagai i le suesuega a le Pulega o Tagata Tafafao Maimoa Mai Fafu, i mataaga e aupito sili ona asia e tagata tafafao maimoa mai ma latou faaogaina, o Papaseea i totonu o lenei itumalo. O lo o i ai faamaumauga e toatele e e... e mafua ona e latalata mai ma e matagofie. O lea la ou te tatalo atu ai i lau Afioga i le Palemia, lau Afioga i le Minisita o Tupe aemaise lau Afioga i le Fofoga Fetalai, se i tagai ane lava, e tasi lenei auala na ou sau lava o ou tatalo atu ai lava. O le mafuaaga, e pau lava lenei o le nuu i totonu o Samoa e le sao i ai se pasi, e savavali mai lava ona tagata ae na o le fitu minute atu iinei i le taulaga. E tusa lava pe fai atu afa le auala, gata i le USP ua lava ai i ina. Ae ou te tatalo atu faamolemole....

Afioga Hon Manualesagalala Enokati Posala: Lau Afioga i le Fofoga Fetalai.

FOFOGA FETALAI: Malie le sui mamalu o saunoa se i tuu atu le avanoa i le faamalamalama a le Minisita o Galuega.

Afioga Hon Manualesagalala Enokati Posala: Ne i o ma faitau eseese ma le sui mamalu a o la e faatino le galuega i Seese, le auala lena e agai i uta i Papaseea, e tasi lena galuega o lo o faatino nei. O tapenaga la e fai mo le fonotaga lea e lumanai nei, e tasi lenei itumalo o lo o faamanuiaina i auala lelei uma o lo o mafai ona faatino. E pei e silasila faapena le sui usufono mamalu i tulaga ia, o lo o lelei mea o lo o alaala ai lona itumalo ma tapenaga o lo o fuafua ma le auala lena i Seese o la o lo o faatino, o la e galulue ai nei, pe a maua sou avanoa ona e asiasi lea i ai. Ma lou faaaloalo.

FOFOGA FETALAI: Malie le sui usufono se i tuu atu le avanoa i le Palemia.

Susuga Hon Tuilaepa Fatialofa Luepsoliai Aiono Neioti Sailele Malielegaoui: Lau Afioga i le Fofoga Fetalai ou te le i vaai i le sui usufono o i ai i le aso na ou oo atu ai tatala le auala lea i le tausaga ua tuanai. Ua faata atu lava toetiiti tau i Papaseea. Sa i ai ma fale na e i uta sa tutu ai, fale komiti e o atu tagata ona sui ai lea i ina. O le ta fou la lea ua toe alu atu, e tusa o lea ua toe alu atu le toe faatino, ae ua leva lava ona o ai taavale ma pasi ma tagata tafafao maimoa mai i uta, e pei lava o auala uma a alu, alu ona toe alu atu lea o le isi faafou. O le faafou po o le ta fou lea e saunoa i ai le Minisita, a o au na ou tatalaina le auala lea i le taimi o le isi faipule o lo outou itumalo.

Na ona ou faapena atu leaga o lau saunoaga lea na aumai nei e pei e talu lava ona foafoa mai le lalolagi e le i faatino. E faapena uiga o mea nei o auala, o auala uma lava o Samoa e alu, alu lava aia toe alu atu le faata fou.

FOFOGA FETALAI: Se i tulai mai le sui usufono pe ua malamalama i le faamalamalama a le Palemia.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, masalo e sese le auala lea e saunoa i ai le Minisita, ou te le i oo atu i le auala lea e i Papaseea, o lea ou te talanoa atu i le auala lea e alu

agai i le vilimaa lea sa aumai ai le maa a le Malo e faata uma ai auala o Samoa, ae le faataina lava le auala lea. O lea foi na maliu ai se isi o fanau.....

Susuga Hon Tuilaepa Fatialofa Luepsoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: O lea la ua maua, se i tuu atu le avanoa i le Afioga i le Palemia.

Susuga Hon Tuilaepa Fatialofa Luepsoliai Aiono Neioti Sailele Malielegaoi: Ua ala foi ona alu atu faamatalaga ona o Papaseea lea sa e faataua mai, o le ala lena na alu atu ai ona o lena e sese lou aumaiga. Ana e faapea mai o le aualata e alu i le vilimaa, aua o lea ua le o toe i ai se vilimaa ua tapuni, ua le o toe i ai foi la ni taavale e soona o atu i ai i ina, ona manino lea o lau mataupu. A o le mea sili o lea faatoa faamanino mai, o le auala e alu i le vilimaa lea ua le o toe i ai.

FOFOGA FETALAI: Ia, tulai maia le sui usufono e le o Papaseea a o le vilimaa.

Tofa AVEAU TUALA LEPALE NIKO PALAMO: E ala ona ou taua Papaseea pe a fua i lau lauga, o tupe maua foi nei e maua a Samoa i totonu o le itumalo, lea na ala ai ona ou taua mataaga ia i Papaseea, ae ou te le i fai atu i le auala i Papaseea. E i ai se taimi ona ou oo lea i le auala lea. A o le auala lea ou te talanoa atu ai, o le toatele o tagata o le itumalo lea e nonofo i le auala lena, e le i oo lava i ai se ta, na o le tanutanu lava. O lea ou te talosaga atu ai, se i tagai ane, aua a fua i le sao o lenei itumalo i le Tala o le Tupe lenei, e le o se tamai sao lava.

O le auala lea i Papaseea, faafetai. Sa ou asiasi i ai i le vaiaso lea ua tea, pe ua faatolu ona ou alu i ai, e ese lou faanoanoa i le faataina o le auala lea. O lea la ua saunoa le Afioga i le Palemia, o ia sa tatalaina le auala lea. Ae ailoga o toe oo i ai le Afioga i le Minisita o Galuega, Felauaiga ma Atinae Eseeese i le auala lea. O lea la ou te fia faafesili ai, o ai tonu lava e vaaia le faiga o auala faapenei? Aua a e toe oo i ai i le auala lea, e pei lava e le i taina, a o lea o le a oo mai le fonotaga, e taua tele le vaega lea. O lea la ou te toe talosaga atu ai, se i toe asiasi i ai pe a maea le Fono ona e silafia lea o le mea lea ou te fai atu ai ona o lea ua taua Papaseea.

Lau Afioga i le Fofoga Fetalai, ona ou oo mai lea i le Tala o le Tupe.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Luepsoliai Aiono Neioti Sailele Malielegaoi: Lau Afioga i le Fofoga Fetalai, o le mea lava lea o le package i le aumai o se fautuaga, e lelei le package lelei mai ma afifi mai, ae a aumai e pei e ato mai ma muga mai, o le a la le lagona o le Minisita? Na o le inoino le mea e maua, ae afai o lena e te tatalo mai e faalelei le mea lea, ona manaia lea o lau talosaga. A aumai la e muga, o le a la le lagona pe a e nofo foi oe i le tulaga lea? E pei e foliga mai ai sa tuulafoai ona fai le auala lena, ae masani

lava ona ou oso atu ai ou alu ou taamilo mai uta i le mea lena e tutu ai fale sa fai faapitoa e le Komiti i ina mo le taunuuga o tagata asiasi maimoa mai. Ne i te i ua galo i nisi o outou na i le lauta, o lea foi e alu a matou asiasiga ma toe siaki uma mea ia e saunoa mai ai outou.

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama. Masalo o le mea lea e saunoa i ai le sui usufono, o le le i leva ona uma ona faata o le auala ae o la e foi ua toe faata, o le tele o tupe na alu ai a o la foi ua toe alu ai ma isi tupe e toe faata ai. O le mea lena o lea e saunoa mai ai le sui usufono.....

FOFOGA FETALAI: O lea ua maua Palusalua.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lena o lea e saunoa i ai le sui usufono, o le sui usufono e moe, moe lava tulai ae oso fua i le misa a le isi. O lea e talanoa au i o i le sui usufono o la e talanoa le malamalama mai i lana mataupu, a o lea e talanoa malamalama atu matou. E faapena le faiga o mea nei ona o le tulaga o nuu nei e malosi tele le timu, e fai ma faaletonu auala. O le ala foi la lena e fai ai ma toe taumafai le Malo e faafou ma toe faafou. E oo lava i atunuu i fafo, e masani ona ou matamata i tala mai fafo, e fautuaina foi lau Afioga i le Taitai o le Itu Agai, fai ma e matamata i tala mai fafo aemaise lava pe a oo i tulaga o afa ma timuga.

E masani ona ou matamata ai i afa ma timuga mamafa, e oo lava i le mananaia o auala i Niu Sila ma Amerika, e matua fofoe lava e le timu i le malosi o le tafe o vai ona o suiga o le tau lea ua i ai. E le faapea la e timu atunuu la ae le faaleaga ai, e leaga foi o latou auala, a o matua inisinia o inisinia la e faia o latou auala ma le maoae o le malosi o le ta, ae talepe lava e le vai ma le malosi o le timu. E faapena foi la o tatou auala, o lea e taumafai nai a tatou seleni e tau faaleleia ai o tatou auala.

FOFOGA FETALAI: Ia, tulai maia le sui usufono mamalu e manatu ua malamalama lou finagalo, a o lea ua saunoa le Minisita mo Galuega, Felauaiga ma Atinae Esee, tapuai mai o lo o faagasolo atu pea galuega faalelei.

Tulai mai le sui usufono, see ese i se isi mataupu.

Tofa AVEAU TUALA LEPALE NIKO PALAMO: Faafetai lava mo le faauilavea. Ou te faamalulu atu foi i le Afioga i le Minisita pe a faapea ua tau malosi laitiiti atu le leo, e leai o le taumafai e avatu le message ina ia mafai ai ona aumai le fautuaga, ae leai.

FOFOGA FETALAI: Ia, tulai mai lau Afioga i le Minisita.

Afioga Hon Manualesagalala Enokati Posala: Lau Afioga i le Fofoga Fetalai, pau lava le lagona e i ai, ona o le taimi. O le filifilia o tatou i le Maota nei e fai ma Taitai, a tau atu loa i se faaletonu e tataua ona – a le vaai le Minisita ia vaai le Matagaluega o Galuega. Ae afai o se mea foi lele faatoa laga mai i totonu i le Palemene, e lagona ai le faanoanoa, a o le tatou vaa e fautele. O galuega nei o la e faatino e le Malo, ae a i ai lava le mea e manao

ai, fesootai mai aua matou te le o e nofonofo ai i o ma faatino galuega nei, a o la foi e faatino galuega i totonu o Ofisa. E le mafai ona o leoleo le faiga o galuega e laitiiti le aufaigaluega, a o le sainiga o le konekarate ma faatino galuega, o la e foi ua ave i ai le faatuatuga i kamupani nei latou te o e fai ma le atoatoa galuega nei. O lona uiga, o le tatou vaa e fautele, a i ai le faaletonu e tau atu i ai le tagata i lona itumalo, fesootai mai. O le tofi lena faa-Taitai ua filifilia ai lau Afioga.

FOFOGA FETALAI: Malo. Ona o le finagalo lava o le sui usufono e agiga i le Maota le tulaga o le aumaiga o lona finagalo mo mea e fia faaleleia o lona itumalo, a o lea ua saunoa atu le Minisita le sui usufono mo Faleata Sasae, faafetai o lea ua lipoti mai le tulaga o le faaleagaina o lou auala ma ua tataua ona faaleleia.

Ou te manatu ua malamalama lea mataupu ae faagasolo lau lauga.

Tofa AVEAU TUALA LEPALE NIKO PALAMO: Ia, o le a ou see ese ma leni vaega. Ae avea leni itula e avatu ai se manatu i le Tala o le Tupe e pei ona faataatia mai.

E muamua ona momoli atu lau faafetai i le Afioga i le Palemia po o le Minisita o Tupe i le Tala o le Tupe e pei ona faataatia mai. E pei lava ona saunoa nisi o sui usufono, o le Tala o le Tupe e tele lava i tupe foi nei e faaauau ai auaunaga a Matagaluega, ae le gata i lea, o tupe foi nei faameaalofa mai e fesoasoani ai i Matagaluega.

E fia fesiligia le vaega lea i lalo o le Saunoaga po o le Budget Address a le Afioga i le Minisita i le itulau e 4 i le pito lava i luga, o le faa-Peretania lea e i ai i o le rebasing of fees lea e i ai le vaega lea i le parakalafa lea e i le pito i luga, toe iloilo ina o le faavasegaina o tau o auaunaga, aua e pei ona silafia na saunoa le Afioga i le Minisita o lo o i ai se faamoemoe e sii ia lafoga, a o le vaega la lea o le saunoaga a le Afioga i le Minisita o lo o faapea mai, toe iloilo rebase ia tau o auaunaga, e mafua ina ia lelei atili ai ia auaunaga a Matagaluega. O lea la na saunoa ai nisi o sui usufono i le mea lea o le performance base a Matagaluega, aua pei e foliga mai i le saunoaga lea, a le siia i luga fees o auaunaga o services fees ia tatou te o ai e vaai ia Matagaluega, e lelei ia le faatinoina o auaunaga, o lea la e ala ai ona ou fesiligia ai i i, aua pei o i tonu lava i le vaega lea, o lea ua tautino mai i i e oo foi i le Lipoti a le Komiti o Tupe o lo o faamautu mai lava le mea lea, talosagaina o Matagaluega ina ia faatino auaunaga e fesoasoani e faamama avega i le mamalu o le atunuu, ae le faapea seiloga e sii i luga le tau o lou alu e vaai ia lea vaega ma lea vaega, ona faatoa faalelei ai lea o le auaunaga. Ona ou vaai atu lea i le Tala o le Tupe, ia e leai lava se vaega tele o le Tala o le Tupe o i ai e ono.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Malie le sui usufono o lo o saunoa, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: E piilua lava mea ia e lua e le mafai ona aveesea e tuu eseese, e

piilua lava mo mea o le auaunaga ma le lava o le tupe e faagaioi ai, afai foi e le lava tupe e faatino ai mea ia, ia o le tulaga foi lena e le lelei le auaunaga. Ae ou te le iloa po o fea e sau ai le finagalo lea o le sui usufono, ae piilua lava mea ia, a le lava le tupe e le mafai ona faatino galuega i le atoatoa, aemaise o le tele o isi auaunaga nei ua ova i le sefulu tausaga e le i toe iloilo. O lea la e faataoto ai se fuafuaga, e lelei ona tai lima tausaga ma review ma toe iloilo, i lo le umi ona tuu ia ona fai atu lea o le fuafuaga pei ua tele ae o la e laitiiti. Ae le mafai ona e tuueseesea mea ia e lua. A le lava tupe e faatino ai galuega e le lelei foi le auaunaga.

FOFOGA FETALAI: Tulai mai le sui usufono mamalu e faaauau mai le saunoaga.

Tofa AVEAU TUALA LEPALE NIKO PALAMO: O lou manatu autu, pe mafai ona faasolosolo foi lele le faatinoina o le vaega lea, aua pei ona silafia, ia o lea ua sii atu nei le fee e vaai ai le falemai, ia o lea ua sii i luga le fee o le eletise, o lea ua sii i luga le tau o pasese ma pasi ma taavale, o lea ua sii i luga, ae.....

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e le mafai ona mauiluga le tulaga ua i ai le falemai ia ma tau tuai sa i ai, o lea ua siitia le tulaga o le auaunaga, e le tau justify ina le mea lea, ae pau lava le mea, o lou savalivali atu i fafo alu i uta, vaai atu ua manaia le falemai ma mea uma e i ai i totonu, e le i faia fua la na mea. Lau Afioga i le Fofoga Fetalai, e le mafai ona e faapea mai, e mafai lava ona faalelei ia le auaunaga ae tuu pea i lalo le tau o mea, e le mafai, e agai lava i luga ia...afai tatou te manao i se tautua lelei, e i ai foi le tau e faatino ai.

FOFOGA FETALAI: Ia e manatu ua malamalama le finagalo o le sui usufono i le taumafai atu o le Malo e faamalamalama tulaga uma e i ai le atugaluga lea i lou finagalo le sui usufono mo Faleata Sasae. E manatu e faasolo le tatou faasoa, o lena e matagofie lau lauga.

Tofa AVEAU TUALA LEPALE NIKO PALAMO: Faafetai, masalo a faasolo atu lau lauga lea ona malamalama lea o le Afioga i le Palemia ma le vaega i le uiga tonu e ala ai ona ou avatua le mataupu lea, ae o le a ou see ese ma le vaega lea i le Tala o le Tupe pei ona faatulaga.

O le isi vaega faafetai i seleni foi ia e aumai e fesoasoani i le faatinoina o galuega, aua a tagai i ai i totonu o tupe lava ia e sau e alu sao e foai i tagatanuu o Samoa e faatino ai ia galuega foi ia lea e alu sao lava i tagata, e fai lava sina tele o le seleni lea mai fafo e fesoasoani ai i i. O le isi la vaega lea o le auaunaga lea se i ou oo atu i ai ona faamalamalama aloaia lea.

Ae o le a ou see mai i i le Ofisa o Faatoaga. I le lipoti a le Central Bank na aumai i le kuata lea na tea atu nei, sa i ai le faaupuga faapea, 'o le Ofisa o Faatoaga o le tasi lenei Lala e tele lona sao i le tamaoiga o Samoa.' E momoli ai la lau faafetai i le Matagaluega o Faatoaga, aemaise lava le paia

ma le mamalu o le atunuu o lo o faatinoina le vaega lea o faatoaga, aua pei ona silafia, e le tele se seleni o lo o sau i totonu o le Tala o le Tupe e faapea o le sao lea o faatoaga i totonu o Samoa, ona o le seleni lea e sau i totonu o le Tala o le Tupe, o tupe lava na ia o lea e sau mai le Matagaluega i le taumafaiga o le Matagaluega, a o le tupe maua i faatoaga o lea e alu faataamilo ai le tamaoiga o Samoa, ese le tele, o container talo lea e o i fafo, o mea ia e ave i fafo, o le nonu, o mea uma lava ia e ave i fafo, o mea foi ia faatau o lo o ola ai ia aiga, o mea uma lava na o le sao lena o le Ofisa o Faatoaga i totonu, pau lava le lape lea e tasi lea ou te fia talosaga atu ai i le Ofisa o Faatoaga, faamama avega le Ofisa o Faatoaga i tagata faifaatoaga. O le uiga la o lau faamatalaga o le polokalame lea o le SACEP, atonu o lea e faapea mai le Ofisa o Faatoaga, o aiaiga ia mai le World Bank lea e aumai ai le seleni lea aua o seleni ia e le o se tamai seleni, tasi lenei seleni ou te lauga soo ai lava ona o lea ou te iloa o le faamama avega lea i le atunuu. Ae i ai lau luitau i le Ofisa o Faatoaga, afai o ni aiaiga ia o lo o aumai e faatino ai le faasoaina o seleni lea, ia toe liliu la le tofa toe soalaupule, ae finau i ai, se leai, sese na aiaiga. Aua o le taimi nei, o le matua faigata ona maua le seleni lenei. E mafua mai, e alu muamua lava au e sue mai le isi vaega o le seleni faatoa mafai ai ona faaoga le seleni lenei, o lona uiga, a leai sau seleni o i ai ou te alu ou te loan i le bank, ia o lea la o le a te i ai lava ona fai ai fua lau aitalafu i le bank ma totogi ma maua ai tupe a le bank, a o le tupe lenei o le grant na aumai e faasoia. Ae o le a le mea e le faasoia ai pei o le faiga o le ponesi lea e avatu e faasoia, a sau le tagata faifaatoaga, faasoasoa, faapena, ae taatia ia vaega ia?

FOFOGA FETALAI: Ia o le a tulai atu le Afioga i le Minisita mo Faatoaga ma Faigafaiva e faamalamalama le saunoaga a le sui usufono. Tulai mai lau Afioga i le Minisita.

Afioga Hon Le Mamea Ropati (Minisita mo Faatoaga ma Faigafaiva): Lau Afioga i le Fofoga Fetalai, faamalo faafetai i le saunoaga a le sui usufono mamalu. Ia o lo o i ai nai mataupu pei ona saunoa i ai e uiga i le mataupu lea le poloketi lea a le SACEP lea e aafia ai le World Bank. Ia masalo e le o le taimi muamua lea na laga soo ai e lenei sui usufono lenei mea, e laga lava i Fono uma ou tu atu ma faamalamalama. O le aso ananafi, maimau pe ana se i e oo atu i lou ofisa ae se i e faafofoga i le ma finauga ma tagata ia o le World Bank lea e i inei, le mea tonu lava lena e te saunoa mai i ai, e le o nofonofoi alii lau susuga i le sui usufono le mea lea e fai nei, o le matua faigata lava o finauga ia e fai e le gata i lou tagata ae faapea foi le Matagaluega, ona o tuutuuga nei a le World Bank, aua o latou e ona tupe e tatou te mulimulitai ai. O lea la na sau foi i se tasi o saunoaga i le taeao nei ia le mataupu lea i le SACEP ia o mea tonu lava na o lea e fai, le mea tonu lava o lea e fai nei o le finau ina ia toe fetuutuunai le tofa ina ia faafaigofie mo nai a tatou faifaatoaga. Ou te le faamoni atu i lau susuga o le tupe lea e aumai e just as a grant, o la ua uma ona faataatia ia le alafua o le poloketi lenei, e i ai le vaega e ave faa-grant, o le tupe o le tupe a le World Bank, e le faapea e omai lava ia fai atu, ia avatu le tupe lea e te alu ai e fai ai au mea ia, o la foi e fia vaavaai latou ina ia faaoga lelei a latou tupe ia e aumai. A o le mea lea e taumafai ai tatou ina ia mafai ona galulue faatasi ma le aufaifaatoaga ina ia....o la e silafia uiga o le tatou atunuu i isi foi faifaatoaga, na ona maua atu lava o le

tupe, alu atu fau ai le isi mea pe fai ai le faalavelave. E faapena uiga o mea faapenei, o lea e fia vaai le World Bank, o le a lau contribution? E le faapea na o le avatu o le tupe e alu atu lea fai ai isi au mea la e...ae le o le mea lea. O le mea muamua lena, o le a lau contribution? A vaai atu o lea ua i ai lau contribution lea, ia ona avatu loa lea o le grant ma o atu asiasiga vaai atu o lea ua fai mai lea mea ma lea mea, e tusa o alafua ua uma ona faataatitia, ae le faapea o se hand-out foi lea na o le omai lava o le World Bank, sau le faifaatoaga lesitala, ia o atu tufatufa atu le tai fia afe a lea, fia afe a lea. Faamolemole lau susuga i le sui usufono, e le faapena le faiga o le mea, o le World Bank e ona tupe, o latou e pule foi i le faatinoga o mea ina ia latou silafia, o la e faaoga tataua a latou tupe ae le o fai ai o latou faalavelave ma mea faapena. A o le mea lava lea e tasi lea e te faapea mai e finau, ia o le mea nei lea e matua finau lava le mea lea e fai nei lau Afioga i le sui usufono mo Faleata Sasae. Ia o lau fesoasoani atu lena, ae ia e malie, e le o se hand-out le mea lea e aumai, o mea o la e omai le World Bank e aumai e fai ai faatoaga ia ma vaavaai atu o la ua fua mai a latou tupe, ae le faapea e avatu le tupe ona alu lava lea e pule le tagata ia po o le a lana mea e fai ai. O lau soso atu lea ma le faaloalo lava.

FOFOGA FETALAI: Malo. Ia e manatu ua malamalama foi lea mataupu le sui usufono mo Faleata Sasae, ae faasolo maia lau saunoaga.

Tofa AVEAU TUALA LEPALE NIKO PALAMO: Faafetai i le Afioga i le Minisita pe afai o finau, ia matua finau, finau i ai i le vaega lea, aua foi o le tupe o lau lava tau o le hand-out o le grant na aumai e ave e fesoasoani ae faatino e le Ofisa o Faatoaga ia aiaiga e faatino ai, ae taatia faafetai o lea ua...o le a ou le toe oo i ai.

O le vaega lona lua, o auunaga lava nei o lea ou te talosaga atu ai i le Ofisa o Faatoaga ina ia taumafai ia faamama avega, o le tupe lea o le \$5miliona lea foi na aumai e faasoasoa i tagata foi ia ua afaina a latou faatoaga i le afa lea ua lua tausaga ea talu ona tea, e oo mai lava i le taimi lena, e leai lava ma se seleni o lea vaega ua faasafua. O aiaiga lava nei o lea ou te tau tatalo atu ai ina ia taumafai e faafaigofie, se o tatou o Samoa, e alu atu loa ae taia mai i le vaega muamua, ia e fiu lava e toe faatali ua le toe alu atu. Ae o le talosaga i le Afioga i le Minisita aemaise o le Ofisa o Faatoaga, toe silasila totoa i ai i aiaiga ia ina ia faafaigofie ai, a faapea foi e manaomia se fesoasoani, ia logo mai e mafai lava ona fesoasoani atu foi i le faasoasoina o lena seleni.

FOFOGA FETALAI: Malie le sui usufono, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o ituaiga fesoasoani nei e laugatasia ai le lalolagi atoa, o lona uiga a faataoto mai lava e le Faletupe fuafuaga ia, o fuafuaga lava e alu ai a latou fesoasoani, e le i soona faia mea ia. E mafua ona faataoto ia faiga ia, ona o mea e tutupu i atunuu uma o le lalolagi e ave fua i ai mea e toe sue atu ua faaoga sese. O le mea la lena o lea e mafua ai ona faataoto mai ia aiaiga ia ina ia faatino le anava foi lele, e aumai le latou fesoasoani ia i latou, o la foi e taumafai e fesoasoani latou ia i latou lava. O lona uiga e aumai le latou sao ae i ai foi le sao o lē o lo o aumai

i ai ia le fesoasoani, e le i fai fua la mea nei. E ala ona fai mea ia e le Faalapotopotoga lea a le Lalolagi, ona o le latou experience poto masani i atunuu ma le lalolagi e fai i ai ituaiga fesoasoani ia, e avatu loa le mea maua fua faaaoga sese loa, ma e le tau talanoa i ia mea. Sa fai foi le tatou tupe foi lea sa ave e o le nuu e faalelei le latou lava auala ae avatu le seleni e tufa. Ia o lipoti na aumai, na ona avatu lava taape inupia ai loa i fafo, fafo ane lava o le fale e tufa ai, a o isi e fai ai a latou kaisi, o le faaletonu ia o na mea, o lea foi la na fai fai e le Malo, tuu. Leaga o le natura lea o le soifua lau Afioga, o lea la e agai mai ai foi, o lona uiga, o lou manatu lau susuga i le sui usufono, o lea e te i ai i le vasega lea le vasega lea, tau lava o le aumai, ae aua le fesili mai i le mea e faaaoga i ai. E te le maua se Faalapotopotoga faapena i le lalolagi lenei, e tau lava o le aumai, ae aua le popole mai po o le a le mea e faaaoga i ai?

Lau Afioga o le fesoasoani atu lena.

FOFOGA FETALAI: Ia, tulai maia le sui usufono mamalu mo Faleata Sasae.

Ia, se i tuu atu le avanoa i le faauilavea a le sui usufono mo Siumu.

Tofa Hon Tuuu Anasii Leota: Lau Afioga i le Fofoga Fetalai, o se mea e fia faamalamalama. Ou te fia fesili i le sui usufono o lo o saunoa nei, po o ia ia ni faamaumauga i talosaga ua talia i le poloketi lea, ae pe fia foi ni talosaga ua toe faau i tua? E leaga o maua ma le Taitai o le Itu Agai, ua toe faau i tua a ma talosaga, o le matua mamau o noataga o mea ia. Ma lou faaaloalo.

FOFOGA FETALAI: Ia, e le o se suesuega a oe e agai i o, o lea e i ai le Matagaluega...

Afioga Hon Palusalue Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: Sa ave sau talosaga?

Afioga Hon Palusalue Faapo II: O lea lava. O lea ua saunoa le sui usufono mo Siumu, na ma o i ai, ma le faamatalaina mai, se e oso lota alofa i le atunuu. O le upu moni lava lea. Ia maua o sui usufono, ae faau i tua a ma talosaga ona o le tele o lavelave la e i ai. Na o lota alofa i le atunuu, o nisi ua mumusu e... ona o tulaga la ia ua saunoa i ai le Afioga i le Minisita ma le Palemia.

FOFOGA FETALAI: O lea ua maua atu lou finagalo. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o se mea e fia faasao. Afai o mea lava ia a le toalua lea e fuifuilua lava laua i so o se mea ma o toe ave i tua a la mea, ia ou te ofo foi, ou te ofo foi i le saga fai pea o ia uiga faapea?

FOFOGA FETALAI: Ia, o lea ua malamalama Palusalue.

Afioga Hon Palusalue Faapo II: Lau Afioga, o le amataga o le mea lenei, se pei o se manuia o le a palasi mai i le aufaifaatoaga i le taufai omai o nai faifaatoaga o le a maua le fesoasoani mo i latou. E oo mai i le aso, fai o le omai o sui i le Vaega lenei ina ia fai atu i a matou fonofoi nei ma le Au Tusitala, a o lea ua savali le tolu tausaga, o lea ua toe ave le tupe e le i maea lava ona faia aiaiga nei.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o au lea ou te le o malamalama lava i le tulaga lea, aua o lea na tau mai, o le toatele ia o tagata ia ua ave i ai le fesoasoani. O le matua lim taitaiseseina o le Maota lenei. E i ai tagata ia na ave i ai le fesoasoani, i latou o lea e fiafia lava i mea o aiaiga ia ua aumai. O lona uiga, o latou tonu lava ia o lea e naunau e faaoga tatau le seleni. O lona uiga o le toalua lea o le sui usufono mo Siumu ma le Taitai o le Itu Agai o lea sa fuifuilua lava i o... O lona uiga o le mea lea sa manao i ai laua, ia aumai ia faaogasese seleni, e le fia mulimulitaia aiaiga ua i ai nei.

Afioga Hon Palusalue Faapo II: Lau Afioga o le mea e fia faasao.

FOFOGA FETALAI: Malie le Taitai o le Itu Agai o lea ua malamalama le mataupu.

Afioga Hon Palusalue Faapo II: E leaga o lea ua saunoa le Afioga i le Palemia, na o le \$150,000 la e ua faamatuu mai le \$32miliona. Silasila i le faigata o aiaiga ia?

FOFOGA FETALAI: O lea ua maua lou finagalo Palusalue. O lo oulua finagalo lava na ave ai i tua a oulua talosaga. A lea e manino le saunoaga a le Afioga i le Minisita e faamalamalama ai requirements o mea nei o talosaga ia e avatu. O lea foi na matou auai faatasi uma ai i le muai faasoasoina, the first distributions sa fai i le Elisa Motel, sa tatou i ai uma i le faasoaga o latou, na i ai faifaatoaga mai Savaii ma faifaatoaga mai Upolu nei sa omai e faasoa le tupe i le tausaga ma le afa lona talu ai. Ae ou te lagona se i i ai se taimi ona tulai mai pea lea o le Afioga i le Minisita mo Faatoaga e faasoa mai le toatele o i latou ua faamanuiaina. Tulai mai le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Na o se vaega laitiiti lea e fia fesoasoani ai i le mataupu lau Afioga lea e saunoa i ai le sui usufono mamalu. E ese le SACEP lea e laitiiti se vaega e faamatuu atu ai, ese le stimulus package lea e i ai e \$5miliona. E tasi lona vaega, o lea ua savali i le lua tausaga e le o mafai ona tufa i tua le tupe. A o le tupe na o le \$700, e le alu foi i le cash, e alu foi lea e ave i ai le voucher e faatau ai mea. O le mea lona o lea e fesilisili ai ma laga pea e sui usufono, i le umi ona faataamilo ae le o ni vaegatupe tetele. O lea ua lua tausaga o faagasolo talu ona uma le afa, e le i mafai ona alu i tua se vaega o le tupe lea.

FOFOGA FETALAI: O lea ua maua lou finagalo, faafetai mo le fesoasoani mai e faamalamalama atili. Tulai mai lau Afioga i le Minisita mo Faatoaga ma Faigafaiva.

Afioga Hon Le Mamea Ropati: Ia, o lea ua tatou o o i le SACEP a o lea e te i ua oso mai ma le stimulus package. O le stimulus package, o le tupe lava a le tatou Malo. E eseese mamao lava le stimulus package ese le SACEP. Ia, o le faasaoga lena o le mea lena.

O le mea lea e saunoa i ai lou uso lea le sui usufono mo Siumu, se o le mea o le noataga, na ona e tago lava talatala malie, aua le soona tosoa ua atili ai le mau, talatala malie. Vaai oe i le uaea lea, a ou tago nei e nonoa, lea, vaai, nonoa le uaea, vaai, lea ua nonoa. A e manao la e talatala, talatala malie, talatala malie lava faapea le nonoa, ia se i vaai, o lea ua toe sao. A o le soona tatope faapea, e atili ai ona mau. O le mea lena o lea ou te fia faamalamalamaina atu i lau Susuga. Faafetai.

FOFOGA FETALAI: Saleaula, o lea e tau faatoatoa atu le tatou mataupu.

Tofa Levaopolo Talatonu: Lau Afioga i le Fofoga Fetalai, ia, ou te fautuaina le Minisita mo Faatoaga ma Faigafaiva e aua le popole, aua te popole fua lou finagalo, o sui usufono lava ia i le afifio atu toe aumai i tua a la talosaga. Ae faafetai tele lava i lau Afioga mo le talia o lau talosaga.

FOFOGA FETALAI: Tulai mai le sui usufono mo Siumu.

Tofa Hon Tuuu Anasii Leota: Faafetai tele i lau Afioga i le Minisita o lea ua faamatala mai le tau tatalaga o le mea. O le mea na oso ai lou alofa, ma te o atu i le Ofisa, e toatolu nai toeaia mai Savaii ua fetagisi, ua tele ina mafai le la aitalafu lea na fai, ae fai mai loa le Ofisa o loa e faatau ai mea o le poloketi, e le mafai ona avatu le aid lea se i vagana ua uma, e totogi muamua le loan faatoa e sau ai lea ma le mea lea. O le ala lena o lou fai atu, o noataga la e i ai, ou te le iloa i le Minisita, o lea e fiu lava e tau talatala, o lea e mau lava le mea. Ma lou faaaloalo.

FOFOGA FETALAI: Ia, le sui usufono mo Faleata Sasae, ou te manatu ua malamalama le mataupu. Ia faaii mai le saunoaga toe lua ou minute.

Tofa AVEAU TUALA LEPALÉ NIKO PALAMO: O le vaega lava lea i le finau fua i lau lauga, a o lea lava e manino le mea lea ou te avatua i le vaega lea aua o lea ua ou oo i le faasoasoaina o le seleni lea i le Evans. E le o i ai se agaga o lou manatu faapea e faatatope foi lea pe tufatufa. E leai o le uiga o lau lauga, ia faigofie, ia tagatagai i ai ina ia faafaigofie ona faamamaavega i le atunuu le faatinoina o le vaega lea. Ma e avatu ai foi ma lou faanoanoaga i le vaega lea, aua o lea e pei ona saunoa le Matagaluega o lea ua uma ona fai le lisi o e na afaina a latou faatoaga i le Evans, a o lea e le i oo atu i le matou itumalo suesuega ia pe faapefea. Aua pei ona silafia, o le vaega lena i totonu o le taulaga lea na afaina tele i le afa lea. A ou te tatalo atu, se i toe tagatagai ane pe le ono.... Aua e moni lava e nofo i le taulaga, ae i ai foi nai faatoaga i lena foi itumalo.

Ona ou oo mai ai lea i lea Pisinisi, Alamanuia ma Leipa. Ou te faafesili i le faatinoina o laisene foi nei e ave i pisinisi mai fafo, le auala lea e faatino ai le vaega lea i le faiga o le pemita ma le avega lea i o e sue ai le pemita nofomau mai le Immigration. E ala ona ou fesili, ona ua fai lava si toatele o le afaipisinisi mai Asia o lo o i totonu o le tatou atunuu. Na amata mai e le o se

faafitauli, a o le taimi lenei o le faafitauli. O lea faatoa ou laga lava lea i le vaega lenei. E mafua mai, e i ai le vaega lea sa faaigoa o le reserve list foi lea a tatou, o pisinisi ia e faatino lava e tagata Samoa. E le o toe i ai se mea faapena i totonu o Samoa i le taimi lenei. Aua a outou tagatagai i ai, toetiiti lava leai se faleoloa i fafo atu e le o faia e le vaega lenei. Ou te talosaga atu lava i le Matagaluega o Pisinisi, Alamanuia ma Leipa, se i tagai ane i le vaega lea, aua e ese le faigofie o le faiga o le laisene lea e fai ai le pisinisi ona o le tatou mananao i le tupe, ae i ai foi la le vaega lea e puipuia ai le tatou atunuu.

FOFOGA FETALAI: Tulai maia lau Afioga i le Minisita mo Pisinisi, Alamanuia ma Leipa.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, e lelei le avatu o se faamalamalama, aua e i ai mea o ituiga laisene, o le laisene foi lea e fai ai pisinisi. O le laisene lena o lea e nafa ma le Matagaluega o Tupe Maua. E i ai foi la le mea e tau o le foreign investment certificate, tusa o le certificate la lena o lea e agai mai ai le saunoaga a le sui usufono. O tulaga uma ia o lo o aiaia i lalo o le tatou Tulafono, ma e i ai aiaiga mo le tuuina atu o laisene nei. O lona uiga a faamalieina le Tulafono, ona faapena lea ona tuuina atu laisene i le aufaipisinisi ia. E i ai i latou o faipisinisi mai fafo, aua o latou nei mai fafo e talosaga i le mea o le foreign investment certificate. O le mafuaaga ona e i ai le reserve list lea sa taua e le sui usufono, e i ai ituiga pisinisi e le mafai ona faatino e i latou nei mai fafo. Ae a faamalieina lava tulaga o le Tulafono, ona faapena lea ona tuuina atu i ai certificates nei. Ma o tagata ia o lo o galulue ma faafaigaluega a latou tupe i Samoa, ua maea ona tuuina atu i ai certificates nei, ua faamalieina e latou aiaiga o le Tulafono. Ae le faapea la e le i ai ni tagata mai fafo sa faapena ona maua i lalo o le Tulafono lenei ma toe faafoi i fafo. E i ai foi i latou sa omai i Samoa ma sa agai foi i ai sailiiliga a le Matagaluega ma maua ai tulaga faaletonu po o ni tulaga foi nei ua le usitaia le Tulafono, sa faapena ona toe faaleaogaina latou laisene ma toe iu lava ina toe foi i fafo tagata na. A o le taimi nei o lo o mataituina pea e le Matagaluega pepa uma nei o pisinisi foi ma latou faipisinisi i Samoa o lo o mataituina lelei lava e le Matagaluega. A tulai mai ni faaletonu ona faapena lea ona gaoioi le Matagaluega e faamalosia le Tulafono ina ia faasao ai ni tulaga o ni mea sese e tulai mai.

FOFOGA FETALAI: Malo faafetai. Ua maea le taimi o le sui usufono. O lo o i ai lou avanoa i le iloiloga auiliili e faalautele ai lou finagalo ae faaiu mai le saunoaga.

Tofa AVEAU TUALA LEPALE NIKO PALAMO: Toe lua lava nai vaega ia lau Afioga i le Fofoga Fetalai, i le technology, i le mandate a le vaega lea o lo o faapea mai, mandate ma le mission, affordable, reliable and secure communication services. I le taimi lenei i le tau o le internet, e matua le affordable ina lava e tagata. Se i tagatagai ifo lava faamolemole, e le gata i le tau o le internet, o le tau o telefoni, ua matua taugata lava i le taimi lenei. O lea la se i tagai ane ina ia faatino ai le mandate lea e faasau i le vaega lea. Lau Afioga i le...

FOFOGA FETALAI: Ia, se i tulai mai lau Afioga i le Minisita mo Fesootaiga ma Faamatalaga Tekonolosi.

Afioga Hon Tuisugaletau Sofara Aveau (Minisita mo Fesootaiga ma Faamatalaga Tekonolosi): Lau Afioga i le Fofoga Fetalai, o faataatiaga na o le galuega e taulai i ai le galuega a le Matagaluega. E le sao le faamatalaga lea i telefoni, e taugofie atu telefoni i le taimi lenei nai lo le taimi sa i ai. O le affordable lena. O le vaega lea o le internet, e sao o lo o taugata, ae o lo o fai i ai ni galuega a le Matagaluega. Ia silafia foi, e leai ni tatou cables o i ai, i le fesootaiga lea i fafo atu ma le tatou atunuu. O lea e taumafai ina ia vaevae ni vaega a taugofie i lea mea ona tuu lea i ai, e faapena, po o le satellite po o le cable, ae leai se tatou cable o i ai e mafai ona tatou connect ai i fafo ona vave ai lea ona taugofie, ae o lo o galulue i ai le tatou Matagaluega, masalo e le o toe mamao ona faatino mai lea o se fuafuaga mo le agai i le lumanai. Faafetai.

FOFOGA FETALAI: Malo faafetai. Ia tulai maia le sui usufono mamalu e faaiu mai le saunoaga.

Tofa AVEAU TUALA LEPALE NIKO PALAMO: Faafetai lau Afioga i le Minisita. A o le i faaiuina lau lauga, e toe tasi lava le mataupu lea e fia talosaga atu ai i le Afioga i le Minisita mo Immigration i visa ia i Ausetalia na ou taua muamua foi lea e le mafai ona fai iinei. E le gata foi i lea, a o le tatou quota lea e faatino. Pe mafai ona tali manino mai i le quota lenei, ona e i ai lou talitonuga, sa saina le quota lenei talu le feagaiga foi lea o le citizen_a tatou lea na saina. O le quota la lea sa i ai le vaega faapea, e afe lava tagata Samoa e o i Niu Sila. E leai ni aiaiga foi nei faapea a leai ni ou pepa faigaluega, e leai ni mea faapena. A o le vaega lea ua i ai nei, ua tele tele aiaiga ua tuu i lalo o le quota lenei ua ala ai ona fai ifo na o le tai 400 tai 300 tagata ia ua mafai ona o i le vaega lea. A o le quota lea i lou iloa, na ala ona saina ina ia suia ai le feagaiga foi lea sa fai ina ia sitiseni ai tagata na fananau i le 1962. O lea la ou te talosaga atu ai, se i toe tagai ane i le vaega lea, pe aisea le mea ua ala ai ona fai le aiaiga lea, ae o lou talitonuga, e sei ifo loa lou igoa pe afai o le faiga lea ua fai, otometi loa lou sitiseni i lalo o le mea lea. Ia, e i ai nisi mataupu sa ou tau talosaga i le Samoa Land i le...

FOFOGA FETALAI: Tulai mail au Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se i fai atu lava si mea lea. O isi a tatou tagata na o i fafo, na o toe foi mai e leai ni galuega, sa o atu ona nonofo lea i aiga toe tutuli mai e isi aiga ua le iloa po o le a le mea o le a tausi ai. O lona uiga la e le i soona faia le tulaga lena, ae tatau ona i ai ni galuega e soifua ma ola ai, e pure common sense. E le faapea o le a o atu lava i o e leai ni galuega ona saga avatu lava lea e Niu Sila.

Lau Afioga i le Fofoga Fetalai, o tulaga faigata tele na, ma o so o se atunuu lava e faafeagai ma mea o tagata e leai ni galuega, e le mafai ona tuumamaina e se Malo, o le itu la lena ia faataua e ogatasi lava mea e lua o tagata o tatou Quota ma galuega e tatau ona maua, o lea foi e finau i ai e tele lava auala o lea e faaoga e lo tatou Malo, ae alu alu lava, o le mea lava lea e tuutaia ai, ia

o atu o tatou tagata e maua galuega e galulue ai ma soifua ai i le soifuaga e tatau ona soifua ai i atunuu e pei o Niu Sila ona o le tele, o mea o application o mea tau tupe aemaise o le faaaogaina o le fanau.

FOFOGA FETALAI: Ia e manatu ua malamalama lau mataupu mulimuli le sui usufono mo Faleata Sasae, ae faaiu maia le saunoaga.

Tofa AVEAU TUALA LEPALE NIKO PALAMO: Ia e ui lava e i ai ni nai mataupu ia e totoe ae leai e avatu le...e faamalulu atu foi i le paia ma le mamalu o le Maota Fono aemaise foi ia Afioga i Minisita, le faafogafogaaga foi a faaululuga o Matagaluega o lo o aafia i mataupu e pei ona laga, leai o le agaga lava ia ina ia tatou galulue faatasi aua le auaunaga i totonu o le tatou Malo aemaise nai o tatou tagata o lo o taumafai mai ina ia maua se ola lelei ma le fiafia i totonu o le tatou atunuu. Ae momoli lau faamalo i lau Afioga i le Fofoga Fetalai, ia manuia le Fono.

FOFOGA FETALAI: Malo faafetai, faafetai le saunoa faafetai foi le tulei mai e lagalaga o outou finagalo i tulaga e ala i le tatou Tala o le Tupe. O lo o i ai pea avanoa faalua e ala i le iloiloga auiliili pe a maua foi le avanoa e mafai ai ona faalautele ai lou finagalo i le mea tonu lea e te atugalu ai.

E manatu ua manino finagalo o le sui usufono mamalu sa faaalua ae faapea foi le taumafai a le Malo e talitali atu i le faaaliina o finagalo.

Ia ou te manatu o lea ua tatou tu lalata i le tatou taimi malolo i le itula e 1:00, ma ou te talitonu ai e tatau ona vavae foe mo lenei taimi ae saili le tatou faailiga malosi. E i ai le faamoemoe e tatou te toe faatasi iinei i le itula e 3:00 ia ona toe faaauau ai lea o le tatou galuega.

E faamanatu atu, o lo o i ai le faamalositino o lo o tapenaina pea le tatou lunch masani i tai i le tatou Tofilau, ia o ai lava e fia tali le sua, o lo o ua tapena lo tatou ofisa ma le tatou tunoa masani ia aua le taliga o la outou sua mo lenei afiafi, ae tatou toe taliu mai i le faaauauina o a tatou galuega i le itula e 3:00 i le afiafi a nanei.

Ou te faasilasila atu o le a faataatia ese Taulumaga a le Fono Aoa o Faitulafono seia aulia le itula e 3:00 i le afiafi nei lava.

Na faataatia ese Taulumaga a le Fono Aoa i le itula e 1:00 i le aoauli.

Na toe faaauau Taulumaga i le itula e 3:00 i le aoauli.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2013/2014 MA LE TULAFONO TAU FAAOFI O
LE FAATATAUINA O TUPE 2014/2015 – felafolafoaiga faaauau i luga
o le faitauga faalua**

Na toe faaauau felafolafoaiga.

FOFOGA FETALAI: Ou te faasilasila atu ua toe amataina nei Tualumaga a le Fono Aoaofa Fitolafono. O le tatou taimi ua ta tonu le itula e 3:00 i lenei afiafi, ia e manatu o lea ua tatou taunuu mai i le tatou taimi amata e ala i le tatou lafo faatu sa faatuina ona o le faaauauina o le tatou galuega. E momoli atu le agaga faafetai tele i le paia ma le mamalu o lo tatou Maota e tusa ai foi ma le faiga malologa sa tuana'i nei, e manatu sa feagai ai foi ma nisi o fonotaga aemaise foi o le taligasua ma nisi o mataupu taua sa mafai ona maua sa faatinoina i lenei lua, tolu itula na tatou malolo ai.

O le agaga ma le autu o le tatou lafo, ina ia maua pea le taimi taua mo sui usufono e saunoa ai, ae tatalo atu foi i le paia ma le mamalu e le tau aoaia e Laupua Tamafaiga i le tatou Maota, ia e manatu e le o se Tala o le Tupe muamua lenei o le tatou Palemene, ina ia alofagia lo tatou taimi, o lenei lava ou te tuu avanoa atu ona o le ava tele atu i tuleiga ma saunoaga, ae manaia le oto na o le lauava mu'amu'a, ina ia mafai ona manaia le faafofoga mai a le itumalo aemaise foi le taumafai atu a le Malo e talitali a outou tuleiga ma saunoaga.

E tatalo atu foi i le itu a le Malo i lau Afioga i le Palemia ma le Kapeneta, e talitonu o lo outou agaga, a i ai loa ni mea e fia faasao, faasao loa, ae ona o le agaga ina ia aua ne i tosoa le tatou Fono i ni mea e fia faamalamalama, ave pea le avanoa i Afioga i sui usufono se i saunoa e faamaumau pea e lo tatou Malo tulaga masani, se i vagana lava foi se mea tuga tele e tulai mai ai le Taitai o le Itu Agai ua faaletonu tele foi, ia ona manaia loa foi lea ona tulai mai le Taitai o le Malo e faamalamalama tulaga uma faapena, a o le agaga, o le ala foi lea o le taumafai o le tulai mai o le Taitai o le Itu Agai, ia pe a tulai mai foi le Kapeneta i nisi o taimi. A o le auga atoa o lo tatou faamoemoe, ia malamalama ma manino, pei o le uluai saunoaga o lenei aso i le Faasaleleaga Nu. 2, ia e talitonu e sau lava le fuauli ma le fuamoa e toa le moa. Ia o lenei lava aso ma le faamoemoe o le tatalo atu lena a le Fofoga Fetalai i nisi foi o sui usufono mamalu e le i saunoa, ia e lelei lava le vave faatea semeamanu e le i oo i le tulaga foi o le faaaaogagase ma le tulaga o le lē maua o le malosi, ia ona faapena foi lea ona tatou maua ai se Fonotaga fiafia ma le tauleleia.

E faia le tatou malologa ua.....

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Ia se i saunoa mai le.....

Afioga Hon Palusalua Faapo II: Leai na ou tau laga le mataupu lea, e le o se mataupu fou i a tatou felafolafoaiga ona o le faauilavea o Afioga i Minisita o le Kapeneta, aua o le mea tonu lava lea e ala ai ona umi a tatou Fonotaga, o lo o manino lava, e i ai le taimi e saunoa e tali ai, a o le tulaga lea e i ai, na o sina mataupu lava, tu i luga, tu i luga, tu i luga ia ma toso ai lava. Na ona fesoasoani atu i lau galuega, faafetai mo lau fautuaga.

FOFOGA FETALAI: O lea ua ou maua o le ala foi lea lau Afioga i le Taitai o le Itu Agai, e leai se agaga e faapea o le manatu o le Malo e faalavelave i lauga a sui usufono, ae pei ona o le tulaga o lea sa tatou i ai foi ma lenei vaiata, a i ai loa ni tulaga e tatau ona faasao i le tulaga ina manino ma...o lea foi ua e faafofoga mai ua ave lau fautuaga i le Malo, ia e fua agai foi i ai tulaga o le faamoemoe o le tatou felafolafoaiga, a o le agaga lava ia

e le mafai ona tuuaunoaina ni mea e tatau ona faasao leaga e toe faasao ifo foi i se isi taimi ua mamao i sisifo le tualumaga o le tatou Fono, a o lea ua logona, lafo lea i le Malo o le tulaga lena o le tatalo atu.

Ia e faia le tatou malologa ua faaiuiu ua maea le saunoaga a le sui usufono mo Faleata Sasae, ua avanoa lo tatou Maota mo se isi sui usufono e fia saunoa.

Ia tulai maia se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi, tulai mai le sui usufono mamalu.

Afioga Hon LEAUPEPE TOLEAFOA APULU FAAFISI: Malo faafetai mo le avanoa i lau Afioga i le Fofoga Fetalai, e tulai atu e fai foi se sao e tusa ai o lenei avanoa taua ua mafai ona maua i le Tala Faatatau Autu o le Tupe 2014/2015.

Ae muamua ona faatalofa atu i le tapuaiga a Lana Afioga Mamalu, O Le Ao o le Malo e faapea foi le Sui Usufono o le Fono a Sui Tofia, aemaise o tupu ma ee o le atunuu, o Aiga o Tupu, Aiga o Nofo ma Aiga o Papa, o Tama ma Aiga, o Aiga foi ma Tama, ia faapea foi le Usoga a Tumua ma Pule. E faapea foi ona faatalofa atu i Taitai o Ekalesia e fia ma le Aufaigaluega tofofi a le Atua, aemaise foi le faatalofa atu isi ou itumalo o Fasitoouta ma Faleasiu, ia tapuai maia ma se manuia, e manuia faiva o le auauna ona o le tapuaiga paia o Aiga e faapea foi le Falefitu ma le tofa i le Igoamatua e faapea foi lea itu o le po see aua lo tatou itumalo, Aiga e tolu e faapea foi le Faletolu ma Fuaifale. E faatalofa atu foi i le Aufaigaluega paia a le Atua aua lo tatou itumalo.

E avea lenei avanoa e momoli atu ai le faamalo ma le agaga faafetai i lau Afioga i le Taitai o le Malo lau Afioga i le Palemia aua le faatautaiga o le sa o Samoa, e le faigofie lo outou faiva alofilima, e tele galuega lelei ma le atinaeina o le atunuu, ia ua faapena ona maitauina i lenei vaitau e le tau laeiiia i se faamatalaga lo outou faiva alofilima, ae iloa lava i le tau i le masani ona sau mai i lo matou itumalo i Apia nei i le 20 minute, peitai o lenei taimi ua toetiiti lava itula ona o le pisi o le traffic i luga o le auala, ia tasi lea vaega o le tamaoiaiga ua mafai ona maitauina, o le tele o aiga ua tailua, taitolu taavale, ia ona o le suiga pei ona sa alofaiva i ai le Malo.

E tulai atu foi ma le agaga faaloalo e faalia le fia faamauina o le talia ma le agaga fiafia ma le agaga faafetai ma le faamalo o le Tala o le Tupe pei ona saunia e le Afioga i le Minisita o Tupe po o le Afioga foi i le Palemia. Ae faafetai atu foi i fuafuaga fai mo lou itumalo, e tele ma anoanoai ia galuega lelei ua faia e le Malo, e momoli atu le agaga faamalo ma le agaga faafetai, ae o lena ua maea foi ona tatou feiloai e le tau tuu ina laugaina atu i nei i le Maota Fono, ua maea ona faafeiloai atu i lau Afioga i le Minisita mo Galuega, Felauaiga ma Atinae Eseeese, e ala i tusi ma le feiloai atu i lau Afioga aua lava mea o lo o fia faaleleia e i ai le vaitaumafa e faapea foi le faaleleia o auala. O mea nei o auala e tai pei lava o le mea nei o le fale ia lelei ona vaai, po o le a lava se fale lelei ae a le lelei ona vaai ma tausi, ia e toe foi lava i le malepelepe ma le leaga. E ui i lea, ia leaga e anoanoai faiva, e le masino, e tau ma se toa i lau Afioga ma le Matagaluega. Ae na o se faamanatu, e lelei ona faatino ma faalelei ia ona vaavaai lea ma tausi, ia e lava faasoa ai foi le taimi e le gata i le taimi, a o tupe foi e toe faaleleia ai ia le tulaga o nei atinae taugata o le atunuu, aua e manatu, o le fua vaai o le lelei o le faatinoga ma le aoga o le faatinoga o nei atinae a le atunuu e ala i faiva

alofilima o le Malo i nuu ma afioaga, ia ailoga o toe i ai se nuu o toe mativa i le laueleele e ala i faaeleeleaga e i ai le talo, fai ma mea faapena, aua ua faigofie lava ona malaga i uta le loomatua ma le toeaina ia ma galulue ai ma le fanau, ae mafua mai i luga o le lelei o auala. O le mea la lea e momoli atu ai le agaga faafetai ma le agaga faamalo.

E fia molimauina e lou sui usufono i le tulaga o le tamaoaiga o le atunuu ua i ai i lenei vaitaimi ua siitia mai luga o nisi o mafuaaga na ua ou taua, e siitia i le tulaga tau tagata tafafao maimoa mai fafo, e siitia i le tele o alaga-oa ua mafai ona maua e ia aiga taitasi, e le tutusa ai aiga, ae o le tele o aiga i lou lea talitonuga ma le vaavaai atu i ai, ua siitia lo latou tamaoaiga. Atonu o le uiga o lea manatu ua faaopoopoina a latou alaga-tupe maua, o le mafuaaga lea ua mafua ai ona pei ua faatuatuanai le popo. E maitauina ma le agaga fiafia le laga e le tele o nisi o sui usufono le taua ai le popo. Ua faafuasei ona sa leai se manatu ia te au e taofia le tatou fale suauu foi lenei e feagai ma se tasi o tamalii o le atunuu, ae pei o ananafi i le matou fono sa fai i le Tanoa sa maua ai le tulaga lea, le fono foi lenei a le aufaipopo tuufaatasi. O le tasi lea itu o lea ua maitauina ua le manatu ai le tele o nisi o aiga i le tufiina ma le faaputuina o le popo e soifua ma ola ai, ona leaga ua i ai isi a latou alaga-tupe maua, ua manatu lava la i le vaega foi lele ia faigofie ona maua ai le tupe, aua o le tele o nai isi aiga e fai pisinisi, ia e le gata i pisinisi lapopoa, feoloolo, sosoo atu i ai, e oo lava i le sui ula o ulafala ma le faatau i le maketi, o le tasi lena vaega e tau o le pisinisi, ia ma le faatau niu i le auala o le pisinisi ma le faatau popo o le pisinisi, po o le faatau ipu koko e \$1 i le ipu koko Samoa, o le tasi foi lena pisinisi. Ua soifua popoto ma atamamai le atunuu e saili ia nisi auala e ese mai i faatoaga e atinae ai lo latou tamaoaiga ma tausai ai lo latou soifua i aso taitasi, e le gata i lea, ua faalagolago i galuega i le galulue soosootauau ma le faipaaga a le Malo ma le aufaipisinisi taitoatasi po o le autumaoti, ia tasi lea itu e lagona ai le agaga faafetai. E pau o le mea e fautua atu i le Malo, ia se i faauouo lelei nai le aufaipisinisi aua o latou ia o lo o faapena ona fesoasoani mai i le atinaeina o le tamaoaiga o le atunuu e ala i le latou faafaigaluegaina o le mamalu o le atunuu. O nisi o aiga ua faalagolago i ina ua faigaluega i le Yazaki o fea lava, alo ma fanau ua faapena, o nisi ua faamoemoe lo latou tamaoaiga ma le latou tupe maua mai fanau ma aiga o lo o i atunuu e mamao i le latou foi alolofa faifaipea i lea aso ma lea aso, o nisi o aiga ua faalagolago i faigafaiva, e faapena foi nisi o aiga i le faatoaga o fualaaui aina, talo, fai ma le esi. E faigofie ona maitau i ai i le malaga atu i sasae i sisifo i sisifo i sasae, o le vaaiga lea ma le agaga fiafia.

O nisi foi o le soifuaga ua i ai tatou ua faalagolago i le soifua i le aganuu. O le a le aganuu? Ua soifua i le maliu ioe, o le a le faalavelave tulou, ne i sala le gagana i le faafofoga tapuai mai a Samoa, ia e tupu mai lava le isi maliu toe alu i ai ma le siusiu launiu, e lei uma lava ona faasoa pusaapa ma le tupe na maua mai foi i le isi maliu. O uiga ia o le soifuaga, ioe, ae le gata i lea, e toe fai foi ni saofai i le isi lua vaiaso e le i uma lava ona faasoa le lafo lea sa maua mai foi i le faiga o isi saofai, aua e le na o lo ta nuu e ta te alu i ai i saofai, leai o le aganuu, a uma le saofai i lo ta nuu o ta alu i le saofai i le isi foi nuu ma le isi nuu ma le isi nuu, ioe. O uiga na ma le aganuu e le maua e se isi atunuu o le lalolagi le aganuu lenei a tatou, ioe, o le taumafa fua i le fale o le isi, ia o le isi aganuu lea tatou te i ai o le totoma, o le totoma, a leai sau lalaga e te totoma, ioe, e totoma nei e le toe faafoia toe totoma taeao o le mea lava e tasi. O le isi aganuu o le aitalafu le totogia, sau nei aitalafu ia e le

totogia, ia toe sau foi i lea vaiaso ua uma lo ta ita, ia toe aitalafu foi toe le totogia, ioe, o uiga ia o le aganuu. O le ala e mafua ai ona ou fai atu au, ua tele, tele auala ua mafai ona soifua ai le aiga ma siitia ai le tamaoaiga lea, ae faatuatunai le popo. O le mea lea e tupu nei i le aufaifaatoaga, o lo o mafatia le aufaifaatoaga, aisea? Mafatia le aufaifaatoaga mafatia le aufaipisinisi. O le mea muamua, e mafatia le aufaipisinisi ua faatupuina le mea lenei o le lē faamaoni o le lima tagovale, ioe po o le gaioi, i sala le gagana, tulou Samoa i lau faafofoga. Ia e mafai ona faamatalatala, aua o le isi teine ma le isi tama, se na o le alofa i ai, ae mafua mai lena amio i matua, e mafua mai i matua, e tiga lava ona iloa e matua e na o le \$200 le totogi o le tama po o le teine, a o mea la ua faalau i ai ua \$3,000, ia e sau ma oe i lea vaiaso. O ia ua amata le faaososoga i le afafine ma le atalii, ae talofa o le agaga usitai o le fanau, ae afua mai ia ai? E afua mai i matua, ioe. Ua ou manatu, o se fofo o le faafitauli, aua po o le a lava le tamaoaiga, i o i le atu Asia, ua o e saili le tamaoaiga, sue atu, a le maua le filemu e maumau lo latou taimi. E faapena foi i Samoa, po o le a le tatou atinae e oo i fea, a le filemu Samoa i le amio lea ua tulai mai, o le a? O le gaioi, talepe fale ma isi ana aga. A tatou le fofoina faatasi la le atiaaina o Samoa ma ona faafitauli na, ailoga e i ai se tagata tafao maimoa mai e fia sau ia tatou? E pei o manatu ia e fautua ai le Malo, e leai, o lena ua i ina le tofa, ae o se manatu e fautua ai, ia silasila uma i itu e lua.

O le manatu faa-sui usufono, semeamanu o alo atu i le tatou faiga palota, o le manatu foi lenei sa taumafai e faaofi i totonu o le Matagaluega, ina ia mafai ona avea ma se tasi o vaega o le tiute o le aufai palota le faia o fingerprints a le au resitala. O lea ua faamalositia le resitala, ua tataua ona fai faatasi ma le finger prints ina ia... a o a mea tutupu ae galulue faatasi ma le Matagaluega o Leoleo e faigofie ona maua ai ma fofo le faafitauli. Aisea? Leaga o le mea foi lea e fai e le Matagaluega o Leoleo, seiloga lava o latou ia na molia muamua ona maua ai lea o finger prints. Ae a faapefea la pe a fou le tagata e faatinoa le solitulafono? E le maua, vagana lava ua aumai ua masalomia o ia tonu lea ona faatoa maua lea. A o le manatu lena e taulagalaga, pe sao pe lelei pe sese, na ona faataatia i tafatafafuga pe tau ane ai pe leai, ina ia mafai ona maua le galulue soosootauau lea, ma maua atoa ai le atunuu. Aua e le tu ma salalau, masalo na o le 120,000 lea e totoe, 180 pe na o sina 150 e fai ni fingerprints. Ia, a lena e galulue faatasi ma le system a leoleo la e i ai ina ia faigofie ona maua ina ia fai se solution o le faafitauli lea o le a tulai mai, e maumau ai le tauvalea o le igoa mamalu o Samoa mo le avatu i fafo.

O le oi lea e oi ai le aufaifaatoaga, e le o faifaatoaga uma, ae oi faapea maumau e pe ana lava ni maketi i fafo. I lau maitau, ou te le o manino pen a mafua i se a ona toe tuu le maketi lea sa fai e le WESTEC po o le Matagaluega o Faatoaga. Afai na tuu i lena vaitaimi ona ua le lelei, i lena vaitaimi ua fia sefulu nei tausaga. Ae pei e lelei pe a toe asiasi i ai se finagalo o le Malo ma le Matagaluega pe toe fai se isi a tatou faleoloa i Otara i le mea sa fai muamua ai lena maketi. E ala ona ou taua le Matagaluega o Faatoaga, leaga o latou na o lea e vaaia ia maua le quality o le talo. O le talo lea e ave nei ua ou maua le tala o lea e faaoga i ai le Matagaluega o Faatoaga latou te vaaia. Afai la e ave i se isi Matagaluega po o se isi Faalapotopotoga latou te faia le tulaga lea, e le mafai lava ona maua le quality lea e manao ai. Ae afai e mafai ona tatou toe oo i le mea lena o le toe tuu o le avanoa i le Matagaluega

o Faatoaga latou te toe faia ai se maketi i se mea aupito sili ona toatele ai ni Samoa i Niu Sila ina ia mafai ona ave i ai a tatou talo ma tatou fai, aua e le mafai ona tauva ma Fiti, leaga e avatu le talo Fiti, o le isi Initia lea e totoina i Fiti, ona avatu foi lea i le uso o le Initia lea e totoina le talo i Fiti, ona ave lea i ai o le faamuamua a le Initia lena, leaga o lona brother, o lona uso. Ae avatu le talo a tatou, e tiga lava ona lelei, ae tuu se i expire se i leaga. Ia ona tuu ifo loa lea i luga i o, sau le tali, ua le aoga le talo a Samoa. Ae sili atu le lelei o le talo a Samoa. O lea la e manatu ai, ua tataua ona toe liliu i se isi itu. A le o lena foi, vaai le aufaipisinisi e feoloolo seleni lea e i ai, tuu i ai e le Malo se faatosina, se aua le tauva na o Samoa ae tauva agai i fafo i le mea e lau i ai tatou talo. Ioe. Ona alu atu lea o le talo o le popo, o le fai, o le esi, o lea foi ua talia le ava ia, toe alu i ai ma le tatou ava. E a, e le lelei lena fuafuaga? Ia na o ni manatu e faatupu manatu i le Malo ina ia mafai ona tatou toe foi i le tulaga lea, aua e ui lava ina pei ona ou fai atu e faale o mamafa ma faatauaina e nisi o aiga le popo i lenei vaitau ona ua faatupulaia foi nisi a latou alagaoa la e ua maua, ia, ae se i avatu i ai le tatou popo o le a maumau ona le faaogaina.

Ia, ua ou manatu ua lava ia fautuaga ma ua lava foi lea sao mo le Malo, pe tau ane ai pe leai, o manatu faa-sui usufono, ae matua talia ma le fiafia e lenei itumalo le Tala Autu o le Tupe, ma e i ai le manatu e faamanuia atu i a outou Afioga i le alofaiva o le Aiga Kapeneta, e faapea foi le Palemia ma lau Afioga i le Sui Palemia. Ia manuia foi le Taitai o le Itu Agai ma sui usufono mamalu o lea Itu, e faamanatu atu, ou te le lavea i le Itu lea. Faamolemole a toe saunoa a outou Afioga i Minisita, tusi pea outou aao i le Itu lea, ae aua le pei a lavea atu ai ma au ma le sui usufono mo Siumu. Ia manuia le Fono. Faafetai.

FOFOGA FETALAI: Malo saunoa i se tasi o sui usufono mo Aana Alofi Nu.1, Afioga Leaupepe Toleafoa Apulu Faafisi. Ou te talitonu ua matagofie tiuga ma saunoaga o lenei afiafi. Malo timai faafetai fautua mo le tatou Malo.

Ia o se isi sui usufono e fia saunoa? O lea ua tulai mai le sui usufono mo Samoa Aoa. Tulai mai le sui usufono mo le Palota Taitoatasi ua avanoa le Maota mo lau saunoaga.

Afioga MAUALAIVAO PAT AH HIM: Faafetai i lau Afioga i le Fofoga Fetalai mo le avanoa. Ou te tulai atu ma le faaaloalo tele e tataua ai, e faatalofa atu foi i le paia o le tatou Palemene nei i le Afioga i le Palemia faapea foi le Kapeneta, aemaise foi le Taitai o le Itu Agai faapea foi lena Itu, e faapea foi le mamalu i sui usufono o le Palemene. E faapea foi le tapuaiga i le tatou atunuu i le afio o Lana Afioga Mamalu O Le Ao o le Malo, le Sui o le Fono a Sui Tofia, tainane foi tupu ma tamalii faapea foi taitai o Ekalesia i fatafaitaulaga e fia. Faamalo tapuai mai i si o tatou atunuu pele, aemaise foi o lou itumalo o le Au Palota Taitoatasi. E ui lava ina outou faafofoga mai o fulifuli faalaaui mamafa e uiga i le tatou itumalo, ae faapea foi lenei foi itula i felafolafoaiga a le Palemene. E ui i lea, ia tapuai mai se i fai se tatou sao e uiga i le atiaaina o le tatou Malo.

Ma e faafetai atu i lau Afioga i le Fofoga Fetalai ua mafai ona maua lou avanoa i lenei itula, ma ou te talitonu e mafai ona ou faapea atu i le tatou Maota nei i lau Afioga i le Minisita o Galuega, faamalo onosai. E tele luitau faapea foi manaoga ua matou faalogologo atu i ai ua vavao ai ma taumafai sui usufono uma o itumalo ina ia galueaiina o latou auala galue. E moni lava.

Malo le faatoatoa ma le taufaasoasoa. Ou te talitonu o nei auala uma e aoga uma ia Samoa, po o fea lava e i ai le auala, po o Falealupo po o Falealili, e faapena lava le feoaiga o si o tatou atunuu aemaise foi o tagata tafafao maimoa mai fafo, e faapena ona latou faaaogaina nei auala. Ae ou te talitonu lava o le matou faalogologo ma le totoa, ia, pei o lea lava e tau soso atu pea, pei a galo le matou itumalo le Au Palota Taitoatasi i le faasoa. E ui i lea, e tatalo atu ma le faaaloalo i lau Afioga i le Minisita, o lo o i ina lava le faimea, e talitonu o lo o e silafia lava lagona ma talosaga e faaoo atu. O auala foi o lo o i nai nuu nei e faigata le feoi o lo o fia faaleleia auala, e pei foi o tagata, le mamalu o le atunuu o lo o afifio ai, e pei foi o le alu atu i i Lalovaea e agai i Moamoa po o Palisi foi. O lena auala e aupito sili ona faigata le uia, ia silasila i ai lau Afioga i le Minisita faapea foi le agai atu i Moamoa. O le auala i Sinamoga i tafatafa o le alalaupapa sima lena e i ai, ua faapena foi ona leva ona i ai le talosaga i le faigata. O lo o i ai foi nai atinae tau tagata tafafao maimoa mai i ina. Ua leva ona e saunoa mai e aua le popole e faamuamua, o lea lava e tapuai lava e le tagisa lenei itumalo. E faapena foi nisi auala o lo o i Aleisa, e faapena foi nisi o vaega i le alu agai i tai i Lepea i auala ia i Pesega agai i tai. Ou te talosaga atu ai ma le faaaloalo, se i silasila ane i ai ma le faaaloalo. Faafetai foi i le tele o galuega lelei ua faatino e lau Afioga, e tusa ai foi ma nisi auala sa matou molimauina ma matou vaai i ai, faamalo faafetai. O auala galue uma lava nei o lo o fesoasoani i le tatou aufaifaatoaga, o le poutu lea o le atunuu ma le Malo. O le auala lea ou te talitonu lea sa galo ia te au, e ui i lea o le a ou toe soso mai ai i se taimi ona ua tele le mau auala ua le iloa le mea a fai. Ae ui i lea, faamalo faafetai. Masalo o lena e sialfia e lau Afioga....

FOFOGA FETALAI: E le o Vaitoloa le sui usufono mamalu?

Afioga MAUALAIVAO PAT AH HIM: O le auala lea i Vaitoloa ma le auala lea i Tiavi ua uma foi ona matou talosaga atu o lo o i ai foi nisi atinae tau tagata tafafao maimoa mai, e pei o le auala lea e i ai le one tree hill. O mea na o lena e silafia e lau Afioga, mea sili o lea e faafofoga mai le atunuu o lo o taumafai atu le sui usufono e faamatala atu i lau Afioga.

FOFOGA FETALAI: Malie le sui usufono mamalu se i tuu atu le avanoa i le faauilavea a le sui usufono mo Saleaula.

Tofa Levaopolo Talatonu: Lau Afioga i le Fofoga Fetalai, na o se mea lava lea e fia faamanatu atu i le Afioga i le sui usufono mamalu o Samoa, o lea ua matou faalogologo atu matou i Salafai, pei o lea e agai tonu lava na o Tumua nei ae o le o i ai lava sana talosaga mo Savaii, aua o ia o le sui usufono mo Samoa.

Afioga MAUALAIVAO PAT AH HIM: Faafetai lava mo le faauilavea. Ou te talitonu lava o lea sa ou fai atu, o auala uma lava nei e faatino e le tatou Malo mo Upolu ma Savaii, e aoga mo tagata uma. Po o Falealupo po o fea e i ai le auala, e aoga mo tagata uma. Aua foi e feoi le atunuu ma faapena ona maua ai le tamaoiga.

Ma ou te talitonu o lenei itula, ou te fia soso atu i le mataupu lava lea sa laga e le Afioga i le Minisita Lagolago i ou autafa nei, ou te talitonu o se mea taua

tele, se i silasila ifo i ai le tatou Malo e uiga i le LTA faapea foi le Matagaluega o Leoleo. O se fautuaga, a faapea o se... ina ia maoti ma maioio lelei le galuega a i latou nei, e le avanea le Tulafono e toe talepe ai lava nei Matagaluega e lua i le feteenai, ioe, a o lea e faafioai le atunuu i luga o aualatetele mo le saogalemu. A faapea ua le lelei le LTA, tapuni le LTA ia, aua o lea tatou te faataitai nei i le mea fou lea a le LTA, e i ai la le manatu, tuu atoa le galuega i le LTA i le fesoasoani atili i le Matagaluega o Leoleo e faatonutonu ai. Ave ia latou le traffic offences ae tuu i le Ofisa o Leoleo le vaega lea o le criminal, ina ia maioio lelei aua ai ne i maua le mea tonu lea e atugalua i ai sui usufono ona o tatou lava e faia le faaiuga lea. Ia tatou faia Tulafono ina ia maua ai le matagofie, le saogalemu, le fealofani ma le galulue faatasi o Matagaluega. E faapea foi ona matou soso atu i le LTA ona o lo o i ai foi faafitauli i luga o le auala aemaise pe a pogisa le auala. Se i silasila pe faapefea ona faatonutonu moli o taavale i le po ona ua toetoe ina lavevea ona o le malolosi o moli o isi taavale. E pei ua sui e isi moli o a latou taavale, e te fiu lava e tuu i lalo, tuu i luga, tuu i lalo a o le mea lava e tasi. E matua malama atoa e le mafai e mata ona tatali le malamalama o lo o susulu mai i se taavale lua te fetau, aemaise foi la o laina ia i le auala e fesoasoani i le feoi i le po pe a faapea e louloua le tau i timuga ma tulaga faapena. O le tele o faafitauli i mea e tutupu i luga o le aualatele, o le lē respect, o le lē amanaia po o le lē malamalama po o le lē fia malamalama foi o avetaavale e tusa ai ma ia faailoilo. E tai pei o laina e tatau ona tu ai le taavale ae se i faaalu atu le isi taavale, ae faataumatatao lava avetaavale ona o le lē malamalama faapea po o a nei faailoilo.

O nai fesoasoani na i le Matagaluega lea ona o outou e nafa ma le saogalemu o le atunuu i luga o auala tetele o le tatou atunuu.

Ou te talitonu i le Ofisa o Leoleo ma Falepuipui lau Afioga i le Minisita e auala atu i lau Afioga i le Fofoga Fetalai, faamalo faafetai o lea ua maioio ma mavaevae le Ofisa o Leoleo faapea le Pule o le Falepuipui ma pagota i uta i Tafaigata. Ou te talitonu ua i ai foi nisi o tamalii ma auauna o leoleo i falepuipui ua afaina lo latou faamaoni ona ua faapena ona mili faatasi ma militino faatasi ma e o lo o tuli o latou faasalaga i Tafaigata e aoao ma faatonutonu ai a latou amio. Ou te talitonu la, e ao lava ona silasila totoa i ai pe faapefea ona malu ia vaega, aua o le matou vaai e peiseai o lo o faapena lava ona nofomau ai aiga o nei auauna i uta i Tafaigata ma maua ai le mafutaga, ae lamatia ai aiga ma fanau, aemaise o taitoalua ma oo ai lava ina soli le tulafono ma oo atu ai i ni tulaga e le tatau ona oo i ai, ona o le tatou le puipui i lo latou siosiomaga. O se tulaga lea e tatalo atu ai i lau Afioga i le Minisita, se i silasila ane ina ia malupuipuia nei vaega uma, ae faafetai o lea ua tino mai le faamoemoe e pei ona taumafai i ai.

E le tele se tala i lau Afioga i le Minisita mo Faatoaga ma Faigafaiva, faamalo faafetai. O le tele o sui usufono e moni o lea ua saunoa i faatoaga, talofa e i le aufaifaatoaga. O le taimi lenei i le talo, e moni lava le upu ua pala le talo. O le manaia ia i le faalogologo, ae talofa e, ua tatou fiu lava e faatau le talo i le tau taugofie e le uma talo a le aufaifaatoaga, ae ou te talitonu foi e moomia e le aufaifaatoaga ni maketi. Ia onosai lau Afioga i le Minisita o lea ou te talitonu ua ou faalogologo i lau finau lea e te finau ai nei, e leai, e te finau oti lava ia maua se faamama avega mo le aufaifaatoaga. Ou te tatalo atu ina ia maua ni avanoa tutusa e tai pei o nei grants ma nei faamanuiaga e maua mai i atunuu malolosi i fafo. E talosaga atu a faapea o lo o i ai ni faigata, ia

maua avanoa tutusa, ia tutusa avanoa e maua e le vaivai faapena foi le ua feoloolo. Ou te tatalo atu, e moomia e le aufaifaatoaga ni maketi, aua aisea? E moomia se tupe fou e agai mai i totonu o le tatou atunuu e fesoasoani i le taaviliga o seleni e maua ai tupe a le atunuu, aua ou te talitonu o le development i le taimi lenei, e le oge Samoa. O le ala foi lea ua siitia ai lo tatou tulaga mai le tulaga vaivai i atunuu e malolosi tamaoaiga, aisea? O le aufaifaatoaga. E a nei pe a faapea e leai ni faifaatoaga pe ua vaivai le aufaifaatoaga? O fea a tatou tua i ai? Ia o lena, e leai se isi e tali mai aua o lea ua outou talitonu o lena tonu lava.

Lau Afioga i le Minisita e leai, na o fautuaga lava e tuuina atu ae alofagia e faamalolosi lau Afioga ma le Matagaluega ina ia maua ni maketi. E le faigofie ona ua leva ona tuu le tatou talo ua leai se faamoemoe, a o lea ua toe lalaga. O lea ua toe siitia le tulaga o le tatou tamaoaiga, ae lafo atu pea le avega. O lo o ia te outou lava le faamoemoe o le atunuu aemaise o le aufaifaatoaga. O latou foi nei e matua iloa lava faasoa. Po o le a le tau talo e \$10, a faasoa e le faifaatoaga le \$10 e pei lava o le paketi e \$5miliona la e faasoa e le faifaatoaga. O i ina tatou te iloa ai, o le aufaifaatoaga o lo o mausali lo latou faamoemoe e maua ai le tele o taumafa mo le atunuu. O fautuaga na ma se tuualalo i lau Afioga i le Minisita mo Faatoaga ma Faigafaiva.

Ou te talitonu e mulimuli ae se i ou oo atu i le Minisita mo le Pulega o Tagata Asiasi Maimoa Mai Fafo po o lau Afioga i le Palemia. Ou te faamalo atu ma ou faafetai atu. E i ai le atinae e sili ona taua lea, o tagata tafafao maimoa mai fafo, ioe. E tele tagata ua faitio i le matafaga lea o lo o tau fau nei i Apia, ioe. A o lau fautuaga, onosai lo tatou faitio, se i fai pea, fai pea, aua a fai atu lava e mafai e le Malo ona faatonutonu ae taunuu ma se i sau mai lava i Matautu e tau i Mulinuu, a taunuu le tagata asiasi maimoa mai fafo i inei, e muamua lava...e ala ona omai tagata asiasi maimoa mai fafo mai Europa, Saina ma Asia, e fia o i matafaga, e le o mamao la e saili ni matafaga i nuu i tua, e mulimuli, e tau mai i Apia, o, o se taulaga e sili ona matagofie. O le mea lea ou te lagolagoina ai ma ou te faamalosia atu i lau Afioga i le Minisita mo le Pulega o Tagata Asiasi Maimoa Mai Fafo. O ou mama na, ou te talitonu e te mafai lava ona e sailia se fia miliona aua e le taugofie, ioe, a o lea ua tau amata atu le galuega a o lea ua faavaatua ona o le faitio ma le...e leai se mea e leaga ai le faitio. Ou te lagona e au o le faitio, o se faamalosia lena, a faapefea ona le...e faitio loa e toe atili ai ona e toe liliu ma tapue ma faaleleia, ioe. O le faitio e te i ai lava ua faapea, oi, e sao la, e sili ona faalelei le itu lea. O le agaga lena, o le ala lea ou te fai atu ai, o le Taulaga mo Samoa e le o se taulaga na o ni tagata toaitiiti, o le taulaga mo Samoa uma lava. E tasi le taulaga i le taimi lenei tatou te mitamita ai, tatou fau lea mataaga mo tagata asiasi maimoa mai fafo ina ia mafai ai ona faatosina mai, ioe. Ia tatou pei o foliga o atunuu la e i fafo ina ia mafai ona faaleleia ma ma faamatagofie. Ua ova i le 50 tausaga ua tataua ona tatou sui foliga o lo tatou taulaga ina ia mafai ona faatosina mai pea tagata asiasi maimoa mai fafo – ma ou te talitonu foi e manaia o lea ua faasolosolo lava ina ia manaia le silasila i le galuega o lo o fai.

O lea foi ua matou faalogo o le a faamauina taifau, tulou o le upu e to ia te au. O i ina o le amataga lea o le faaitiitia ma le faauma ai o lea mea o le tuliloo o tagata asiasi maimoa mai fafo e taifau le laisenea, aua e laisene loa le taifau, iloa loa ua aoaoina le taifau lea e iloa le tagata e ana le taifau ma foia

ai le faafitauli lea aua lava le saogalemu o tagata aua o lea foi manu e naunau foi i ai lo tatou atunuu.

Ou te talitonu o le isi mea ou te fia soso atu ai i le Afioga i le Minisita mo le Pulega o Tagata Asiasi Maimoa Mai Fafo, o le manaia faafetai o lea ua ou faalogo ua toetoe lava ina atoa pulu fagota mo se fale'ia i Samoa. A maua ai la ni galuega aua o le mea taua lea a maua ai ni galuega se afe pe luaafe, oi, o ai se a le fiafia, ae pau lava le fautuaga e tuualalo atu ai i lau Afioga i le Palemia, silasila ane pe talafeagai ona faatu i Apia, pe talafeagai ona faatu i Falealili, Falealupo po o fea lava, ae ia maua ai ni galuega. O lea matou te talitonu o lo o taumafai, ina ia siitia pea le tulaga o Samoa. E tasi lea mea e maua ai galuega, o le mea e maua ai galuega e ao ona tatou faia, ioe, ae pei e faapea nisi o le aufaipisinisi, o le aufaifaatoaga, ioe. O le aufaipisinisi, faafetai o lo o maua ai galuega ae e le o lava galuega, e le o lava galuega e maua e le aufaipisinisi, ae o lo o mafai ona galulue faatasi ma lo tatou atunuu. O nai fautuaga na mo tagata asiasi maimoa mai fafo.

O nisi mea ua maea foi ona saunoa i ai nisi o sui usufono e tai pei o le malae vaalele ua faaleleia, e manaia. O le malae vaalele ua manaia le mea la e i ai, ioe. Sa ou ita foi i ai i masini fou nei i le alu atu tau alu fai le pepa e paka ai, ou vaai atu e \$5 i le aso, a, o se mea manaia tele lo ta alu atu ua paka i le auala tele ua le fia o i totonu i le \$5 lava lenei, ae ona o le lē malamalama na faapea ai e \$5 i le itula, ae leai. Ia malamalama lelei ma manino e \$5 i le aso. Faamalo faafetai i mea lelei ia e omai tagata mai fafo ma tau mai i ai ma faapea, a, o Samoa e le o toe...e le o Samoa lea latou te mafaufaaina, o Samoa e ese Samoa, o Samoa fou.

Ona tau faaiu atu ai lea o sa matou tala i le Minisita mo Faamasinoga ma Pulega Tau Faamasinoga.

Tofa Aveau Tuala Lepale Niko Palamo: Lau Afioga i le Fofoga Fetalai o le mea e fia faasao faamolemole?

FOFOGA FETALAI: Malie le sui usufono, se i tuu atu le avanoa, se i tulai mai le sui usufono mo Faleata Sasae, o le a le mea lea e fia faasao?

Tofa Aveau Tuala Lepale Niko Palamo: O lea e saunoa le Afioga i le Minisita e \$5 i le aso, a o le masini lea e \$5 i le lua itula, ae .50sene pe a ova atu i luga i le lua itula.

FOFOGA FETALAI: Ia lau Afioga i le Minisita, o le a le faamaoniga?

Afioga MAUALAIVAO PAT AH HIM: Ia faafetai a faapea o le sao lena, ia e le iloa po o le sao lena, ae ou te talitonu au, ua taugofie tele.

Afioga Hon Manualesagalala Enokati Posala: O lea taumafaiga o le fia tuu avanoa i taavale. E lua itula e tuu i ai ae a ova atu ua faapena ona toe faaopoopo e fuafua ai i e o atu e faatali a latou malo ona o ese lea, ae tuu avanoa i isi mamalu o le atunuu, ma le faaaloalo.

FOFOGA FETALAI: Ia se i tuu atu le avanoa i se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi e tulai mai.

Afioga Hon Leaupepe Toleafoa Apulu Faafisi: Lau Afioga i le Fofoga Fetalai, e tulai atu e talosagaina lau Afioga ina ia aumai na o mea sao e sui usufono mamalu i totonu o le Palemene, faamolemole.

FOFOGA FETALAI: Ia tulai mai le sui usufono e faaauau le saunoaga, o lea ua maua le auga tonu o le mataupu e \$5 i le lua itula, ae .50 sene e faaopoopo.

Afioga MAUALAIVAO PAT AH HIM: Ia o lena tonu lava, ou te le avatua ni mea pepelo na o mea sao lava, a o lea ou te fai atu e taugofie lena, aua na ou alu nei i Niu Sila e le i atoa le afa itula ae e te alu atu e \$8, e tusa ua 16 ma ona tupu sene \$1 i le tupe fua faatatau, e ui i lea, faafetai i le faauilavea.

O le a ou see mai i le Minisita mo Faamasinoga ma Pulega Tau Faamasinoga ona o le Minisita lea o lo o fitoitonu ma lau mataupu o lo o faalavelave i lou mafaufau, o le Palota Taitoatasi ioe. E ala ona ou... se i uma i se taimi ou oo mulimuli atu i le Paketi, ae ala ona ou faia le tala ma le manatu lea, ona e aafia ai foi le Paketi, i lau Afioga i le Minisita o lo o fitoitonu mo lenei mataupu o le Palota Taitoatasi po o faiga palota a itumalo. E talitonu lava o le tele o taimi ou te tautala atu ai, a o lea ou te mafaufau pe taunuu nei mea ou te faamoemoe atu i ai pe o le a soloia lenei itumalo. E ui i lea, faafofoga mai lou itumalo, e pei ona ou fai atu i le amataga, o lo o fulifuli faalaaui mamafa, e ui lava ina mamafa ae o lo o fulifuli pea, o lea lava e fulifuli lava. Ia silasila le tatou Malo, e le o se mea lelei lea mea ia te au, e pei o se laa o la e fua ae ta lava i lalo, ioe. E ui i lea, ou te talitonu, sa ma o nei ma le... vaeatu le Afioga i le Fofoga Fetalai, sa ma o nei i Mexico. O le saunoaga a le Afioga i le Fofoga Fetalai sa fai ma sui o le tatou Malo, o lou mimita ia, toe lava ina a maligi ifo ai ou loimata. E ui i lea, uma le lauga a le Fofoga Fetalai ua le mafai ona alu ese le Fofoga Fetalai, ua fia talanoa uma ma interview e tagata, o fea e i ai Samoa, o le a le mea na tupu? Faafofoga mai foi, o le saunoaga e faapea, "O Samoa ua siitia i le tulaga o le tamaoiga vaivai i se tamaoiga malosi." O le isi point lelei lava sa faapea; fai mai le saunoaga, "It is one of the most politically stable state in the South Pacific." Most stable. Ua fia tausaga o alu le Faigamalo? E ala ona ou faia le tala lea, e 50 tausaga o tautua le Palota Taitoatasi, le itumalo lenei, o lea e stable ai. O lea e stable ai le Faigamalo, ua see ese? Ua ai ea e le Palota Taitoatasi se tupe? Ua fai se lui ua lamatia ai le stable o le Faigamalo? E leai. O le mea lena e ala ai ona ou fai atu, ua 50 tausaga o stable ai lava faapenei le palota a lenei itumalo, o lea ua tautua, tautua, tautua. Oi e stable le Malo ae aveese? E faapefea ona fai? O le mea valea lea, o le mea valea lea. E tatalo atu ma le faaaloalo i lau Afioga i le Palemia, ioe. E lelei isi itumalo o la e na ona vaelua, ae o la e lava e tutu mai. A o le a le mea lea e i ai? E le vaelua a ua tipi, titina, vaeatu le paia o le Maota.

O le ala tonu lena, sa fai mai le tautua i le amataga, ioe, fai fai omai o taulelea, fai mai, "O e fai mai ni tou matai ona outou omai lea." Ia o fai mai matai, o lea ua matou matai nei. O lea foi la ua fai mai, "O laia ua uma le tou taimi." E faapefea ona fai? O le Palota Taitoatasi, o le a le mea na faaigoa ai o le Palota Taitoatasi? Na faapefea ona fai? Sa aumai i le Faavae o lo o i ai le itumalo lenei. Ia, e le umi se tala, na ona faapena atu, sa tautua ma le faamaoni, e leai ma se mea. O le mea lea na ou faitau atu ai le saunoaga a le

Fofoga Fetalai i Mexico, the most stable, tasi lenei itumalo na stable ai le Palemene lenei. E tasi lenei itumalo o lo o galulue tiga ona leai ni auala galue e asa solo i lalo o niu ma koko a o la e lava e tumu ai le maketi.

Lau Afioga i le Minisita, aua ne i tetena i lou finagalo. A i ai se upu ua faaletonu, e le o se naunau a o se mea atonu e te faafofoga mai ai ma tuu ai lenei mea aua le toe faia. Ia tatou o e faaauau pea lenei itumalo.

Ona ou oo mai ai lea i le Paketi, faamalo i lau Afioga i le Minisita o Tupe po o lau Afioga i le Palemia i le Paketi. O le Paketi, ua tele tele tupe o lenei Paketi. Ma ou te talitonu, a faapea e faasoa e le tagata e iloa faasoa lenei Paketi, e le uma tupe. A o lea ou te faalogo atu faapea e toe fai ni loan, toe fai ni loan. O fea e ave i ai na mea o lea e lava tupe o le Paketi. Ia na o se fautuaga, faafetai o lea e le o i ai se afaina o lafoga e uiga i le tatou Paketi, ma le siitia o tupe maua a si o tatou atunuu. O lo o i ai lava auala e fai ai, e moni o le matou vaai i le saunoaga faapea foi le tatou Paketi, o lo o i ai mea tetele lava ia o lo o tutupu mai e pei o le tatou falemai fou. A outou silasila foi i ai i le siitaga o le falemai, si tamai mea lava. A e gasegase, e afaina lava oe i sia tamai charge e i ai, ae le o afaina ai le atunuu atoa i se tax po o ni mea faapena e faapoopo i le tatou tupe maua i si o tatou atunuu. Ma ou te talitonu na o se tuualalo i le tatou Matagaluega aemaise o Ofisa Sili o Pulega, se i silasila totoa outou i ai, ia ui pea auala o mea e faatino ai. Aua a matou vaavaai i le taimi o le a lautogia ai se isi o CEOs po o Ofisa Sili o Pulega, e muliga foi le filifiliga o le Kapeneta. E matua filifili totoa tagata e fai tikeri, o tagata ua lava le potu masani. Na pau lava le mea e le iloa e le panel o le a filifilia outou, o le mea lea o le faautautaga tatau ma le faamaoni ma le silasila totoa i le faaogaina o le tomai lea o le avatu ia te outou. O le fautuaga ma le faaaloalo e le aoaia e Laupua Tamafaiga, ae ia alofagia, o lenei Paketi, e utiuti le faasoa, e le o ni Paketi tetele, ae lava a le faasoa pe a fuafua tatau ina ia lava le tomai ia te outou o Ofisa Sili o Pulega faapea foi Pule Sili o Matagaluega ma Faalapotopotoga a le tatou Malo e faatino ai le faasoa. Ou te talitonu lava o le faasoa, o lo o matagofie le faasoa, e leai lava ma se... ana faapea ua faavaatua le faasoa, o lona uiga e le toe aumaia ni a tatou oloa mai fafo, le mafai ona soloi le taumafa. O le mea lea o lo o matou talitonu ai o lo o lelei le faasoa ma matagofie le tapenaina o lenei foi Paketi. O le mea lea ou te faapea atu ai ma le agaga faaaloalo, e lagolagoina e lou nei sui usufono le Tala o le Tupe ua faataoto mai nei.

Lau Afioga i le Fofoga Fetalai, e faamalulu atu, faafetai tele i le avanoa ua aumai, ua mafai ai ona matou faasoa atu ni o matou lagona. O lagona lava nei, aua a ou musu e faaali atu i nisi taimi e iloa ai e valea lagona, a o fea a tuu i ai le valea? E tuu atu pea ia te outou ona faasoa mai lea pe faasao mai se sese o lenei sui usufono. Ia manuia le tapuaiga a le tatou atunuu aemaise le Palemene nei ia faapea foi ona soifua lau Afioga i le Fofoga Fetalai.

Soifua.

FOFOGA FETALAI: Malo faafetai saunoa i lau Afioga i le sui usufono mamalu mo le Palota Taitoatasi, Afioga Maualaivao Pat Ah Him. Ia, aua ia le alo le foe ma faanape i le tuleiga ma le saunoaga. E silafia foi e le i faigofie le toe tuuina atu i tua o lenei Tulafono Tau Faaofi ona o le manatu o le Maota e taua le Tulafono Tau Faaofi. Ia lafo maia laia o au nei e Taitaifono ma le Komiti o le Tulafono Tumau, o le a i ai se taimi ona fonu foi lea o le tatou Komiti ma vailiili tuleiga ma saunoaga ma timaiga ma le atugaluga foi ua

saunoa i ai lau Afioga i lenei vaega o le aso ma lau lauga i le tatou Tala o le Tupe.

Ia, ua avanoa le Maota mo se isi sui usufono e fia saunoa. Se i lafo i lea Itu o le Maota. Tulai maia lau Afioga i le sui usufono mo Gagaemauga Nu.2 e saunoa.

Tofa LEVAOPOLO TALATONU: Faafetai tele i lau Afioga i le Fofoga Fetalai ua maua so matou avanoa e faaali ai foi nai motugaafa po o nai vaivaiga e tusa ai foi ma le Tala Faaopoopo o le Tupe aemaise foi o le Tala Faataatau Autu o le Tupe i lenei foi tausaga. Ou te talitonu ua lele malie le tia o tautiaga i le taeao ua sola i le tatou faafetai ma le tatou taulaga sa e siitia i le agalelei foi o le tatou Tapaau i le lagi i le taitai mai o lou soifua ma le soifua o le Afioga i le Palemia ma le Kapeneta ma sui usufono mamalu o le Palemene, e faapea foi so matou ola i lenei aso aua foi le faataunuina o tatou tiute ma tofiga.

O paia o le atunuu i ona tulaga maualuluga i paia faaleatunuu faale-Ekalesia ma faale-Malo, ou te talitonu lava pe oo i ai sa matou tala pe leai, ia e tumau lava outou paia ma mamalu, e leai se mataalia po o se atamai na te toe talatalaina le vaofilifili ua taoto.

E avea lenei avanoa ou te faatalofa atu ai i si ou itumalo i le paia o Tapaau ma Saleaula i le velele mai foi o le tupua ma tui mai le mulipapaga a o alofaiva lo outou sui usufono e momoli so outou finagalo e ala i upufai a lo tatou Malo. E talitonu lava sa outou faafofoga foi i luga o TV ma leitio i se faamaualaloga a le TV1 ona o latou faasalalauga foi matuia ma le ogaoga sa latou tuuaia ai lou nei sui usufono. Peitai, o lena ua outou faafofoga i ai. Sa i ai lava le manatu e faatino mai e le tamaitai pule le vaega lea, ona i ai lea o le amanaia ma fetau tonu ona e le mama ia te au ma le tatou itumalo tuuaiga faapea. Peitai, ua le fetau le taimi, ua uma le taimi o le tufuga alofa, a ua toatamai le tufuga. O le mea lea ia tatou tuu ia i le Atua e faasino mai se ala e tataua ona tatou faia.

Lau Afioga i le Fofoga Fetalai, i le Tala o le Tupe lenei, e leai se matou tala tele i le faasoa a le tatou Malo i lenei tausaga, ae na ona matou tuualalo atu i nisi o vaega e toe faaleleia ma saga faaleleia aua le atiaeina o le tamaoiga o le tatou atunuu.

O le vaega muamua lau Afioga i le Fofoga Fetalai, i le taeao nei sa tatou faasua i le tulaga o atinae o itumalo. Sa tatou faasua, e ui lava o se faasuaga, ae leaga o la e maitau itumalo ma le atunuu atoa i mea nei o auala galue ma tulaga faapena. O le faasoa atu o lea atinae ma lea atinae i so o se itumalo. O nei la i le taeao i le faalogologo, e fia pasene i i, fia pasene i o le atunuu atoa, ae ua le iloa po o ai matou, ua totogo ae ai se manatu i lenei taeao lau Afioga i le Fofoga Fetalai, pe le ua tataua ona silasila le tatou Malo aemaise foi o le Palemene i le tulaga o le aumai po o le faamatuu sao atu o Paketi i itumalo, ona fai lea i ai o fuafuaga a le itumalo latou, taiulu ai faipule, fai lo latou ofisa i totonu o itumalo. E mafua ona ou fautuaina lea vaega lau Afioga i le Fofoga Fetalai, e le na ma le laina, ua savalia le 20 tausaga e le o i ai lava se tulaga fesoasoani mai a le Malo i lenei itumalo. I lau la tilotilo i le faiga lea, ina ia fea ma laugatasia uma so o se sitiseni a le atunuu i faamanuiaga a le Malo i itumalo taitasi. O le tasi la lena o vaega sa ou fia talanoa i ai, tau lava ina faataatia atu i tafatafa o lau Afioga i le Palemia ma le Faigamalo, atonu e i ai se taimi ia ona maua lea o ni nai manatu e faapena, ae o lena ua ou fai atu, o

le mafuaaga ia laugatasia tagata uma o Samoa taitoatasi i le faamanuiaga ma lea faamanuiaga.

O lona lua lau Afioga i le Fofoga Fetalai, pei lava ona ou fai atu e na o se tuualalo e leai se matou tala i le Tala o le Tupe. O le Matagaluega a le EPC ua maua le tulaga o le atinae lea i Vaiaata o se atinae taua, sa fuafua mai lena taimi, masalo o le USD\$12miliona e ono faaalu i le atinae lea o le toe faafouina ia ma le faatauina o afi moli aua le motu tele i Salafai, pei lava ona ou fai atu, o se atinae sa fuafua mamao e taua, a o le taimi lea ua sui le taimi o lea ua tatou agai e uunaia ia le malosiaga faaeleteise e maua mai i le la. I lou la manatu vaivai lau Afioga i le Fofoga Fetalai, ou te fautuaina ai le Afioga i le Minisita ma le Matagaluega ma le tatou Malo foi, ia toe seu silasila o la e sefulu afi la e i o i Salelologa i le taimi nei, uunai le tatou solar ae vaai tatou afi na e sefulu e faaoga e backup ai le tatou eletise mo Savaii, e le maua se 2 megawati o le eletise e faaogaina i Savaii, o le ala lena ua avatu ai se fautuaga ae sefe mai le tatou tupe lea, lea sa fuafua mo Vaiaata aua se isi atinae taua o lo tatou atunuu. E le gata i lena o le tasi o mafuaaga o lea vaipanoa o Salafai, o le catchment area o le suavai taumafa mo Faasaleleaga. Ou te manatua e i ai le fuafuaga a lo tatou Malo i le fesootaiga o vaitaumafa faataamilo i Savaii e fesoasoani atu i Asau ma tulaga i nuu e le maua ai le suavai, ia tasi la lea faamoemoega. I le lumanai afai o le tulaga lea o le a tatou faia, ia e le mailoa lena vaega e ono faaleagaina le suavai i lea faaitu atoa ia ona tatou toe popole foi lea i le lumanai.

Sa maua atu i le saunoaga a le sui usufono faatoa mavae atu nei le taua o le faamalamalamaina o le tatou atunuu i so o se tulafono, o le mea lena o lea e maituina i le vaitau lenai, e ala ona tele vevesi ma vesiga ma le faitioga a le atunuu, ona e le lava le faatinoga e le o lelei le faatinoga o tiute o Matagaluega taitasi e faamalamalamaina o so o se tulafono, o lea e faaogaina e tagata. O le faataitaiga lau Afioga i le Fofoga Fetalai, o le tele ia o feeseeseaiga i nei mea o siusiu pipi vaeatu le paia o le Maota, lea e aumai nei i Tutuila po o le motu tele i Tutuila, o lea e fai nei o le aumai o le pusa siusiu pipi ma fai le tiute, masalo o lea ua malamalama lelei le mataupu lena i totonu o le Maota, e na o pusa pipi e faaoga commercial, po o le aumai e faatau e wholesales ona faatoa tuu lea i ai o le 300% i luga. E mafua ona ou fai atu i le vaega lea, ona o la e manino lelei i totonu o le Tulafono a le Tiute le Tariff a le Tiute le \$500 o le duty concession o so o se tagata malaga e malaga i Tutuila, e i ai le mea lea ou te fia tau atu lau Afioga i le Minisita o lea e tulai mai ai le faaletonu tele lava i i i mea ia. O le malaga o le tagata i le vaalele i i agai i Tutuila e sau ma lana pusa pisupo o le faaitaiga, e le lavea le pusa pisupo lena i totonu o le menifesi, ae a sau le tagata mai Tutuila ma lana pusa pisupo po o lana pusa pipi i le vaa a lalo le Lady Naomi, ona aumai lea totogi lana freight ma aumai tuu i totonu o le menifesi, le menifesi la lea o mea uma la ia, e ta i totonu o le ASYCUDA System a le Customs, o le tulaga la e i ai le ASYCUDA seiloga ua totogi tiute faatoa release laia o le faamomoli lea, a o i i le vaalele e leai se....e le faia se mea faapena. O le mea la lena e tataua ona faamalamalama lelei le atunuu. A ou fua i le pusa pipi lau Afioga i le Fofoga Fetalai e na o le USD\$26, liliu i le faa-Samoa e \$59 tala Samoa, a tasi la lau pusa pipi e le i taitai ona oo i luga o le \$500 lau pili concession, e mafai ai ona fai se tiute i le Ofisa o Tiute, ave i tua, o lea ou te iloa seiloga e 9 ni au pusa pipi, ona mafai lea ona fai le tiute ua maua le \$500 ma ona tupu, e ova atu ma le \$500 faatoa mafai ona fai le tiute. O le mea la

lena sa pisapisao ai ma tele faitioga a le atunuu, o le lē faamalamalama lelei o le atunuu i tulaga ia.

O le isi vaega lau Afioga i le Fofoga Fetalai, o le a leai se lagona po o se manatu e faaali i le Lipoti a le Suetusi Sili, na pau lava aua ua ilo vea, ua silafia e le atunuu mea uma o ni faaletonu po o ni a lava, pau lava lea o lau fautuaga lau Afioga i le Palemia, o le taimi o le tuu o le alofa faavalea, tuu le soona tuu avanoa. Aua silasila foi lau Afioga i le Fofoga Fetalai, o le summary atoa lava ma le tulaga faaletonu o le Lipoti lea, e mafua mai.....

FOFOGA FETALAI: Ou te vaelupeina le saunoaga a le sui usufono mamalu le sui usufono mo Gagaemauga Nu. 2, ia ou te faamalulu atu ona o le tautalagia o le tatou Lipoti lea, e tatau pea ona ou faamalamalama atu i lo tatou Maota. E silafia lelei ua maea ona faia le Faaiuga a le tatou Palemene, o le la ua see atu i le Tali a le Malo mo le tolu masina ona toe tuuina mai lea. I lalo o a tatou Tulafono Tumau, ia e le mafai ona toe tautalagia se mataupu ua uma ona fai i ai se tatou Faaiuga, e mafai lava ona tautalagia i mea taitasi ma isi mea, a o le upu o le toe taamilo o le Lipoti atoa, ia malilie sui usufono mamalu o lo o saunoa ma e tatau ona ou faaali atu leaga o lea faatoa tulai mai se sui usufono e saunoa e uiga i le Lipoti.

O lo o i ai pea le avanoa a foi mai i le tulaga o Tali a le Malo, ona tatou uia le process o lo o faagasolo ai galuega. A o le tatou toe tautalagia o le Lipoti atoa, ia outou finagalo malilie o lea ua tapu i lalo o a tatou Tulafono Tumau, o lena ua uma ona i ai le Tulafono Tumau ua uma ona faaalua. Tulafono Tumau e 82, o mea e aofia i lauga (4), ia ua tapu ai i ina ona tautalagia o ni mataupu ua uma ona fai faaiuga a le Palemene, ae agai pea le tulaga ina ne i meaane ua tatou toe tautalagia, ia ona tatou toe asa foi lea o le ogasami ua uma ona tatou asaina. E faamalulu atu ai i le sui usufono mamalu, a o lea ua lafo le galuega se i fai le Tali a le Malo i totonu o le tolu masina, ni a fa au taunuu mai, ia o le a foi le tulaga e faataatia ai i luga o le Laulau a Fono, ona faapena foi lea ona tatou toe tagofia. O le faamanatu atu lea i le sui usufono mamalu, ae tulai mai e see ese ma lea mataupu ae faaauau le saunoaga.

Tofa LEVAOPOLO TALATONU: Faafetai tele i lau Afioga i le Fofoga Fetalai, leai e pei lava ona ou fai atu i le taimi ua sola e le oo lava sau faamatalaga i le Lipoti a le Suetusi Sili, na pau lava le tulaga lea ua maua se avanoa e avatu ai se fautuaga i tulaga e ao ona silasila totoa i ai ia le Malo e faaleleia ai ma aua ne i toe tulai mai se Lipoti faapea. O le mea muamua lau Afioga i le Fofoga Fetalai, o galuega uma ia e tuuina atu i Matagaluega o le vaega muamua e ao ona silasila totoa i tulaga uma, o vaega ia o internal auditors, po o suetusi faapitoa i totonu o Matagaluega, o le latou tiute ma le latou matafaioi, o le silasila i so o se sene faaalu o aseta a le Malo, afai la e tulai mai se faaletonu i se Matagaluega, o lona uiga, e le o faia se galuega. O lona lua o legal advisors, po o loia faufautua a Matagaluega ma Faalapotopotoga a le Malo, o le latou matafaioi o le faufautua i le Afioga i le Minisita, o le Pule Sili ma le Matagaluega i faiga faavae e tusa ma le tulafono. E pei lava ona ou fai atu na ona faapuupuu atu, o mea uma lava ia na mafua ai ona tulai mai ia le Lipoti lea ma atugalua i ai ia le finagalo o le Suetusi Sili, lea la ua avatu le tulaga lea ma ou te fautuaina lau Afioga i le Palemia ma le Kapeneta, afai e le mafai e tagata nei ona faatino ma faalelei galuega nei, o le toatele ia o alo ma fanau a le atunuu o lea e tau sue solo ni

galuega. Afai ua le mafai, ia aveese, e faigofie lava, ae se i oo mai se isi e mafai ona fai e tusa ai ma faiga faavae a le Malo ma le agaga.....

FOFOGA FETALAI: Malie le sui usufono mamalu, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te le o malamalama i le mea lea e saunoa i ai le sui usufono, o le toe nofo ma faamatala mai galuega, o la lava e fai, o la e fai e tagata nei, ae ou te le o iloa po o le a le mea lea pei e foliga mai o lo o tau faaali mai i i le potu. E te le tau faamatala maia ia mea faapena, o galuega na o la e fai.

FOFOGA FETALAI: Tulai mai le sui usufono mamalu.

Tofa LEVAOPOLO TALATONU: Lau Afioga i le Fofoga Fetalai, ana fai, ana fai galuega lea, e leai se Lipoti faapea a le Suetusi Sili e aumai i totonu o le Palemene, pe ana fai ni galuega.

O le isi vaega lau Afioga i le Fofoga Fetalai.....

FOFOGA FETALAI: Malie le sui usufono mamalu, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le faalavelave o lea e tatou te talanoa le Tala o le Tupe a o lea e toso e le sui usufono i o i le Lipoti e le o talanoaina i i, o le a tau aliali mai ai le fiapoto tele o le sui usufono. Sei tau faaaliali mai lou malamalama ma tau faamatala mai galuega o la e fai? O lea e tatou te talanoaina le Tala o le Tupe.

FOFOGA FETALAI: Ia se i tulai mai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, o le mea e fia faasao i le saunoaga a le Afioga i le Palemia, o le folasaga lava i le Tala o le Tupe, aua e aafia ai le Tala o le Tupe, pe a faaletonu le faatinoga o galuega ia, a o lea e fai mai e aua e leai se mea o i ai i i le Tala o le Tupe. O lauga faalauaitele a sui usufono.

FOFOGA FETALAI: O lea ua maua, o lea ua maua Palusalua.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le faalavelave lena o lea e tatou te talanoa Estimates, Estimates o le tausaga fou. O le mea lena o lea tatou te talanoaina, e eseese lava mea ia e lua. A oo loa i taimi e talanoa ai mea o accounts, e ese foi la Lipoti na, o le mea lea tatou te talanoaina, o le Tala o le Tupe fuafua o le tausaga fou, e tatou te le o talanoaina se tulaga o tupe faaalu, o tupe fuafua ia tatou te talanoaina.

Afioga Hon Palusalua Faapo II: Lau Afioga, o saunoaga foi ia a le Afioga i le Palemia i se tasi o sui usufono o lenei itu, fai mai o Estimates, o

Estimates. O lea e lauga faalautele ia sui.....o le mea lena o lea e tupu i le taimi lenei.....

FOFOGA FETALAI: O lea ua maua Palusalua, o lea ua maua lou finagalo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lena o le Tala o le Tupe i le tausaga fou lea tatou te talanoaina.

FOFOGA FETALAI: Alaala mai lalo, se i tau faamalamalama atu le.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: O Lipoti a le Suetusi e faatatau i tupe ua uma ona faaalu, seiloga la tatou te oo i le talanoaina o le Lipoti o tupe ua uma ona faaalu, ona oo foi lea i ai o tatou lauga. O le mea lea tatou te talanoaina, o le Tala o le Tupe o le tausaga fou, o Tala o Tupe o tupe fuafua.

FOFOGA FETALAI: Ia e fautuaina pea le sui usufono mamalu mo Gagaemauga Nu. 2, o le ala lena o lou piiama i le taimi ua sola na ou fai atu ai leaga e felefele le mataupu, pe a tatou oo nei i le Lipoti lea o le Pule ma Suetusi Sili. O le ala lea na avatu ai le fautuaga i lau Afioga, ni a fa au, see ese leaga e moni lava e tatou te faataataa a luga upu, ia ae aafia leaga e le tasi le lua le tolu ni Lipoti a le Pule ma Suetusi Sili, a o lea foi o lo o outou vaavaai, o tausaga uma lava o lo o aumai Lipoti tuu sao ma o lo o tatou vaaia pea i suiga talafeagai ma suiga lelei o lo o suisui pea le tatou Lipoti o lo o tuuina mai. O le ala lea, ni a fa au o lou finagalo, e manatu ua malamalama lou atugaluga. E le o perform ulu o Matagaluega ma mea lea ou te maua ai lou finagalo, o lea foi na faapea a faapea e le o i ai nisi e le o faatinoa galuega i le atoatoa, e sili ona sui, o lou lava lena finagalo, a o lea ua saunoa le Afioga i le Palemia, o mea na e te saunoa i ai, o lea e faatino. Ina ne i meaane foi ua tatou tau le pua ma lafo i le aufaigaluega a le Malo, ia ae leai se galuega e fai loa fua mai. O lea lava tatou te onosai ma oloolo pito vaa, tatou naunau e le i fausia Roma i se aso se tasi, ma le faanaunautaiga, ia aua ne i toe tulai mai mea nei mo le lumanai.

O lea ou te fautua atu le sui usufono mamalu, ia see ese ma lea mataupu e manatu ua malamalama lou finagalo, e ala ona tutupu nei faafitauli, ia ona o le lē faatinoa lelei o galuega. A o lea ua saunoa le Malo, o lea e faatino. Ia lafo lea i le ogatotonu o le Maota e faafogafoga mai ai foi le aufaigaluega a le Malo, ia po o ai ē e le o faatinoa le latou galuega, ae see ese i se isi mataupu e manatu ua malamalama lou finagalo, le sui usufono mo Gagaemauga Nu. 2, tulai mai e faaauau le saunoaga.

Tofa LEVAOPOLO TALATONU: Faafetai i lau Afioga i le Fofoga Fetalai. O le lauga a le itumalo lenei o lea e lauga i le Tala o le Tupe ma le tamaoiga o le atunuu. A ou tilotilo atu la i se mea e ono faaleleia ma afaina ai le tamaoiga o le atunuu, ona fai atu lea e fai atu sao lava le tala e le tuua.

FOFOGA FETALAI: Malie le sui usufono, se i toe tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea tatou te talanoa i le \$792milionia lea e fuafua e faatino ai tatou galuega i le tausaga fou. O le mea lena e faaigoa ai mea ia o budget estimates, fuafuaga o le tausaga fou lea tatou te talanoa i ai. Ao mea na e talanoa mai ai, o lea sa ou taumafai e faasao atu i sui usufono ia sa saunoa mai o la outou itu, e tatau ona aumai ai i totonu i i ma faamatalaga o tupe ua faaalu, tatou te le o talanoa i mea na seiloga ua aumai ia tala o le tupe ua faaalu, lipoti ia a le okika ma le taimi e talanoa ai faatoa tatou talanoa loa lea auiliili i mea ia e te laga mai. Ao lea tatou te talanoa i le lauga i le Tala o le Tupe i le tausaga fou.

Tofa LEVAOPOLO TALATONU: Lau Afioga i le Fofoga Fetalai.

FOFOGA FETALAI: Tulai mai le sui mamalu e faaauau le saunoaga.

Tofa LEVAOPOLO TALATONU: O le agaga atoa o se manatu e moni le Afioga i le Palemia, o lea tatou te talanoa i le \$700milionia lea na avatu e faatino ai mea ia, ao lea la e avatu le matou fautuaga ia faaeteete le faiga o le \$700milionia lea i toe aliali mai e pei o le mea lea na aumai e le Suetusi sili, o le mea lena o lea e avatu ai se faamatalaga ae e le o faapea ua matou fai atu nei e leaga le a ma le a.

FOFOGA FETALAI: Malie le sui usufono sei tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Sei fai atu lava le mea lea, o lena e te talanoa mai i tausaga ua tea, e te le o iloa le faatinoga i le taimi lenei ma le tausaga fou. O lena e te talanoa mai i le lua, tolu, fa tausaga talu ai, a o lea ou te talanoa atu i le Tala o le Tupe nei ma le tausaga fou. O le faalavelave lena o lea e tupu o lea e tuu le Tala o le Tupe lea tatou te talanoa ai ao lea e te talanoa i mea ese.

Afioga Hon Palusalua Faapo II: Lau Afioga i le Fofoga Fetalai.

FOFOGA FETALAI: Lau Afioga i le Taitai o le Itu Agai e ava tele atu ae ua agai ina soli tatou Tulafono Tumau.

Afioga Hon Palusalua Faapo II: Leaga e sese le saunoaga a le Palemia.

FOFOGA FETALAI: E le mafai ona e faasao se faauilavea. O le Tulafono Tumau lena ao lea lava e tuu atu le avanoa o le ava atu, e le mafai ona e tulai e faasao se faauilavea o lo o agai i se saunoaga o lo o fai. Lau tofa le sui usufono o Gagaemauga Nu 2, e manatu o lea ua malamalama lou finagalo e tatau ona see ese i se isi mataupu o lea ua manino le folasaga. O le lipoti foi lea e taua ou te le fai atu ua uma ona tatou faalogologo ma soalaupule foi lea mataupu i lena foi taimi na tulai mai ai, 2008/2009 ua fa lima ono tausaga talu ai, ao lea lava ou te maumauiumaea....e taua la outou fautuaga o lea ua oo i le Malo, lafo laia o lea tatou te talitalia le isi lipoti a le Pule ma Suetusi Sili po o le a le isi suiga lelei lea ua taunuu mai. Ao lea ua taua la outou faamanatu, e taua foi la outou timai e timata ai le upega a latou

o lo o faia le faasoa i totonu o Matagaluega a le Malo. Ae tulai mai le sui mamalu ae faaseese ae agai le saunoaga.....

Tofa LEVAOPOLO TALATONU: Ua e maua tonu lava le mea lea e taumafai atu ai. Ou te le o fia talanoa i se lipoti a le Suetusi Sili ae taua ia te au le feau la e aumai ai, o le mea foi lea e avatu ai le fautuaga i le Palemia ma le Faigamalo. O le fautuaga lea, tautuana ma outou e aua nei toe tulai mai. Ia manuia o outou faiva ma faiva alofilima aua le tatou atunuu.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga o le mea lea ou te tulai atu ai e pei ua fuuaa e le sui usufono le aufaigaluega atoa a le Malo, e pei e tau mai iina o ia lava e potu, ua fuuaa le aufaigaluega atoa a le Malo, e tasi lea mea e ala ai ona sau fesoasoani mai fafo o le faatinoga o la e lelei, e i ai lava nai mea e tasi pe lua e le faapea o le a leaga atoa ai le Malo atoa, o le mea lea ua tupu i le sui usufono ua tele le fiapoto. E pei e tau mai i i o oe e te potu lava e le gata i le Tulafono o le faatinoga o mea tau tupe. Lau Afioga i le Fofoga Fetalai o lea tatou te talanoa....o le mea lena e te talanoa mai ai o mea ua leva, o lea tatou te talanoa i le tulaga o le Tala o le Tupe i le tausaga fou, agai mai i ai ia lauga.

Afioga Hon Palusalua Faapo II: Lau Afioga i le Fofoga Fetalai.

FOFOGA FETALAI: Tulai mai lau Afioga i le Minisita. E te malie le Taitai o le Itu Agai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Afioga ma Agafesootai): Faafetai i lau Afioga i le Fofoga Fetalai o lea ua maitau atu o le manaia ia o lau pale mai i le saunoaga a le sui usufono mo Saleaula po o Gagaemauga Nu 2, ona o lea e maitau atu o lea e apaapa i tua i lipoti ia ua uma ona tagofia e le Maota, ao Tulafono Tumau la e manino, ou te iloa ana toe faitau lelei i ai le sui usufono, ua tatau foi ona ia fausia le tuualalo a lau Afioga, e solitulafono i Tulafono Tumau le mea lea e agai i ai lona finagalo o le fai ma apaapa i lipoti ia ua uma ona tagofia e le Maota, o lona uiga la, o la lava e manao e faaoloataua le faafofoga a Samoa ma atili ai ona oso sese foi lona taitai e aumai mea e le talafeagai e le o malamalama ai foi i Tulafono Tumau. Ao lea na saunoa le Palemia, o lena ua sao lelei le saunoaga a le Palemia. E matuia le tuuaiga.....

Afioga Hon Palusalua Faapo II: Lau Afioga o le mea e fia faasao.

Tofa Hon Tolofuaivalelei Falemoe Leiataua: Malie le Taitai o le Itu Agai sei uma atu lau tala. Aua le teiteivale e pei o le ia o le papau, onosai mai. E matuia tuuaiga i le aufaigaluega a le Malo. E matuia, leaga e le o Matagaluega uma e i ai ni a latou loia po o ni okika (internal audit). E le o Matagaluega uma aua e le o se faiga faavae lena a le Malo, e le o Faalapotopotoga uma foi e tofua ma le loia tofua ma le suetusi i totonu lava o le pulega latou. Ao lea o le a agai e tau toso, ona o le manao lava e avane i luga

mea ia, ae ua uma ona fai le faaiuga a le Maota, o lea ua e malele o le mea lena e tataua ona usitaia e le sui usufono mo Saleaula faapea foi le Taitai o le Itu Agai, ia aoina ai lona mafau, aua le toe faalavefau i mea e le o malamalama ai pe a pau loa i Tulafono Tumau.

Afioga Hon Palusalue Faapo II: Sei silasila i saunoaga ia e aumai lau Afioga i le Fofoga Fetalai. Pau lava le mea a matou fai atu ona tutulai ae lea i o, aemaise le Palemia ma fai mai o matou e fiapopoto.

FOFOGA FETALAI: O lea e maua lau Afioga i le Taitai o le Itu Agai,

Afioga Hon Palusalue Faapo II: O lea e taumafai atu le itu lena e avatu fautuaga ae le o se sailiilivale i lipoti i tausaga ua tea. O lea e manino lava le folasaga ia, o le folasaga agai i le Tala o le Tupe ae e le o se fiapoto lau Afioga i le Fofoga Fetalai.

FOFOGA FETALAI: E le o ni ai avea lena tulaga ou te talitonu foi o le tootoo o Saleaula e le se tamai tootoo o le tootoo o le taimi louloua ma taimi faigata, o lena e faavevesi atu lava ae o la e toa Saleaula latou. Lau tofa le sui usufono o Saleaula ua ou toe tuu atu le fautuaga, manatu ua manino le vaisua lea sa tatou fetuunai ai, o la foi ua manino le faafofoga a le afaigaluega a le Malo, lafo laia i le Malo i tulaga ma le faafoega.....ae see ese ma le mataupu, toe lima ou minute.

Tofa LEVAOPOLO TALATONU: Faafetai i lau Afioga, o mea ia e iloa ai le tautai, o la foi na fai mai foi lafoga ua lavea lelei, ae faamalulu atu i lau Afioga i le Minisita e leai se tuuaiga sa ou faia i le afaigaluega pau lava le mea lea e i ai o le latou faatamala e mafua ai ona aumai mea faapea i luga, o le uiga lena o le faamatalaga ae le faapea ua fai se tuuaiga.

Tofa Hon Tolofuaivalelei Falemoe Leiataua: O Saleaula foi o le uso laititi o au pe a ma o lava i le gafa, ae e faaaloalo foi, ae o lea ou te fai atu o lea e fai mai o lana fautuaga ina ia aloese i mea la, ou te ofo i le mafai e Saleaula ona fai mai le upu lea le sui o Gagaemau Nu 2. E le faatonua e se isi, vagana le Minisita e feagai ma le Matagaluga afai ua aliali mai sona finagalo, lafo mai laia i le Malo, o le Malo e feagai ma Matagaluga ma Faalapotopotoga ao le faaumiumi ona toso, o le mea lena, e manao lava e faali mai le iloa, ma le manatu ai lea o le faafofoga a Samoa e sao mea ia e fai mai ai, ae o le la na te faatonua, o le uiga lena o le mea lea na saunoa i ai, o lea ou te pue atua. O le la ua faatonu mai fai mai o le mea lea sa tataua ona fai, ia aua le toe tupu le mea lea i le tiute faasuetusi i totonu o Faalapotopotoga ma Matagaluga. Le mea lea lau Afioga e le mafai ona sese se mea ou te fai atu ai leaga sa ou Fofoga Fetalai foi, sa ou saofai iina ou te maitaua uma mea uma, o le mea foi lena sa ala ai ona ou faaumiumi le Fonotaga a le Palemene i futia ua alu. Ma lou faaaloalo.

FOFOGA FETALAI: See ese ia ma lea mataupu. Faaauau le saunoaga o lea ua malamalama faaii lou taimi.

Tofa LEVAOPOLO TALATONU: Faafetai, o lea ua nunumi le lalolagi atoa i faauilavea, o le isi vaega lau Afioga a le Fofoga Fetalai, e faafesili atu lava i le Afioga i le Minisita o Soifua Maloloina, o le tele foi ia o tulaga o lo o vevesi ai foi le atunuu i le togafitiga o a tatou gasegase, faafesili atu lava lau Afioga pe i ai ni mea foi ia o ni annual competency assessment a fomai e fai i tausaga taitasi ia mautinoa o lo o lava lelei le malosi ma le tomai e fai ai ia togafitiga e fomai. Aua o le mea lea e i ai le tulaga lea, e faamalulu atu e i ai le fomai i le matou pito ae ou te iloa pe lavea ai foi ma ia i le vaega lena. O le tulaga lea e i ai nei, e tataua ona honest fomai i gasegase taitasi, tau i ai le gasegase, ao le mea lea e i ai, e fai fai lava ua le mafai ona fai ona taamilomilo lea ae le aumai sao i le aiga e fai i ai se faaiuga a le aiga pe afai ua tuai le Matagaluega, o lea la ou te fesili atu ai i le vaega lena, ae o le a tuu atu se tolu itula e te tali mai ai.

Afioga Hon Tuitama Talalelei Tuitama: Lau Afioga i le Fofoga Fetalai ona o lea e aumai sao lava le faafesili.

FOFOGA FETALAI: Tulai mai lau Afioga i le Minisita o le Soifua Maloloina.

Afioga Hon Tuitama Talalelei Tuitama: Ou te manatu e lelei le vave tali atu ne i tei ua agai solo le mataupu ona galo ai lea o le aano. O le faafesili lea e tuuina mai po o i ai ni auuala e tapue ai le tomai o fomai ina ia mautinoa o lo o agavaa pea mo le togafitiga o gasegase. Mo le silafia e le sui usufono o le galuega lea faafomai e review lava i tausaga taitasi, e tai ono masina ma fai mea e tau o appraisal report, e fai la e le ulu o section eseese e ave agai i luga i le CEO o le clinical, ona ave lea e silasila i ai le Manager ma oo atu ai i le Board, o iina e silasila ai po o le a le ituaiga galue po o talafegai le galue a le fomai lea ma lona tofiga o lo o i ai, a i ai foi la ni faaletonu iina i totonu o le lipoti lea e tai ono masina ma fai, e fua foi la i ai, a faapea o i ai se mea e ono tataua ai ona ave se fautuaga i le fomai lea ona valaau lea o le fomai lea pe a taunuu lipoti nei i le Ofisa Sili o le Mataluega ona faatalanoa lea o le Mataupu lea ma tau i ai, a faapea foi o se mataupu ua matuia tele ona fai lea o se discipline reaction po o se faasalaga po o se ituaiga faapena ao mea e fai i totonu lava o le Matagaluega latou. Ao le tulaga foi o lo o i ai nei le galuega faafomai e i ai le mea e tau o le CME, o le Continue Medical Education o le tulaga ia e fai i Aso Lulu uma lava ia aoga faafomai ia e tataua la ona i ai uma lava fomai ia practice i totonu o le falemai e o i ai e fonu i le taeao e faatasi i le vaiaso ona fai le fonu lea e present ai ia problem cases, a faapea la e i ai ni gasegase matuia ma faigata o i la e faasoa atu ai i isi fomai ona aumai ai foi lea o le latou fautuaga ina ia mautinoa lelei o lo o talafeagai togafitiga e tuuina atu i gasegase ua matuia ma faigata. Ae i ai la ni togafitiga e manaomia mo gasegase faapenei o i foi la i le fonotaga lena e ave ai lea o le fautuaga, e talu ai ona e le o i ai se tomai e talafegai mo se taotoga po o ni togafitiga e faia i totonu o Samoa nei e tataua ai ona faia se fautuaga e talosaga i le Kapeneta e ave le gasegase lea i fafo, ona faagasolo ai lea o tulaga ia e pei ona avatu ai gasegase i fafo. E pei o le tali atu lea i le sui usufono ona o lea e i ai lona manatu, a fomai loa ia ona e fai fai ai lava lea e leai ni fuafuaga i totonu o Matagaluega e tapueina ai lou silafia ma faaopoopoina ai lou iloa. Ao le tulaga foi o lo o i ai nei o lo o faasoa e o e toe ave courses i fafo, e pei

ona faafofoga nei, ua feololo foi a tatou fomai la ua o i fafo e aoga ia siitia ai le atamai ma le tomai ina ia mafai ona faatino galuega lea e le o mafai ona faatino i Samoa nei. E pei o le tulaga lena e tali atu ai. O se tali puupuu lava ae a finagalo le sui usufono i ai, ia o le a mafai ona tatou amata mai i le medical school seia oo ina litaea le fomai.

FOFOGA FETALAI: Malo faafetai, e manatu ua manino ma malamalama lelei le atugaluga sa saunoa i ai le sui mamalu. Tulai maia le sui usufono mo Gagaemauga Nu 2 e faaauu mai le saunoaga ua maea lou taimi.

Tofa LEVAOPOLO TALATONU: Ia ona pau lena o se lagona i a tatou fomai. Ou te aioi atu i a outou Afioga po o a outou Susuga i fomai, afai ua tuga se gasegase, faamolemole tau sao mai i le aiga o le mai lea ua faaletonu ona fai lea o se fua a le aiga pe a tuai se fesoasoani a le Malo. A o tulaga uma lava ia pei ona saunoa lau Afioga i le Minisita, leai o la e lelei. Na pau lava le mea lea e fautua atu ai, ia honest fomai, tau sao le mai i le aiga. A o le mea lea o le fiu e fai atu a o la e taamilomilo. Ma le isi mea, afai ua le mafaia ona faatino se treatment i le gasegase, faamolemole logo sao e le mafai ona taumafai lea e fai se isi faiga i se fesoasoani a le aiga lava latou o se gasegase e ave i atunuu i fafo, pe afai e tuai le fesoasoani mai a le tatou Malo.

Lau Afioga i le Fofoga Fetalai, ua uma se....

Afioga Hon Tuitama Talalelei Tuitama: Lau Afioga i le Fofoga Fetalai, na o se mea laititi lava lea leaga e taua tele le mea lea ua saunoa i ai le sui usufono.

FOFOGA FETALAI: Tulai mai le Minisita mo le Soifua Maloloina.

Afioga Hon Tuitama Talalelei Tuitama: O se fautuaga e aoga, ma e pei ona silafia e le Maota lenei, a oo i le taimi e faauu ai le fomai, ona fai ai lea o le tautoga, le tautoga lea e tau o le hyppocrates oath po o le tautoga faafomai lea e ese ai lava fomai pe a fai le faauuga e fai le latou tautoga lena. Ma o le tautoga lena e faamanatu pea faamanatu pea e fomai uma lava i so o se taimi e faauu ai ni fomai fou. I le vaega la o le tautoga lena, o lo o i ai se faaupuga faapea, “Aua e te faamaualuga e fesili atu pe faatagisia se fesoasoani a sou uso a fomai pe afai ua e faaletonu e fia maua se fesoasoani i se gasegase o lo o feagai ma oe. Ia, e le faapea e atoatoa fomai, e i ai lava taimi e galo ai le mea lena i le tele o auauna fomai, a ua mua lava ona taumafai e finau toatasi a ua le faasoa atu pe afai e i ai se vaega ua vaivai ai e tusa ma le faafeagai ai ma le gasegase ona fesili lea i lona uso a fomai aemaise o i latou e i luga atu pe matutua atu, po o e ua i ai faailoga maoae mo se fesoasoani po o le a sona finagalo. E pei la o le aoga lena o aoga ia lea e fai i vaiaso taitasi lea pei ona ou taua e agai i ai fomai i ni gasegase ua tuga ma ua fia maua se fesoasoani mai le lautele o le aiga fomai, ona talanoa faatasi lea ma faasoa ma maua mai ai nisi manatu fou e fesoasoani aua togafitiga o le gasegase. Ma le faaaloalo i lau Afioga ma le mamalu o le Fono.

FOFOGA FETALAI: Malo faafetai. Tulai maia le sui usufono mamalu e faaiu mai le saunoaga.

Tofa LEVAOPOLO TALATONU: Faafetai lava i lau Afioga i le Fofoga Fetalai mo le avanoa. E le tele lava ni mataupu sa ou fia talanoa i ai, a o le faalavelave ua uma foi le taimi, ae le gata i lenei, ua ou alofa atu i le Afioga i le Palemia pei a tau jump i luga le toto. O lea mea lea ou te fai atu ai, faafetai mo le avanoa. O le a foi se upu ua le tau tamalii i lau faafofoga a o se upu foi ua paulua i le faafofoga a le tatou atunuu, ia toe faafoi mai ia Saleaula. Ma le agaga faaloalo, ia manuia le tatou Fono.

FOFOGA FETALAI: Malo faafetai saunoa. Ia, o lo o maua le tatou avanoa ae le i faia le tatou malologa i se tasi o sui usufono mamalu e fia saunoa.

Ia, o lea ua oomi mai le... Tulai mai se tasi o sui usufono mamalu mo Vaimauga Sisifo, Tofa Lenatai Victor Faafoi Tamapua, ua avanoa le Maota mo le saunoaga.

Tofa LENATAI VICTOR FAAFOI TAMAPUA (Vaimauga Sisifo): Malo faafetai i lau Afioga i le Fofoga Fetalai e tusa ai foi mo le avanoa. Ae fia avea foi lenei avanoa i lenei itula e faatalofa atu ai i lau Afioga i le Fofoga Fetalai tainane le Afioga i le Palemia, le Sui Palemia ma le nofo a Minisita o le Kapeneta. E faatalofa atu foi i le Taitai o le Itu Agai, aemaise sui usufono mamalu o le Palemene o Samoa. Ia e faatalofa atu foi i Ofisa Sili o Pulega ma Pule Sili, o Ofisa Sinia o Matagaluega ma Faalapotopotoga a le tatou Malo, E faatalofa atu foi i le Failautusi, le Sui Failautusi ma le Matagaluega o le Fono Aoao Faitulafono.

E faatalofa atu foi i le faafofogaaga a le tatou atunuu i ona vaega eseese, i le paia faale-Talalelei, paia faaleaganuu, paia faale-Malo. O paia ia mai le vavau seia oo i le faavavau.

O le faatalofa faapitoa, e faatalofa atu ai i le tapuaiga a le itumalo pele o Vaimauga Sisifo, malo le soifua maua, malo le soifua laulelei i le alofa ma le agalelei o lo tatou Tama i le lagi. Faamalo faafetai i lau Afioga i le Minisita o Tupe, aemaise o le Matagaluega i lenei galuega fita i le tuufaatasia o lenei Tala o le Tupe. E talitonu ua ogatasi ma galuega faatino a Matagaluega ma Faalapotopotoga mo le tausaga 2014/2015. Ma o lea e faaleo atu ai le lagolago a lou nei sui usufono i le Tala Faatatau o le Tupe ua faapena ona faatalanoaina.

Lau Afioga i le Fofoga Fetalai, ae fia avea foi lenei avanoa e faamanatu ai nai talosaga e pei ona tuuina atu i nisi o Matagaluega. Lau Afioga i le Minisita o Galuega, Felauaiga ma Atinae Eseese, e momoli atu le agaga faafetai e tusa ai ma lau saunoaga i le taeao analeila, o lea o le a oo mai le tufa, o le a oo mai faamanuiaga, i se taimi lata mai i le faaleleia lea o auala i totonu o Vaimauga Sisifo. Ia ae lelei pe a ou toe faaleo atu auala o lo o fia maua ia faamanuiaga.

Muamua, o le auala lea e agai i le faatanoavai i Magiagi ma taamilo atu lea e tau i Vaivaseuta. O lea auala e le gata o se auala galue, ae access road foi. Ua tele ina nofoia ma galueaiina nei eleele e tagata Moataa, Magiagi, Vaiala, Matautu ma nisi o lo o nonofo i fanua tumaoti. O lea auala pe a faapea o le a faataina, e talitonu lou tagata, e tasi le auala ae o le a faamalieina ai le toatele, e le gata i tagata, ae o afioaga e pei ona ou taua.

Sa matou talanoa foi ma le Ofisa o lo o faatinoina le vaega lea o le fesoasoani muamua po o le vaega lea o le FESA. O se tali mai ia latou, o le

tasi lea o nofoaga tutotonu i le taulaga ua atofa nei mo le saogalemu o tagata ona o le maualuga o le tulaga o lo o i ai. O nuu ia o Moataa, Vaiala, Matautu, Magiagi, Apia Park, Vaipuna, e lamatia tele i faalavelave faalenatura e pei ona tatou vaaia i le afa lea o Eveni, aemaise foi le tulata i le sami. E manaomia tele e le Ofisa le faaleleia o lea auala mo le faatinoina o le latou galuega i se taimi vave. O le uiga o lea faamatalaga, ia faapena ona vave ona evacuate ese tagata i uta ma toe foi mai e fesoasoani mo isi tagata.

Lua, o le aualatele lea i Faatoia, mai Vaivasetai i luma o le faleoloa o Vaai e agai mai i Leone ma Vaipuna, aemaise foi se auala i le pitonuu i Faatoia e pei ona tuuina atu i le talosaga.

Tolu, o lo o moomia foi le faaleleia o le aualatele lea i Vaivaseuta, faapea le aualatele lea i Tanugamanono e agai lea i Vaoala, ona ua tele ina faaleagaina i le tetele o timuga.

Fa, o luma tonu o le falesa EFKS i Vaipuna, o lo o toa ai le vai pe a tetele timuga. O le faaletonu o lo o i ai, e le o lelei alavai. A timu aso e lua, e atoa le vaiaso o toa lava le vai i le vaega lea. O lea e tatalo atu ai i le Minisita aemaise foi le Matagaluega, pe mafai ona tagai ifo i ai faamolemole.

Lima, a o tatou sauni e talimalo ia Setema i le fonotaga lea a atunuu laiti, aemaise foi le meli o le a fai ma apitaga o le toatele o malo mai fafo i le uafu i Matautu. Ua oo mai ai se lagona i lou tagata vaivai, ua tatau nei ona fai ma toe faaleleia le taligalu i Vaiala e agai atu lea i Moataa. Ua tatou masani i tu ma aga a tagata mai fafo, e fiafia tele e savavali ma tamomoe, aemaise e tapue ata e manatua ai le latou malaga mai i Samoa. E avatu ai se faafetai i le Afioga i le Minisita mo Leoleo ma Falepuipui ona o lea ua amata ona faamalosia foi le Tulafono o le Resitalaina o Taifau se i tulou. Atonu o le a leai se popolega i lea vaega, pe a oo mai le taimi o le tatou fonu lea ia Setema.

FOFOGA FETALAI: Ua ou vaelupeina le saunoaga a le sui usufono mamalu ona o lea ua tatou taunuu i le tatou taimi malolo, o le a faaauau lau saunoaga pe a tatou toe taliu mai i le tatou faiga malologa.

Ou te faasilasila atu o le a faataatia ese Taulumaga a le Fono Aoaو Faitulafono mo lana malologa masani o le afiafi.

Na faataatia ese Taulumaga a le Fono Aoaو mo lana malologa masani i le itula e 4:45 i le aoauli ma toe faaauau i le itula e 5:20 i le afiafi.

FOFOGA FETALAI: E manatu ua maua le tatou faamalositino i lenei vaega o le afiafi. E momoli atu le agaga faafetai ma le faamalo i le taupati mai pea ma le onosai mai o le tatou Maota, o lea ua tatou taunuu i le afa muamua o le tatou galuega pei ona tatou fuafuaina. E momoli atu le agaga faafetai i le onosai mai pea aua taulumaga o le tatou galuega, ou te talitonu ua taatia i le Maota le tatou polokalame ua uma ona faataatia. E manatu foi ua maua le faatiliga malosia e ala i le taumafataga mama, o lo o taumafai pea le tatou Ofisa ia maua sina mea e faaauau atu ai le isi tatou lua itula lea o le a tatou feagai ai i le tatou Fonotaga. O a ni mea ua maau i ai le Failautusi o le Fono, ia paupau ia ae oo i Lepea, e le o toe mamao foi taeao ona tatou tapa

foi lea i le tatou fuamoā falai ma isi mea na e talamasinei ai la outou malutaeao.

E faia le tatou malologa o lo o saunoa le Afioga i le sui usufono mo le Fale Vaimauga, Tofa Lenatai Victor Faafoi Tamapua. Ia tulai maia le sui usufono mamalu e faaauau mai le saunoaga.

Na toe faaauau felafolafoaiga i luga o le faitauga faalua o le Tulafono Tau Faafoi o le Faatatauina o Tupe Faaopoopo (Nu.2) 2013/2014 ma le Tulafono Tau Faafoi o le Faatatauina o Tupe 2014/2015.

Tofa LENATAI VICTOR FAAFOI TAMAPUA: Faamalo faafetai i lau Afioga i le Fofoga Fetalai. E talitonu foi lou tagata vaivai ua maua se faasiliga malosi i lau Afioga aemaise foi o sui usufono e tusa ai foi ma le faiga malologa sa auai le tatou Fonotaga.

O le Minisita o Punaoa Faanatura ma le Siosiomaga, o le talosaga tuai lava, o se auala savali i le togatogo i Moataa, aemaise o ni taligalu mo nai aiga o lo o nonofo i lea vaega, ona a siisii le tai, e le mafai ona sopo mai tagata i uta i tai. E le gata i lea, ua oo atu le sua o le tai i maota ma laoa.

Lua, faamolemole lau Afioga, pe mafai ona tagai le Matagaluega i le faaleleia o le auala savali e agai i luga o le tuugamau o le Tusitala i Vailima ina ia saogalemu ma malupuipuia mo e o lo o faaogaina lea auala savali, ona o lo o maitauina le asiāsi pea i ai o tagata mai fafo, e pei o ananafi. E maua le 30 o tagata malaga mai Amerika sa matou feiloai ma matou savavali faatasi ai i lea mataaga.

O le Minisita o Aoga, e valuvalusia pea aa o le fau. O le talosaga foi a le afioaga o Moataa aua se latou faleaoga fou.

Lau Afioga i le Fofoga Fetalai, faafetai mo le avanoa. Ia alofagia e le Atua lau Afioga aemaise le Maota nei, alofagia le tatou atunuu aemaise le tapuaiga a le itumalo pele o Vaimauga Sisifo. Ia faamanuia mai le Atua i taualumaga o totoe o le tatou Fonotaga. Soifua.

FOFOGA FETALAI: Malo faafetai saunoa i se tasi o sui usufono mamalu o le Fale Vaimauga lau Tofa Lenatai Victor Faafoi Tamapua, e talitonu ua logona le tatou Maota e ala i le tuleiga ma le saunoaga i lenei itula o le afiafi. O le a papaaveloa le lua itumalo, tulai maia lau Tofa Lefau Harry Schuster, se tasi o sui usufono mo Vaimauga Sisifo, o lea ua maua le avanoa e soula ai ma soofau le saunoaga a le Fale Vaimauga i lea Itu o le Maota. Tulai mai le sui usufono mamalu e saunoa.

Tofa LEFAU HARRY SHUSTER (Vaimauga Sisifo): Faafetai i lau Afioga i le Fofoga Fetalai mo le avanoa, afio foi lau Afioga i le Palemia, Sui Palemia ma le mamalu o le Kapeneta. Afio lau Afioga i le Taitai o le Itu Agai ma le paia o sui usufono mamalu o le Maota.

Lau Afioga i le Failautusi ma le Ofisa, afifio foi Alii ma Tamaitai o Ofisa Sili o Matagaluega ma Faalapopotoga a le Malo.

Ou te faatalofa atu foi i le tapuaiga a Samoa ae tainane le tapuaiga a lo matou Itumalo o Vaimauga Sisifo.

Lau Afioga i le Fofoga Fetalai, e muamua ona avatu le faamalo ma le faafetai i le Afioga i le Minisita o Tupe po o le Afioga i le Palemia faapea le Ofisa Sili o Pulega ma le Matagaluega mo le tapenaina o le Tulafono Tau

Faaofi o le Faatatauina o Tupe (Nu.2) 2013/2014 ma le Tulafono Tau Faaofi o le Faatatauina o Tupe 2014/2015.

Lau Afioga i le Fofoga Fetalai, o le vaavaai atu i le tulaga o le Tulafono Tau Faaofi o le Faatatauina o Tupe 2014/2015, i le tulaga o tupe maua a le Malo ma Atinae o lo o faaagaga i ai le sueina mai o tupe ma atinae o lo o i ai pea. O le faamamafa i le tulaga lea i faatoaga faapea le Pulega o Tagata Asiasi maimoa mai Fafo ma lafoga a le Malo. O atinae o le faatoaga ma le Pulega o Tagata Asiasi Maimoa mai Fafo, ua leva ona taumafai mai ai le Malo ma ua tatou masani ai foi i faatoaga, a o tagata asiasi maimoa mai fafo o lo o taumafai pea.

Na o le tasi lava le vaega e fia fai i ai se manatu o lenei sui usufono mo Vaimauga Sisifo, e pei ona taua e nisi o sui a usufono i le tulaga i le vaavaai atu i le Tala o le Tupe mo le alualu i luma o pisinisi laiti po o private sectors. O se tasi lea o vaega mo le lumanai e tatau ona ave i ai le faatau ma le lagolago ona e i ai foi le avanoa ma le sao o le vaega lea. E le gata mo le maua ai o avanoa faigaluega a o le maua ai foi o tupe mo le agai i luma. O le taimi lenei o le tele o private sectors ua ta vaai i ai ua tele i services, o Loia, Suetusi, Ofisa ma Fomai, ae le o tele tele ni vaega foi nei latou te gaosia i inei ma faatau atu i fafo. O se vaega i le agai i luma o se tasi lea o vaega ia i tatou i inei i Samoa e le i oo i le atinae e tatau ona oo i ai masalo ona o lea faatoa amata. O lau vaavaai i ai pei e aiga le atinae o le itu lea... o se tasi o vaega taua o le SROS, o le taua o lau vaai i le SROS e fou a latou suesuega la e fai i isi oloa e mafai ona maua mai fua o faatoaga. O lau vaai afai e ave le lagolago a le SROS ma nisi vaega faapea e atinae ai le atunuu, ma ave le lagolago Iea i Private Sectors e mafai ona latou atiaaina ni kamupani e faaoga ai le tomai lea mai le SROS, o le a maua se tupe e le gata i oloa e faatau i Samoa a o le faatauina atu i fafo.

O le faataitaiga a o le i mu le Willex sa faatoa amata ona latou atiae le faiga o le ava ma le koko ua latou le avea le koko a ua ave atoa le fatukoko i fafo. Na latou amata gaosia le koko ma latou faia foi le sukalati a o lea foi ua ou vaai atu i le SROS e i ai a latou suesuega, e le gata i nei mea a o le suauu lea e maua mai fua o faatoaga. I lou tamai malamalama lea i ai, o le tipolo ma le koko – o le suauu lea e maua mai i mea nei e tele lona aoga i le faiga o make-up lea e faaoga e tamaitai. Ua ou faitau i ai e tele le tupe e maua mai ai le suauu i le tulaga lea, o le talitonuga o lou sui usufono e le gata i le Pulega o Tagata Asiasi maimoa mai Fafo ma le aufaifaatoaga, a o le tasi foi lea o vaega e tatau ona ave i ai le fesoasoani ma le lagolago ina ia maua ai nisi avanoa o tupe maua ma le maua ai o avanoa faigaluega.

Lau Afioga i le Fofoga Fetalai, o le isi vaega i mea o lo o fia faaleleia i lo matou Itumalo, lea ua uma ona tolaulauina e lou uso a sui usufono ae na o se faaopopo atu i ai. E faamalulu atu ai i le Minisita o Galuega, Felauaiga ma Atinae Eseepe pe a talosaga soo atu ona o le faaleoina atu o manaoga o le Itumalo. Lau Afioga e i ai nai auala i uta i Vaoala o gauta atu o le Falesa Mamona e i ai le isi auala i le itu taumatau i le alu agai i tua i le auala galue, ua fai lava sina faaletonu ma ua le mafai foi e nai aiga o lo o faaogaina lea auala ona o le leaga tele o le auala. O lo o lelei le auala i le falesa Mamona a o le Bank Street i lalo mai o le falesa Mamona o lo o lelei le ta ae alu atu gata peitai o lo o i ai nai isi aiga i tua e lei oo i ai le ta.

O le isi vaega o le auala lea e i ai matou i le cross island road e vaiti lava le isi vaega o le auala e mafai ona savavali ai tagata. Ou te iloa o se galuega e

fai sina taugata ae faataatia atu pea i lau Afioga, o lo o lelei ae a e tagai i le auala lea sa fai e le Kamupani a Rudi Otts i le vaega o lo o i ai le Hai Komisi a Niu Sila, o lo o ua mafai ona faaaoga se vaega o lena auala e savavali ai a o le taimi muamua sa le mafai ona savavali ai ni tagata. O lalo mai o le auala lena i le itu taumatau faafesagai ma le Hai Komisi a Niu Sila, e i ai foi le isi auala i ina ua faaletonu ma ua leva e le i toe faaleleia ae toatele foi aiga o lo o latou faaaogaina.

Lau Afioga i le Minisita o le isi tulaga o le taulaga e pei o Fugalei ma le vaega o lo o i ai le maketi. O le tele o taimi a timuga ua lolovai, po o le tetele foi lava o timuga ae lolovai lava, ua lelei le pito i uta o Taufusi a ua faaletonu le itu lea. O le isi popolega o i latou i le faa-itu lena e tele tupe ma e mafai ona tanu le eleele ina ia faamaualuga ma fai ai o latou fale a ua mauualo ai fanua o nai isi aiga e le gafatia lea tulaga ma ua lolovaia ai nai nei aiga.

O le isi talosaga o le taligalu o Moataa ma Vaiala. O le taligalu o Vaiala ua tele le aafia ona ua aia mai e le sami laau nei e i luga o le matafaga. O le talosaga lau Afioga pe mafai ona vave atu i ai le silasila mo le faia o lea taligalu. O le taligalu lea lau Afioga e le gata o polokalame masani a le Malo i le puipuia o le taligalu, a o le tele foi o le aoga o lea vaega i Vaiala ona o le toatele o le mamalu o le atunuu e malolo ma tafafao i ai. A asiasi i ai lau Afioga i aoauli o le toatele o tagata faigaluega a le Malo e malolo ai i ina ma toe foi ai i galuega.

Lau Afioga i le Minisita mo Punaoa Faalenatura ma le Siosiomaga, ou te faaluaina le talosaga a lou uso a sui usufono i le auala e alu agi i luga i le Tusitala. O le tele o tagata asiasi maimoa mai fafo latou te faaaogaina a o le toatele foi o tagata o le tatou Atunuu e faaaogaina mo lo latou soifua maloloina ona e le gata o le Mataaga tautaua i totonu o le tatou Atunuu ae mo le saogalemu. E moni lava e toatele tagata asiasi maimoa mai fafo ae tatau ona saogalemu ai tagata uma, e le faapea e ave le faamuamua ona o tagata asiasi maimoa mai fafo a o le faataua foi ona o nai o tatou tagata. O le talosaga lea i lau Afioga.

Lau Afioga i le Fofoga Fetalai, faafetai tele lava mo le avanoa. Ia manuia le Fono.

FOFOGA FETALAI: Malo faafetai saunoa i se tasi o sui usufono mo Vaimauga Sisifo, Tofa Lefau Harry Schuster. Ou te manatu ua faafofoga le Maota e ala i le saunoga soosoo tauau ma se tasi foi o sui usufono mo Vaimauga Sisifo, Tofa Lenatai Victor Fafoi Tamapua.

O le a tatou see I Salafai, o lea ua tulai mai le sui usufono mo Vaisigano Nu. 2.

Tofa MOTUOPUAA UIFAGASA AISOLI VAAI (Vaisigano Nu. 2): Faafetai i lau Afioga i le Fofoga Fetalai mo le avanoa. Ou te fia faatalofa atu foi i le paia o le Maota i lenei afiafi, Afio lau Afioga i le Fofoga Fetalai faapea lau Afioga i le Palemia ma lena itu o le Malo. Afio foi le Afioga i le Taitai o le Itu Agai faapea foi lenei Itu.

Le Ofisa o le Failautusi ma le Sui Failautusi faapea le mamalu o le afaigaluega tainane foi le alaalatai mai o Ofisa Sili o Pulega a le Malo ma Faalapotopotoga Tumaoti ua tatou faatasi i lenei afiafi.

Ae tainane le faafofogaaga a Samoa i le Afio o Lana Afioga Mamalu O le Ao o le Malo ma le Masiofo, Sui o le Fono a Sui Tofia ma le Masiofo ma le mamalu tele o le Atunuu o lo o faalogologo mai i lenei afiafi i la tatou Fonotaga.

Na ona ou faapai malu atu i le paia o lou Itumalo, Afio o Aiga ma Sataua ma lau Fetalaiga Lealuga, tainane foi le Afio o Tuiutu ma Faitau, Ufagalilo ma Luapitofanua faapea lau Afioga Tagaloa o le Alii o le Nuu ma le mamalu tele ia te oe Fagasa.

E puupuu lava se manatu i lenei afiafi. Sa tau tuutuu atu lava le lauga se i po ona e silafia foi e faale-o-lagona mai a matou lauga ona e tau le oo atu le leitio ia matou i le ao, o le mea lea sa tau tuutuu mai ai i le afiafi ona fai atu ai lea o se manatu. Lou Itumalo, o se manatu vaivai lea e uiga i le Tulafono Tau Faaofi o le Faatatauina o Tupe Faaopopo (Nu. 2) 2013/2014 ma le Tulafono Tau Faaofi o le Faatatauina o Tupe 2014/2015. O lau tilotilo i le Tulafono Tau Faaofi o le Faatatauina o Tupe Faaopopo (Nu. 2) 2013/2014 ma le Tulafono Tau Faaofi o le Faatatauina o Tupe 2014/2015 I lenei afiafi, pei ua laitiiti mai i lo le tausaga ua tea. Na o sina aotelega lava o le manatu o lau tilotilo faasolo atoa po o le aotelega, ou te iloa e mafua nei mea ona ua laitiiti la tatou tupe maua po o tupe e maua mai i galuega po o le activities. O lau tilotilo foi i le tele o Matagaluega e pei ua expand le....

FOFOGA FETALAI: Malie le sui usufono o lo o saunoa se I tuu atu le avanoa I le faauilavea a le Afioga I le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai le mafuaaga taua lava ona ua me i ifo i lalo le tatou Tala o le Tupe ona sa fefete i le tausaga lea na tea nei ona o lea sa faaauau mai vaegatupe foi nei o fesoasoani e toe faaleleia ai mea ia sa faaleaga e le afa o Evan. O lea ua tele ina maea galuega faatino o le mafuaaga lena, o lona uiga ua – e i ai foi le aoga o faalavelave faapenei e tele ai le fesoasoani mai fafo e agai tonu lava i le faaleleia o mea nei pei o le fausia o auala o le sui usufono mo Siumu. O auala tetele na sa tele ai lava le seleni na alu ai, o le mafuaaga lena, lea sa alu atu lava i le tatou Lauga.

FOFOGA FETALAI: Malo, tulai mai le sui usufono e faaauau le saunoaga.

Tofa MOTUOPUAA UIFAGASA AISOLI VAAI: Faafetai. Lau Afioga i le Fofoga Fetalai, o sou manatu ona a tilotilo i se isi itu pei ua expand le bureaucracy ua tele tele government employees ae le o lava le faasoa a le Malo, po o le mea foi ua expand le bureaucracy ae laitiiti le production at the same time. E le o au o se Economist, ae pei o lau tilotilo lena i le Tulafono Tau Faaofi o le Faatatauina o Tupe 2014/2015 e pei ona i luma nei o le Laulau a Fono.

FOFOGA FETALAI: Tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, leai e le o se mea tau mate lea na ou tulai atu ai. A silasila i le Tulafono Tau Faaofi o le Faatatauina o Tupe

2014/2015 I le itula muamua faa-Roma e lua vaega taua na e i le itu i luga o Tupe maua. O a tatou ala tupe masani e \$544miliona i le tausaga faale-Tupe lea ua i ai ae sa \$540miliona i le tausaga talu ai. O lona uiga o lea lava e sii a tatou tupe ia e maua mai i totonu. Ae a silasila i tupe ia faameaalofa mai fafo ona o mea ia sa ou taua, sa \$244miliona i le tausaga talu ai, a o lea la ua pau mai lalo i le \$178miliona. O lona uiga, e \$66miliona le eseese, a o le mafuaaga lena ua pau ai, ona o lea ua faamaea galuega ia na faatino i fesoasoani mai fafo e faalelei ai mea ia na faaleaga e pei o auala lea sa ou taua.

FOFOGA FETALAI: Malo faafetai. Tulai mai le sui usufono e faaauau le saunoaga.

Tofa MOTUOPUAA UIFAGASA AISOLI VAAI: Faafetai i lau Afioga i le Fofoga Fetalai. Ia, o le a gata ai i ina lena mataupu, ae se i ou oo tasi atu lava i Matagaluega taitasi lau Afioga i le Minisita mo Leoleo ma Falepuipui, o lena ua i ai le Taitai fou e vaai le tatou falepuipui. Na ona fia iloa lava, na ona fia fesili atu lava, o le a se tulaga ua i ai le Komesina o Leoleo po ua i ai se faaiuga a lau Afioga foi ma le Malo, ona atonu foi o lo o faatalitali le Matagaluega po o ai se isi o le a taitaia pe toe tofia le sa i ai pe o le a tofia le o lo o Sui Komesina nei, po o ai foi nisi o faamoemoe i ai. E pei o le soso atu lea i lau Afioga.

Ou te manatua le Paeaiga talu ai sa i ai foi le faamoemoe o le a fausia se toese fou i Tafagata. Po o le a se tulaga ua oo i ai fuafuaga a le Malo i lena itu. Lau Afioga i le Minisita mo Galuega, faafetai o lea ua faafofoga le Maota i lau saunoaga analeila, faafetai ua afea lenei itumalo. Na pau lava le mea ia e manatua lelei pei ona saunoa se tasi o sui usufono, o oe e te lufilufia mea faapenei. O oe o le tautai matapala e te lufilufi mea lelei. Ia manatua lelei e lau Afioga, o lena ua oo atu le tusi i lau Afioga aua auala o si o matou itumalo i Fagasa, faapea ma Sataua.

Ia, o le talosaga mai lava i le 1992, o lena lava e talosaga atu lava. Ia aveane laia i ai lau faamuamua i si o matou itumalo ua leva ona augani atu faamolemole lau Afioga.

Ona oo atu lea i le Afioga i le Minisita mo le Soifua Maloloina. Faafetai i lau Afioga o lea ua manino mai o le a fausia le falemai fou o le Itu Asau, lea ua i ai le faamoemoe o le a fausia i luga atu i lafanua o si o matou nuu, o le ogatotonu tonu o le itumalo. O lea e faafetai atu ai i lau Afioga. Na pau lava le mea lau Afioga i le Minisita mo le Soifua Maloloina, i lou popolega i le faafomai, o lea e taoto i le Maota nei le Tulafono foi lea o le Health Promotion Bill. Na pau lava le mea na ou fautua atu, o lenei mea o le Health Promotion Bill, pau le mea toe tilotilo i ai lau Afioga faapea le Malo. Ia silasila foi, o lenei lava mea o le Health Promotion ua leva ona fai mai, sa i ai foi le Health Promotion sa i ai, ae silasila foi, ua oo lava i tamaiti 19 tausaga ua matua toto maualuga, 20, 21 ua oo i ai le toto maualuga. I lau la tilotilo i ai, ua mafua nei mea, aua e lua lava e mafua ai nei mea o le toto maualuga ma le suka ma mai uma nei, o le leai o se faamalositino, lack of exercise toe easy access to fatty foods. E lua lava mea na, na pau lava lena. A mafai la ona tineia nei mea e lua, e le o le exercise foi lea o le siva. O le exercise o lou alu e fai lou maumaga. Aua a vaai i tagata i aso ia sa tino lelei lava e le lapopoa ma puputa. A o le mea lea e i ai nei, e le o le o e sisiva ma o i gymnasium po

o le savali foi. O le mea lena e tau o le exercise. A ou tilotilo nei i tagata i le mea lea o le suka ma le toto maualuga ma le diabetics, ma le hypertension lea e i ai nei, oka, o lau mate e oo atu i le isi sefulu tausaga ua maua se 400 o tagata ua oo atu i le faamamatoto.

O lea lau Afioga i le Minisita, se i toe silasila totoa ane lava i lau Matagaluega. Ou te iloa foi o le Health Promotion Bill lea e le i faia i lou vaitaimi, o se mea na oo atu i ai ua uma ona fai mai.

FOFOGA FETALAI: Ia, malie le sui usufono o saunoa se i avatu le avanoa i le faauilavea a le sui usufono mamalu. Tulai mai se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow.

Afioga Hon Gatoloaifaana Amataga Alesana Gidlow: Lau Afioga i le Fofoga Fetalai, leai e leai se agaga e faalavelave i le saunoaga a le sui usufono mamalu. Na pau lava o lea o le Afioga i le sui usufono mamalu o lo o i ai i le Komiti o lo o iloiloaina le Tulafono lea. E manaia lava ae faaali lona finagalo i le matou Komiti. Na pau lea lau Afioga i le Fofoga Fetalai.

Tofa MOTUOPUAA UIFAGASA AISOLI VAAI: Lau Afioga i le Fofoga Fetalai, o le faalavelave e le o i ai le Minisita nei i le matou Komiti e faaali i ai lou manatu, ae o le mea sili lea ua faafogafoga mai le Afioga i le Minisita i se fautuaga foi, afai e paopapa foi i le matou Taitaifono ma lena Itu, e leai, o le taumafaiga lava ina ia maua e le tatou atunuu se lelei ma se soifua maloloina lelei. I lou lava lea manatu, ia alofagia, o le sau i luga o le toto maualuga ma le suka, ia tailo. Ou te matea e oo atu i le isi 10 i le 20 tausaga ua ova atu i le \$200miliona le Paketi a le Health pe afai o le tulaga lea o le a oo i ai. Ia na o se fautuaga lava e tuu atu i ou tafatafa....

FOFOGA FETALAI: Malie le sui usufono se i avatu le avanoa leaga o lea ua e taua le Matagaluega.

Afioga Hon Tuitama Talalelei Tuitama: Lau Afioga i le Fofoga Fetalai, ona o lea ua lagalaga le Maota ona o le tulaga i le Health Promotion Bill, e i ai le lagona e sau taeao ona talanoaina lea o le Health Promotion Bill i lona ia lava taimi, ae ona o lea ua afea mai i lauga faalauaitele, e manatu foi na ona avatu lava o sina faamatalaga laitiiti i lou uso a foma. O le agaga tonu lava lea o lea e taulai i ai faamoemoega o le Health Promotion Bill, ia faaitiitia ai le Tsunami lea o NCDs po o non-communicable diseases lea e i ai le premature death, lea ua tele ina maliliu ai le tatou atunuu ma obesity, o se global affliction le obesity i le taimi lenei, e le na o tatou, o le lalolagi atoa. E agai la i tulaga ia ina ia faaitiitia ai le aafia o tatou tagata mai mea tonu lava ia. E pei o le agaga foi lea ma le talitonuga o le World Health Assembly lea o lo o aumai ai fautuaga mo tulaga o le faatupulaia o le soifua maloloina i le lalolagi, e ave ma taiala e mulimulitai i ai fuafuaga o soifua maloloina o atunuu taitasi o lo o i lalo o lea Faalapotopotoga, o lea lava la e mulimulitai i ai ma solisoli muliaao i ai le tatou Soifua Maloloina foi i Samoa nei. Ia ona o lea e le i ata mai e le i amatalia, peseai o lea faatoa oo mai le Tulafono i totonu o le Maota, o lea foi ua uma ona talanoaina i le faitauga lona lua. Ou te

manatu e toe maua foi le avanoa pe a toe oo mai le talanoaina o le Health Promotion Bill i totonu o le Maota.

A o se tali puupuu atu, o le agaga tonu lava lea o le Health Promotion Bill, to promote health. O lona uiga, ia aua ne i mamai, ia faatupulaia auala e taofiofia ai le tatou atunuu mai le aafia i faamai ia lea ua i ai nei. Ma o le focus tonu lava lea lea e focus agai i le faaiuga na fai e o tatou taitai i le 1995 i le motu o Fiti e tau o Yanudra, ma o lea la e tau o le Yanudra Island declaration po o le healthy islands e Minisita o le Soifua Maloloina o le Pasefika, lea sa fai ai le latou fonotaga muamua lea. O lona faasefulu o fonotaga lea na fai mai iinei i Samoa i le tausaga ua mavae, o lea sa tatou talimalo ai, ma o le focus lava lea sa uunai i le fonotaga lena, o le mea lava lena o le Health Promotion. O lo o tauave pea lava la le talaiga lea a le World Health Organisation, ina ia faamalosi atunuu ia faavae tulaga e puipuia ai ma taofiofia ai le faatupulaia o faamai nei lea ua tau nei e tatou o faamai oti, tatou te le o toe taua o ni faamai le pipisi, ona e aveese ai le taua o le agaga o lea e tau momoli atu i le atunuu e faatauaina ai le aafia aemaise o le tinoputa, toto maualuga, suka ma le mai fatu, faatasi ai ma factors lea ua fai ai nei tatou tulafono, o le tapaa, lea ua pasia le Tulafono o le Tapaa. O lea ua uma foi ona tapena regulations lea o le a amata ona faamamalu tulafono e faaitiitia ai le ulaula tapaa, e faapena ma le alcohol ma tatou meaai lea e i ai i le taimi nei ina ia faaitiitia ai le tino puta, lea sa galulue ai le tatou Palemene, avea ai le SPAGHL e fai ma sui o le tatou Palemene e talaiina le feau lea, galulue faatasi ma le Education Department i aoga i tua e taofia le toe faatauina o fagu suamalie ma meaai lololo i totonu o canteens a aoga ae encourage pe uunaia le faaaogaina o le vai manino ma le vai mama, faapea foi ma fruits e fai ai a latou lunch ae aua le toe faaaogaina meaai ia e masani ona faia e matua. O lea foi la e agai i totonu o aiga pei foi o le Fono talu ai lea sa aumai e se tasi sui usufono, ma o le agaga foi lena o lea e taumafai atu na ia taulamua i matua o lo o tapenaina meatausami a le fanau ona tilotilo i ai i le tulaga lea, aua e amata atu i totonu o aiga le faaitiitia o le tulaga lea ma le ausia o le faamoemoe lea, o totonu lava o aiga. Afai e faamasani le fanau e inu vai, aua le inu mea suamalie, ia faaaoga le niu pe a ua manao i se mea suamalie, ae faapena foi le faaitiitia o aisakulimi, o keke, o tuisi, o a uma na mea, lea e masani ona faapele ai tamaiti, o lole, o sukalati, ae taumafai e ave i ai nai meaai masani, o moli, o apu pe afai e maua le apu. Ae o lea e tele mea o tatou local fruits e mafai ona faasoa atu i le fanau ma faamasani i ai a o laiti, a oo ina tutupu ae ma avea ma tagata matutua, o le a avea foi latou ma taiala i o latou aiga ma faaauau ai pea le tradition lea e taumafai e amatalia nei i le taimi nei i tupulaga talavou, ona mafai lea ona ausia tulaga nei e tulimatai nei, e faaitiitia ai le maliu, aua e tusa ma le 60% o tagata maliliu i le taimi lena, e mafua mai ona o faamai ia le pipisi po o faamai o le tino puta, mai fatu, toto maualuga, suka ma le cancer. E pei o sina faapupulaga lea i le tulaga o le Health Promotion, o lea la ua commit ai le tatou Malo, ma o lea ua aumai ai le Tulafono ina ia mafai ai ona faatino lea faamoemoe, ae se i tatou tilotilo i ai, e le o ni mea e tamau e faavavau, o tatou e faia Tulafono. A ave ave foi tatou te vaai atu e leai se aoga o lea Tulafono, ia o lea e ia i tatou le pule e soloia ai, ae liliu i se isi tulaga e sili atu ona lelei. E laitiiti lava le seleni faaopoopo i le faatinoina o lea faamoemoe pe a oo ina faatino, aua o lo o i ai lava tagata faigaluega i le taimi lena, e le toatele ni tagata e faaopoopo ane mo le faatinoina o lea faamoemoe a o le a tele ai tupe alu. O le tala moni

ma le faamoemoe e tele atu le tupe faasao pe afai e taunuu lea faamoemoe ma faaitiitia ai lea faamai atoa ai foi ma pili o tagata i le falemai aua o le a le toe o soo i le falemai. E faaitiitia ai tupe alu mo pasese e tau savali ai e fai tui, faatau fualaau ma tulaga uma faapena. O le aotelega o nei mea uma pe a tuufaatasi e tele ma anoanoai le seleni e mafai ona faasaoina i lo le seleni ua faamoemoe e faaalua mo le faatinoina o lea auunaga.

FOFOGA FETALAI: Malo faafetai, ou te manatu ua malamalama le finagalo na saunoa i ai le sui usufono. Tulai mai le sui usufono mo Vaisigano Nu. 2.

Tofa MOTUOPUAA UIFAGASA AISOLI VAAI: Faafetai lava mo le avanoa o lenei ua atoa le 20 minute o lauga le Afioga i le Minisita a o le mea lea e taumafai atu ai – se i oo atu i le Health Promotion Bill ona ou talanoa lea i ai, aua o le health promotion a sau a le mai ou te talanoa i ai, aua e te ai masima, o le mea lena e tau o le health promotion.

Lau Afioga i le Fofoga Fetalai, o lea e fai atu lau tala ona ua pei ua focus tele i mea ia o Communicable Diseases e i ai le suka ma le toto maualuga. Ae silasila foi o lea ua amata ona ae mai isi faamai nei. E faapefea la le prevention? O lea ua aliali mai le lepela, TB, cough ma le malnutrition, e toafa tamaiti ua maliliu i le malnutrition i le tausaga leni. Ua concentrate la i isi mea ae faapefea la le prevention? E ui o lea lau Afioga o le a faaauau pea lau lauga.

Lau Afioga i le Minisita mo Aoga, Taaloga ma Aganuu, e pei ona ou talanoa atu i le isi foi Fonotaga, o le Aoga faa-Itumalo i Asau. Ua talanoa mai nisi o lou Itumalo ua tataua ona toe faafoi atu le Aoga i le mea e centre i ai le Itumalo po o le mea sa i ai muamua, a le o Fagasa o Sataua. Ona ua toatele tamaiti mai Falelima ma Neiafu, ua le o toe aoga ona ua mamao tele, a o le Aoga a le Itumalo sa i totonu o lo matou Itumalo e omai i ai – tusa ua omai Afega o agai Falefa ma aoga ai a o lea ua tuu Apia sa tataua ona aoga ai. Lau Afioga i le Minisita o Aoga, Taaloga ma Aganuu, o le a tuu atu i ou tafatafa ina ia alofagia le talosaga atu a lenei Itumalo se i e toe silasila i ai, pe mafai foi ona e afio atu se i e talatalanoa i toeaiaina o lo matou Itumalo ona o le faaaitaui ua tulai mai.

O le isi mea mulimuli lea lau Afioga ou te le iloa po o ai e talafeagai ma – ua ta le lava fai mai o ta ita o le Vaisigano Nu. 2 po o Gagaemauga Nu. 3. O mea ia sa faanumera e Papalagi ina ua omai e fai a tatou Faiga Palota. O le a le mea e le toe foi ai e pei o Lefaga ma Faleaseela. Ou te fia taua foi lou Itumalo o Fagasa ma Sataua, i lo le Vaisigano Nu. 2, ua pei o ta ita e numera lua i se isi ae le numera muamua foi ta ita ia. E pei o le talatalanoa atu lea lau Afioga i le Fofoga Fetalai ma le Maota i lenei aso.

Ia tau ina ia manuia le usugafono a Samoa i lenei afiafi. Manuia tele lau Afioga faapea le mamalu tele o le Palemene.

FOFOGA FETALAI: Malo faafetai saunoa i le sui usufono mo Vaisigano, o le a le taua la le numera ae tau na o le suafa o le Itumalo. Ou te manatu o lo o faafogafoga ma le manino le Komiti o Faiga Palota ma ua ou **note** ina i lalo o le tasi lea mataupu o le a faatalanoaina e ala i le fesuaiga o igoa o Itumalo, o le a talanoaina e le Komiti pe a faapea e fonoa.

O le a soo fau pea ma le isi sui usufono mo Vaisigano Nu. 1.

Afioga TUFUGA GAFOALEATA FAITUA (Vaisigano Nu. 1): Faafetai i lau Afioga i le Fofoga Fetalai mo le avanoa. A o le i faia se manatu e muamua ona ou afea le tapuaiga a Lana Afioga Mamalu O le Ao o le Malo ma le Masiofo, Sui o le Fono a Sui Tofia ma le Masiofo. Lau Afioga i le Palemia ma le Kapeneta faapea foi lau Afioga i le Fofoga Fetalai ma Minisita Lagolago. Le Taitai o le Itu Agai ma le Sui Taitai ma ana Minisita ua faaupuina e tutu mai i le paolo.

Afioga Hon Palusalua Faapo II: Lau Afioga i le Fofoga Fetalai o le mea e fia faasao.

FOFOGA FETALAI: O le a le mea e fia faasao lau Afioga i le Taitai o le Itu Agai?

Afioga Hon Palusalua Faapo II: Leai, leaga e tausisi i le mamalu o sui usufono o lenei Itu, aua le lafoa upu e pei e foliga e faaulaula. I, aua e te faaulaula i le mamalu o le Maota lenei.

FOFOGA FETALAI: Ia vaatele i lou finagalo, o le saunoaga lava a le sui usufono, e leai se afaina o le tutu i le paolo. O lea lava tatou te – o le mea aupito sili lena ona maluapapa ai le tagata...

Afioga Hon Palusalua Faapo II: Lau Afioga, aua le tausolomua i lau Afioga, aua le tau solomua i le mamalu o le Maota, o le mea lea e ala ai ona sese saunoaga faapea ona o lau Afioga.

FOFOGA FETALAI: O lea o le a tau agai mai ia te au, a fai atu o lou alofa ia te oe o lea e faataga le le faatulafonoina o lau tutu i le paolo a e oso mai ia te au. Aua e te agai mai i le lima o lea e fagafaga ia te oe.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga, pei e mafua nei mea uma ona o le laga fua o lea mea o le shadow Cabinet aua ou te le iloa po o le a se isi faaupuga? Kapeneta tu i le paolo. E i ai se isi faa-Samoa? O la ua faa-Samoa tonu mai lava i le tulaga faa-Peretania ae po o le a foi le mea na laga ai ia mea. O le Afioga lava i le Taitai o le Itu Agai na lagaina lea mea, o lea la ua faa-Samoa tonu atu a o lea ua toatamai.

Afioga Hon Palusalua Faapo II: Lau Afioga i le Fofoga Fetalai, o le Afioga i le Palemia lea na ia faa-Samoa, a o le Kapeneta faa-olioli, o le sao lena o le faa-Samoa. Kapeneta faa-olioli, o lau Afioga lea e te nofo ma mimilo...

FOFOGA FETALAI: O le a le faa-Peretania le Taitai o le Itu Agai o le Kapenta faa-Olioli?

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le faa-Peretania tonu lea e mafua mai ai le upu aua o le shadow o le sao lena o le faa-Samoa. O le sui usufono mo Vaisigano Nu. 1, o

se isi lea tamalii o le Aganuu, o la la e sau sao lava i le faaupuga a o le faaupuga lava a lau Afioga.

FOFOGA FETALAI: Se i avatu le avanoa i le Minisita mo Faatoaga ma le Faleoloa o Faatoaga.

Afioga Hon Le Mamea Ropati (Minisita mo Faatoaga, Faigafaiva ma le Faleoloa o Faatoaga): Lau Afioga I le Fofoga Fetalai, o au foi sa ou nofo i le Nofoa le la e saofai mai ai le Taitai o le Itu Agai i le taimi sa ou Taitai ai, o le matou Vaega sa fai mai. Se se i faia se tatou Shadow Cabinet, a ou taofiofi mamau lava ona o mea faapea lea ua tupu mai i le asō, o le a fai ma mea e ula mai ai isi ia matou.

O le tulaga lena ona ua toe lagā ae manaia ae toe sui ane se isi igoa ma le ula o le vaega lea i le tatou igoa lena na fuafua i na aso. O lau fesoasoani atu lea i le mataupu.

Afioga Hon Palusalua Faapo II: Lau Afioga i le Fofoga Fetalai, leitioa a faaletonu le Itu Agai i la aso ioe, o le faa-Temokarasi lena, Shadow Cabinet, Kapeneta faa-Olioli, e le o toe umi. O le mea lea lau Afioga i le Minisita o Faatoaga ma le Faleoloa o Faatoaga, taatia ia na aso a o le tausī mamalu o lea ua aloaia Minisita Agai e agaia a outou Afioga. O le a le aoga o a outou Afioga ae leai nisi e Agaia outou? O le mea lena e taumafai atu ai. Aua o Minisita Lagolago a faa-Peretaniai...., ia faa-Peretania ane ia e outou. A faa-Peretania o le Associate Ministers ae a faa-Samoa o Minisita Faalagolago.

FOFOGA FETALAI: Tulai mai le sui usufono mo Vaisigano Nu, 1, o lena e sagatonu lau faauigaina o le upu, Minisita tutu i le paolo.

Afioga Hon TUFUGA GAFOALEATA FAITUA: Masalo po o le Minisita tutu i le paolo faa-olioli mo lea fia sefulu tausaga o lumanai nei.

Lau Afioga i le Faamasino Sili, Afioga i Tamaitai ma Alii o le Faamasinoga, masalo o le tafatolu lea o le Faigamalo faapea foi Ofisa Sili o Pulega o Matagaluga a le Malo ma Faalapotopotoga Tumaoti.

E le faagaloina foi le tapuaiga a lou Itumalo i le Afio o Aiga ma Tapaau ia i laua Taulauniu Gale ma Tui Asau, Aiga Sa Oloapu faapea foi oe Safune. E faapea foi le Afio o Tapu ma le Toalima faapea foi Safune. O Aiga e tolu o Sa Lilomaiava, Samoeleoi ma Aigaomavaega. Susu lava Tufuga ma lo latou Aiga, Afio foi Masoe ma lo latou Aiga, Falefa o le Usoalii ma Tootoo o le Maopu, Tupua Taisi Tamasese. Le Salafai na Faiga, Falefia ma le Siuafanua, le Fofoga ia te Oe Fao faapea ma le Fofoga Mu'a, tulouna oe le Pule.

Ona ou manatu lea lau Afioga i le Fofoga Fetalai ua talaseu lava lenei ituaso i le tulaga afi faapea foi ina tagi alisi ma fana afi i faga malama i le lagia ai o Finao ma le tuua ai o le Malo e le Afioga e le sui usufono mo Gagaiformauga Nu. 1 po o le usugafono a le Fetalaiga ia Tuiloa Anetelea. O le lagia lava lea o Finao, ou te talitonu o le lagia foi lea o Matia Matia Ituau e faigata lo ma va nonofo ai i lea itu o le Motu i le Afio ai o Sao e Fa, Susu mai Aiga o Saumalau, maliu mai Pouniu ma Faasau, maliu mai foi le Tofa i le Tulafale ae tainane Oe Lavea o le Alii o le Itu.

Lau Afioga I le Fofoga Fetalai, a o lei fai atu sa matou faamatalaga i le Tulafono Tau Faaofi o le Faatatauina o Tupe 2014/2015, e muamua pea ona

avatu manaoga a nai nuu nei o lou Itumalo ina ia fai pea i ai fuafuaga a le Afioga i le Palemia ma lana Kapeneta.

O le nuu lenei o Vaisala ua i ai auala galue ua uma ona faataina i Paeaiga ua tuanai ae ua toe tatalo mai i ni ofe paipa mo le auala galue i le agai i gauta e pei ona faatulai i Paeaiga ua tuanai. E le gata i ofe paipa a o ni moli e agai i poumoli ia ua i ai ma isi foi moli e fia faaalu tele agai i uta. Ia, e fia i ai foi le talosaga i se taligalu ae ou te talitonu o lo o faamuamua pea lenei Tala o le Tupe ona o le usugafono a le SIDS, aemaise foi o taaloga a le Taupulega a le Autalavou.

O le nuu o Auala lau Afioga i le Fofoga Fetalai ua talosaga mai i le auala galue ua leva ona faataina, ae o le taimi lenei ua matua malepe lava, e pei sa pa ai se pomu atomika tulou le Maota e toe fia faaleleia. Ia, ma le auala agai i le faleaoga, e le mamao lava masalo pe na o se sefulu mita e tuufaatasi ai talosaga ia a si o matou nuu lea o auala. Ia, a taunuu mai loa i Asau, o lo o tagitagi pea lava i le auala galue i Matia. O le auala galue sa fai i le Paeaiga ua tuanai. O se auala galue se i fai i le taimi nei ua ou faipule ai ma le faaaloalo. E faapea foi se ofe paipa i le auala galue lea e tau o Ogaala ma le faalauteleina o le aualatele a le Malo i le ui agai i tai i Utuloa ma ni poumoli. O isi manaoga lau Afioga, i le fanua o le Malo lea e i ai nei le Pulega o Tinei Mu, o le Matagaluega o Faatoaga ma le Pulega o le Suavai, ou te tatalo atu i le Malo pe a fa aua o fanua ia o fanua a le Malo, pe a fa ae fai lea mea ma se hub o lea itu o le motu, e tai pei foi o le mea lea e fai i Tuasivi, ua atoatoa uma i ai Matagaluega a le Malo, ona tasi lea i ai o le agai i ai o le itumalo, aua e leai se mea e lavelave ai i le soona o solo, pei se one stop shop lau Afioga i le Fofoga Fetalai.

Ua taua foi e le sui usufono mo Vaisigano Nu.2, e moni a ia i le falemai, ae leaga sa malaga mai sui o le itumalo e sau mai Falelima e tau i Asau e tatalo mai i le Afioga i le Palemia, e tuu mai faatasi i le fanua lea o le Malo. E le faapea la o se manatu o se itumalo se toatasi o le Itu Asau, ae ua i ai uma sui o nuu o le itumalo i le manaoga. Ia manatua lau Afioga i le Fofoga Fetalai, o le key o le mea lenei o le marketing o le manaomia o le need.

Tofa Motuopuaa Uifagasa Aisoli Vaai: Lau Afioga i le Fofoga Fetalai....

FOFOGA FETALAI: Ia, malie le sui usufono o saunoa se i avatu le avanoa i le faaulavea a lou uso a itumalo. Tulai mai le sui usufono mo Vaisigano Nu.2.

Tofa Motuopuaa Uifagasa Aisoli Vaai: Faafetai i lau Afioga i le Fofoga Fetalai. Sa ou le fia faalavelave lava i le saunoaga a le sui usufono mamalu. Ia silasila foi, o le mea muamua, e ese Tuasivi ese Asau. O Asau e tu i le faa... A e vaai foi i le matou itumalo, na ona uma lava o le nuu mulimuli togavao atu loa, uma le isi nuu mulimuli o le togavao atoa. O le Tuasivi ia e tasi lava mai le... O le matou itumalo pei ona ou fai atu, e centre tonu lava, ia tuuaia ia le... a o le va o Asau ma Aopo ia e fia maila, ae o lea o le a omai i ai Falelima... Ou te le iloa po o ai la matai ia na omai, ae o le tele foi o matai na omai fai mai, e alofa e tuu i totonu o le tou nuu e centre mai i ai, e tusa lava ua ave Motootua tuu i Falefa, ona omai lea o Afega o atu i o ae tuu nei i Apia. E faapena uma lava le scenario lena i o i le matou itumalo, o la e tou te malamalama uma. Ua ou le iloa la po o ai matai na omai, po o se latou lava

keni. O le itumalo lenei, ua uma ona faasoo mai e matai taua o le itu atu o le matou nuu e tau i o ma matai Vaisala, tuu i totonu o Sataua e lelei e latalata uma atu i ai le itumalo. Ia, o lau soso atu lena lau Afioga i le Fofoga Fetalai.

FOFOGA FETALAI: Malie le sui usufono mo Vaisigano Nu.1 se i alaala mai i lalo. E fautuaina pea le lua va nonofo ai i le Fale Vaisigano, leaga o lea e maua mai o lo o lua mau eseese i le fetuunaiga o mea a le itumalo, ae naunau foi leaga o lea e tapuai mai le atunuu aemaise le faafofoga mai a le Fale Vaisigano. E i ai se taimi ma se fuafuaga i se taimi o lumanai ona soalaupule ai lea faa-itumalo ona matagofie ai lea, ae le matagofie le felauai i luma i i nei meaane ua faaluafesasi le polokalame a le Malo a o lea e faataatia, e le o se poloketi po o ni atinae e manuia ai se toatasi. O le agaga o le Malo ina ia faia atinae ina ia manuia ai itumalo uma o lo o lalata ane ma nonofo i le vai itumalo o lo o faatino ai atinae a le Malo. Ae tulai mai le sui usufono mo Vaisigano Nu.1 e faaauau mai le saunoaga.

Afioga TUFUGA GAFOALEATA FAITUA: Lau Afioga i le Fofoga Fetalai, ua uma ona fai i ai le finagalo o le Afioga i le Minisita, a o le tuualalo pea pe le tefa le tauala i le Afioga i lea tulaga.

O le faleaoga lau Afioga, aua o lea ua uma ona ou tatalo mai i le Afioga i le Minisita mo Faamasinoga mo se fale faamasino mo lea itu, ua uma foi la ona ou tatalo ia tuufaatasi pea i le tulaga lea. Ae tuualalo atu pea, afai e tefa le tauala i le Afioga i le Palemia ma le Kapeneta, malo faafetai. O le faleaoga lea ua i ai, o le a leai sau tala e fai atu. Sa ou tatalo atu i le amataga lava o le nofoaga lenei i se fesoasoani tau tupe i le faaleleia o le faleaoga ua tele tamaiti. O le tali na aumai, ua uma ona pasia le tupe e fai le faleaoga i le Alataua. O le mea la lena ua ou le toe taua ai lea tulaga, ae sa ou mafaufau foi ou te agai i le fesoasoani lea a Saina e fai mai ai se fesoasoani, a o lea ua tulai mai pei ona saunoa le sui usufono mo Palauli ua faagata e le Malo lea fesoasoani a ua ave le fesoasoani lea mo nisi atinae lelei a le Malo.

Lau Afioga i le Fofoga Fetalai, o le a ou tautala loa i le Tala o le Tupe pei ona i ai le mataupu o lo o i lumamea i lenei itula o le afiafi. Lau Afioga i le Fofoga Fetalai, a silasila i ai i le keke lea e taumafai e faasoa aua o tupe nei o tupe fuafua. Le \$792+miliona e tusa ma le 69 pasene le tupe o lo o taumafai le Malo e maua mai i totonu lava o si o tatou atunuu. O se tulaga matautia lea ua mafai ona ausia e tatou, toetiiti lava atoa le keke ona fai lava e tatou la tatou lava faasoa, ae peitai, e leai ni tatou mea se tele, masalo e tai pei foi o le tala a tamaiti lea se i tulou, masalo lava o le faiai ma le atigipoo lea e faaoga aua le atinae a le Malo ma le atunuu e taumafai ai nei tupe maua.

O le tupe faameaalofa mai fafo, faafetai, e 22% e maua mai ai. O le tupe lea e tau o le tupe e mama tului, na o le 9%. A fuafua i ai, o le matua tele lava o tupe ia e ao i totonu o le tatou atunuu e faatino ai le tupe lea e taumafai le Malo e faasoasoa aua atinae ma le lumanai o le tatou atunuu mo lenei 12 masina o le a tatou savalia. O le tatalo a lenei itumalo i le Matagaluega o Tupe Maua ae tainane Matagaluega tumaoti, ia galulue faatasi aua le aoina ma le galulue o a ni tupe faasili, ia tuu mai i totonu aua le tauatiaeina o le tatou atunuu ma taumafai ia aua nei faalagolago i tupe mai fafo. A faalagolago foi i se tupe mai fafo lau Afioga i le Fofoga Fetalai, e matua ioeina lava e lenei itumalo, aua e le mafai ona faia se atinae tele sona tau e taumafai tupe maua nei e faatino ai. E pei lava i totonu o tatou aiga, o se

atinae tele e lelei mo le lumanai o le aiga, a le aitalafu e leai. A aitalafu foi e maua ai se pisinisi e toe maua ai se isi tupe e toe totogi ai, ua lelei. Ou te manatu o le manatu lea o le Malo o lea e i ai, pe aitalafu ona o mea lelei e maua ai se tupe e auala ai le lumanai o Samoa, e matua selau pasene pe luaselau pasene le lagolagoina o lenei Tala o le Tupe.

Lau Afioga i le Fofoga Fetalai, ou te avatu le faafetai. O le aotelega o le faafetai ona o lea ua siitia le tamaoaiga o tatou nei, a ua leva ona taumafai mai tatou tuua i Paeaiga e fia ua mavae atu, o lea ua tatou aea. Faafetai i le Palemia ma le Kapeneta ma lenei faaeaea, ae tainane o Matagaluega taitasi i le tuufaatasi o le auunaga, lea ua tatou maua ai lenei faaeaea, faapea foi le Afioga i le Minisita mo Faatoaga ma le pine auro lea ua na mauaina, ua latou ausia se tasi o millennium goal ua tuu mai tatou te ausia. Ia, o se faamatalaga lea a lenei usugafono lau Afioga i le Fofoga Fetalai, ia manuia lau Afioga aua le taumafaiga o le Fono ma tagata ulavavale o le usugafono. Ia manuia le mamalu o le Malo, le tapuaiga mamala a le atunuu, Minisita o le Kapeneta faapea foi Ofisa Sili o Pulega ma Faalapotopotoga Tumaoti. Faafetai.

FOFOGA FETALAI: Malo faafetai saunoa i lau Afioga i le sui usufono mo Vaisigano Nu.1. Malo saunoa, faafetai timai, faafetai fautua i le tatou Malo ma le saunoaga manino e ala i le tatou Tala o le Tupe.

Ia, o lo o maua pea tatou avanoa, e maua tatou sui e lua pe tolu i le taimi lea e totoe. Tuu atu le avanoa i le Maota i se sui usufono e fia saunoa.

Ia, tulai mai le sui usufono mo Aleipata Itupa i Luga, ua avanoa le Maota mo lau saunoaga.

Tofa FAGAAIVALU KENRICK SAMU (Aleipata Itupa i Luga): Faafetai atu i lau Afioga i le Fofoga Fetalai e tusa ai foi ma le avanoa se i taumafai atu ai foi se sao puupuu o lenei itumalo o Aleipata Itupa i Luga aua foi le Tala Faatatau Autu o le Tupe 2014/2015.

E muamua lava ona ou faatulou i le Maota nei i Tiafau o le malae o le faautugatagi a le atunuu i le afio o lau Afioga i le Palemia aemaise foi o le vasega o Minisita faapea foi le mamalu i Minisita Lagolago.

E faatulou atu foi i lea Itu o le Malu i le afio o lau Afioga i le Taitai o le Itu Agai, aemaise foi o Minisita Agai, aua le Fonotaga i lenei afiafi.

Ou te faatulou atu foi i Ofisa Sili o Pulega ma Pule Sili o Matagaluega ma Faalapotopotoga a le tatou Malo i tupu ma tamalii. E le faagaloina la outou fatuaiga tausī, aua o outou o lo o vae ma lima i ai le Palemia ma le Kapeneta aua le atiaaina o le tatou atunuu aua se manuia mo le lumanai.

E avea foi lenei avanoa ou te faatalofa atu ai i si ou itumalo pele o Aleipata Itupa i Luga mai Ulutaotogia ma Vailoa, aemaise o si ou nuu faapelepele o Lalomanu, i le afio o lau Afioga i le Tuiatua Faanofonofu lau Tofa i le Matua Fuataga, afio foi le paia i le Falefia o Alii, afio Amituanai o le Maopu o le Tuiaana, Susu i laua Suafa, lo outou Toafa o Tootoo, le Igoamatua ma le mamalu ia te Oe Saleaamua. E le gata i lea, e le faagaloina faletua ma tausī, saoa ma le aumaga faapea foi le malosi o le nuu aemaise foi o alo ma fanau. Ae le gata i lea o si o matou nuu i Vailoa, i le afio o Alaalamalae, afio Alosina, afio o Saumalu ma le falelima o Alii ma le mamalu ia Tualemoso ma Saleaalii ma upu ia te Oe Saleaamua.

E le gata i lea o lou nuu i Ulutogia, afio mai oe Le Ie le tama a le malo o le Sagapolutele, susu mai le matua o Falanaipupu, ia susu le Taofia le Tai, ia

susu mai le Usoalii, maliu mai le nofo Alataua ia te oe Saoluafata. E le faagaloina foi le tapuaiga mamalu i le susuga i le Toeaina Faatonu ia Isaia Tiatia, faafetai mo le tapuaiga ma le tatalo mai isi ou nei tagata faatauvaa, ia o lo o faapena ona fai ma fofoga o lo ta itumalo i tonu o upufai a le atunuu. E le gata i lea o Auauna paia a le Atua o lo o faapena ona faafalelemalu i totonu o lenei itumalo, aua lava se tatou vatapuia ma lo tatou Atua aua ni o tatou manuia mai le lagi.

Lau Afioga i le Fofoga Fetalai o le Tala o le Tupe e lagolagoina tele e lenei itumalo, e momoli atu ai le faafetai ma le faamalo i lau Afioga i le Palemia ia po o lau Afioga foi o le Minisita o Tupe e tusa ai foi o lenei Tala o le Tupe, aemaise foi o Minisita ia ma Faauluuluga uma lava o Matagaluga o lo o aafia i le Tala o le Tupe lenei aua e talitonu, o atinae lava a lo tatou atunuu aua se manuia i le alu i luma. Lau Afioga i le Fofoga Fetalai o le a taumafai e faamanatu nai talosaga a lenei itumalo, ou te talitonu foi ia o talosaga lava ua leva ona taatia atu i le aiga Kapeneta, ae e talitonu e ao lava ona faaleo aua o la e faafogafoga mai foi le itumalo i le tulaga o i ai ia talosaga nei. O le a muamua lava se tala e agai i le Minisita o Tupe po o lau Afioga foi i le Palemia, atonu o lena ua i lau Afioga le talosaga a lenei nuu o Lalomanu e ala lava i eleele o le Malo o lo o i totonu o lo matou nuu nei. E leai se agaga i lenei afioaga po o lenei nuu o lenei itumalo, e toe finauina ia eleele nei ma e lagolagoina foi e le itumalo ia atinae o lo o faapena ona fuafua atu e le Malo aua lava se manuia o ona tagata. O le tatalo a lou tagata faatauvaa i lau Afioga e fai ma fofoga o lo matou nuu ma le itumalo, e a pe a faafesui ai eleele nei, o la e tele eleele o lo matou nuu i Lalomanu e maouta e le o nofoia e nisi, a o le eleele o le Malo o lo o i ai i le taimi nei, ua tele ina nofoia e lo matou nuu i Lalomanu, ona sa leai se manatu i ia aso e nai tuua ua lagomau mai i tiasa, o ni fanua nei a le Malo, peitai ane, ua manino le mata o le vai, o eleele o le Malo. E matou te le toe tau finauina ia vaega, a o le tatalo ma le agaga faaloalo, se i e silasila totoa lau Afioga. Atonu foi o le atinae o lo o taumafai atu i tua ia matou, o se atinae taua tele, ae na ona tatalo atu i lau Afioga ia pe mafai ona faafesui ai e fua se 60 eka a lo matou nuu i Lalomanu i le pito i uta, e faaoga i nei.....

FOFOGA FETALAI: Malie le sui usufono o lo o saunoa, se i tuu atu le avanoa i le saunoaga a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, toetiiti lava uma ona faatino le atinae o le tatou eletise foi lea e sau i le matagi o la ua fai ai i luga o le fanua, a o lea toetiiti uma a o lea faatoa e talosaga, o le a faapefea la ona fai? Ae o lea sa ou alu atu ou vaavaai i ai i le galuega o lo o fai, ia o la ua fai tonu lava e manuia ai foi lo outou nuu i galuega e o ane e vaavaai le tatou atinae. Ia ae taatia maia lau mataupu leaga ua pei lava ua tautuauega, ae taatia maia lau mataupu se i toe vaavaai i ai, a o le manaia o lau mataupu pe ana e aumai i le la tausaga ae le i faia le atinae. Sa agai i ai le asiasiga ma manatu e aveese mai le atinae mai i ina ae sifi mai i i le isi mea lea e avanoa semanu o i ina tonu lava e ono faatino ai lou faamoemoe. A o lea la ua aumai le faamatalaga a i latou e i ai le tomai i le mea e feagiai ai le matagi, fai mai o i tonu lava i le fanua o le Malo lea e matua malosai ai le matagi ma tele le eletise a tatou e

maua mai ai, a o le faamoemoe lena. Ae o le a taatia maia lau mataupu ua tautuauega, se i toe tilotilo i ai.

FOFOGA FETALAI: Malo faafetai. Ia tulai mai le sui usufono mamalu, e manatu ua manino le talosaga lea na e tuuina mai i le Malo, taatia mai. Tulai mai le sui usufono e faaauau le saunoaga.

Tofa FAGAAIVALU KENRICK SAMU: Faafetai atu i lau Afioga i le Palemia. E pei o le agaga lava ia o le talosaga o le amataga mai o le fanua, aua pei o tai e amata atu ai le fanua, ia ua nofoia i le taimi nei ma ua...a o tulaga lava i le atinae, ou te manatu ua...ia e moni a au, e moni lava ua...leaga e le i logoina mai lava e le Matagaluega, ia a mea ua agai atu aua le faamoemoe, pei o le ala foi lea o le tuai ona oo atu i lau Afioga, a o le talosaga lena o lea ua faaleo atu.

O le mataupu lona lua, e faaleoina foi le faafetai a lenei itumalo i le tatou Faalapotopotoga o Fale le Housing Corporation ma le Development Bank ma le NPF aua foi le latou tautuaina o le tatou atunuu, e pau lava lau tatalo i lau Afioga ma le Ofisa Sili o le NPF, ia pe le ono toe taumafai atu e sii nai nisi tupe o penisione a nai tagata matutua, ia ae momoli tele atu le faafetai tele.

Ona ou oo mai lea i le Minisita mo Galuega, Felauaiga ma Atinae Eseeese. E talitonu o lau Afioga ua fai sina tele ma anoanoai o talosaga, ae e muamua ona momoli atu le faafetai tele lava i lau Afioga i le Minisita aemaise o le Malo, e tusa ai foi ma le tatou auala o lea ua taoto i le mata-Aleipata, e momoli atu ai le agaga faafetai, aua e talitonu ia e le o se galuega laitiiti le galuega lea, o se galuega e tele se seleni ua faapena ona faaalu ai, ae amuia foi i matou nei i lo matou itumalo, ia ua mafai ona oo atu i ai le faasoa, e ui lava ina utiuti, ae talitonu o lea ua tau foi ia le talosaga a lenei foi itumalo e tusa ai foi ma le auala lea, e le gata i lea o lea o le a taumafai lava e tau faamei ia tagata o lenei itumalo i uta i le maupuepue aua lava ia le faaeteetega mai lava i mala faalenatura.

O le auala lea i Tiavea i le auala laupapa pei ona motusia foi i tafega, ia ona fai ai lea o le auala le tumau lea e i ai i le taimi lenei, e tatalo atu i lau Afioga ia e fai lava sina le saogalemu o le auala le tumau lea ua faatino ai, ae tatalo atu ma le faaaloalo, ia po o le a se taimi ma se aso e faatino ai le galuega lea e taua tele le auala lea i Tiavea ona o le atinae o tagata asiasi maimoa mai fafo i tua, ua fai lava sina saosasoa o le atinae. Ae lagona lava le faaeteete ona e le o saogalemu le auala, o so o se taimi lava e timu ai ma tafe tafega, e vaaia ai lava le amata ona solo le auala ma tafea ese ia le palapala o lo o tanu ai le auala i so o se taimi lava e timu ai, ae taatia atu i lau Afioga. Ma le talosaga o matou taligalu o i i le alu lea i tai i Tapaga, ia o Tapaga foi o lena e i ai ia nisi Talatuu o le atunuu i ina i le motu lea e i tai, pei e tatalo atu e na ona taatia atu lava i lau Afioga.

Faafetai foi i le tatou Pulega o le Suavai, o le tele foi o taimi e faaletonu le vai ma logo mai la outou Pulega, faafetai tele lava mo galuega aua le tau faaolaina o le vai, pau o lea, se i silasila ane i nai aiga ia i uta i le maupuepue, aua e talitonu lava e le iloa se taimi e oo i ai le vai, afai ua tuai ia se pamuvai lelei, ia tautuana le tatou loli vai e faapena lava ona faasopolia i aso uma aua o le tele lava o lenei itumalo, ua agai uma i uta. E momoli atu ai foi le faafetai i le Ofisa Sili ma le Pulega aua lava ia le tautuaina o lo matou itumalo e ala lava i le taumafaiga o le suavai.

O le EPC o nai moli auala, e tatalo atu lava i lau Afioga i le Minisita ma le Ofisa Sili, ia se i silasila ane o le tele o moli ua pepe, ia se i alofa leaga e fai sina vavamamao o aiga e ono lamatia ai foi le soifua ma le ola e le gata i taavale, ae ia alofagia se i faaola atu a matou moli. E faamauina foi le faafetai i le atinae lea o le tatou paoa e alu i le savili, faafetai tele lava mo le faaavanoaina o lenei nuu ma lenei itumalo aua le tatou atinae lea, atonu o se atinae taua tele aua lava le agai i luma o le tatou atunuu.

Ona ou oo mai lea i lau Afioga i le Minisita mo Leoleo, e muamua lava ona faafetaia Komesina lagolago aemaise foi o le auunaga ma le mamalu o le Matagaluega eseese i le auunaga, faafetai lava i le tele...e ui lava ina tele faafitauli, a o faafitauli lava e afua mai ai nisi o mea lelei aua le tautuaina o le tatou atunuu. Pau o lea se i silasila ane i le talosaga lava i le fia faaleleia o le fale o lo o nonofo ai nai leoleo i tua aua lava le...o le fale lea e i ai nei o le fale tuai o fomai, ia ona toe faaleleia lea o la e nonofo ai lava latou, a oo la i faaiuga o tausaga foi lea e fai a latou tiute masani, ia ua le lava lea mo latou, ae tatalo atu ma le faaaloalo i le tulaga lea mo se fale mo matou leoleo. E le gata i lea lau Afioga i le Minisita mo Leoleo o le mataupu foi lea a lo matou itumalo i le Aleipata ma le Safata Marine Protection Area, ia o lea lava na talu ai ona o le naunautiga lava a lou nei sui a usufono, ia o se atinae taua tele mo lea tafa o le atunuu. E tatalo atu po o le a se tulaga o i ai i le naunauga i ai i le saililiga ina ia tau saili ai le amiotonu ae se i toe taumafai e aumai nai ia faamanuiga e manuia ai lenei itumalo.

Lau Afioga i le Minisita mo Aoga, Taaloga ma Aganuu, faafetai tele lava aemaise le Ofisa Sili i tulaga ua i ai suiga ma tulaga foi i le faatinoga o aoaoga a le fanau, ia na o le silasila ane i le matou kolisi i Aleipata o la ua kolisi le matou aoga ae faale o tele ni faiaoga, ia ae tatalo atu lava ma le agaga faaaloalo, ina se i faasafua atu ina ia faapena ona maua ai foi e alo ma fanau a lo matou itumalo ia tomai ma agavaa, aua lava le taumafaiga o aoga. E le gata i lea o le faafesili i lau Afioga, le tulaga foi lele o le aumaia o meaaoga o oka a fanau mai fafo, po o le mea o tumau pea le aumai e le tatou Matagaluega, ia pe le mafai ona faamatuu atu i tau e tuu ofo ia mo latou e mafai ona latou auina maia ia tulaga ia i meaaoga a le fanau ma le tele o nisi faafitauli e tulai mai i totonu o le Matagaluega.

Lau Afioga i le Minisita mo Fesootaiga ma Faamatalaga Tekonolosi, ia e momoli tele atu le faafetai tele lava a lenei itumalo i lau Afioga, e a pe a ma le sefulu tausaga e le o toe ola ia le TV1 talu ai le tatou fono talu ai lea pei sa tau vavao ai i le TV i lenei itumalo, ae faafetai tele lava, o la ua ola le TV e pau lava sina faafitauli la e maua ai, o le fai ma pe soo, pei e foliga mai a lotu lava le TV1 ia e tape ona ua fai sina taugata, ia ua tape lava, ae faafetai tele lava o la ua faasopolia lenei itumalo i le tulaga o i ai ia le TV.

Lau Afioga i le Minisita mo Faamasinoga ma Pulega Tau Faamasinoga, e faafetaia foi e lenei itumalo ia galuega a le Matagaluega, e le gata i faatumutumuga seia oo lava i le lautele o le aufaigaluega, ua i ai foi fesuaiga, ua i ai i totonu o Matagaluega. Na pau o lea o le tatalo a lenei itumalo, o mea nei o poloaiga le tumau, po o le a se tulaga, po o le a se malosiaga. A o le tulaga lena o lea e i ai, e pei a avatu lava le poloaiga le tumau, e tumau lava le le usitaia. A o le tatalo a lenei itumalo, pe le tataua ona tuu i leoleo e o latou aua e pei e foliga mai a ave i Sui Tamaitai o le Nu'u po o le Pulenuu po o matai foi o le nuu, e maumau lava le taimi se i tulou le Maota. E uma lava ona tuu le tusi ia o le poloaiga le tumau toe foi mai le tagata ae faaauu lava

le galuega, ona fai lea o le faamasinoga, malo ai ita lea e avatua le poloaiga le tumau. Ae a fai atu e aveese ua le mafai ona aveese fai mai ua taugata tele mea ua faaalu. Ia o le tatalo lea ma le agaga faaaloalo lava.

Avea ia lenei avanoa e momoli atu ai le agaga faafetai i lau Afioga i le Minisita mo Faalapotopotoga Tumaoti a le Malo, Afioga Hon Lautafi Fio Selafi Purcell, o lea sa tatou nonofo atu iinei vaeatu lau Afioga, ae faafetai o lena ua e tu i matagiolo. A o le tatalo a lenei itumalo, faafetai. So o se tofi lava o se tofi mai le Atua. Afai e tofi e le Atua le tagata, a o le Atua foi na te toe aveese le tagata pe a le faamaoni i ona tofiga. O le tatalo lea a lenei itumalo, faafetai, malo le taumafai. Ia manatua mai i matou nei ae le faapea ua e nofo mai le nofoa o Tavita ona e tau le talatalanoa mai lea ia i matou nei. A o si au mataupu lava i lau Afioga, se i silasila totoa lau Afioga i eleele o le tatou atunuu o loo i le SLC, o eleele o le tofi o Samoa mai le Atua. Se i e silasila totoa, ua tele foi tagata o lou itumalo e omai fai mai, o le a le tulaga o i ai a matou talosaga i nai o matou fasi fanua foi nei i Falelauniu ma Nuu, a o le tali lava, taatia mai. A o le tatalo a lenei usugafono, se i e silasila ane i o tatou eleele po o le a se tulaga o i ai, aemaise o le talosaga ua leva ona tuuina atu a lenei itumalo.

Ma le mulimuli, se i e silasila ane i le tatou loli vilivai, o la e maitauina i le taimi o tagapolo vaeatu le Maota, o la e tutu ai i uta. Pe le mafai ona aumai le tatou loli lea e toe fai, ina ia faapena ona faaaogaina i nisi o galuega totoe aua lava le atiaaina o si o tatou atunuu.

Ia ona ou muliai lea i lau Afioga i le Minisita mo Punaoa Faanatura ma le Siosiomaga, aemaise foi o... e momoli atu foi le faamalo a lou nei sui usufono ae le gata i lau Afioga a o le Ofisa Sili o Pulega mai le SROS ma le STEC aemaise foi o le Siosiomaga, faamalo galulue. Ua vaaia lava ma le totoa e le faigofie la outou galuega, ae talitonu tatou te faamoemoe lava i le Atua e ou le malosi ma le pototo e faapena ona tautua ai si o tatou atunuu. Na pau o lau talosaga i lau Afioga i le Minisita, o nai taligalu lena e i le vaega sa aafia i le Tsunami pe le alagatatau ona toe silasila ane i ai lau Afioga mo le lumanai.

E pei o nai manatu ia lau Afioga i le Fofoga Fetalai, ae aveia foi lenei avanoa e momoli atu ai le agaga faamalo o lenei itumalo i lau Afioga i le Fofoga Fetalai i lou faatonu folauina o le Sa o Samoa aua lava se manuia mo a taeao. Ia faamanuia foi le Atua i lau Afioga i le Failautusi o le Fono aemaise foi o le aufaigaluega a le Matagaluega o le Fono i la outou faatupu ma la outou faatamalii, e le gata i le va ma sui usufono o le Maota, ae o le tausiga foi o le mamalu o sui usufono i le Maota o Tofilau Eti Alesana. Ia, e le o ia i matou nei ni manuia, a o manuia o i le lagi ia faamaligi ifo, ina ia faapena ona tatou maua ai pea le malosi a ia sili le agaga o le Atua i o outou finagalo aua lava le tautuaina o si o tatou atunuu. O le a foi le lauga a Saleaamua ia manuia tele lenei afiafi. Soifua.

FOFOGA FETALAI: Malo faafetai saunoa i lau Afioga i le sui usufono mamalu mo Aleipata Itupa i Luga. Ou te lagona ua faafofoga ma le totoa le Maota aemaise foi o le faafofogaaga a le Kapeneta e ala foi i timaiga ma fautuaga ma manaoga o le itumalo. Malo faafetai fetalai. Ia, o lea lava e avanoa le tatou taimi, e maua le tatou minute i se sui usufono e fia saunoa. E manaia foi ae faauma i lenei po ae toe tamua taeao. E lua avanoa tutua. Ae

lafo atu pea i le tatou Maota o lea e lava le taimi pe i ai se sui usufono e faaiu ai lenei afiafi.

Ia, o lea ua tulai mai le sui usufono mo le Fale Tuamasaga. Tulai mai le sui usufono mo Sagaga le Falefa. Tulai maia e faaiu ia te oe saunoaga o lenei po ona toe amataina ai lea i le aso a taeao.

Tofa TUISA TASI PATEA (Sagaga le Falefa): Faafetai i lau Afioga i le Fofoga Fetalai. Ou te maitau atu o lele ua pau le tauafiafi, ua goto foi le la i lona nofoaga mau, e faapena foi se lagona i lenei itula i le pau o le Maota, i le paia o le malae o le faatugatootoo, o le malae o le faautugatagi o le Maota Fono o Samoa. Lau Afioga i le Fofoga Fetalai, e maitau atu o lele ua taufai tumatie le paia o le aofia i lenei afiafi i le paia o le Maota. Ua nofoia la tiasa ma tialogo, lele foi ua maitau atu ua lupepe foi le taumanu ma ua ala foi le mafuaalii, ua to lava le fale o tautai. Ona faapea lea o sa matou faamatalaga, lau Afioga i le Fofoga Fetalai, lau Afioga i le Palemia ma le Aiga Kapeneta, lau Afioga i le Taitai o le Itu Agai aemaise foi Minisita faaolioli i lena Itu o le Maota ma sui usufono mamalu uma o le Maota Fono. O lea foi tatou te faatasi ma Ofisa Sili o Pulega o Matagaluega, o i latou o lo o faia le faiva o le tautuaina o le tatou Malo.

E le galo foi le tui mai o le mulipapaga i le tapuaiga a Samoa, i le afio o Lana Afioga Mamalu O Le Ao o le Malo, le Tama a Aiga Afioga Tui Atua Tupua Tamasese Efi ma le Masiofo, afio foi le Sui o le Fono a Sui Tofia le Afioga i le Tama a Aiga Tuiaana ma le Masiofo, afio le Faamasino Sili ma le Vasega o Faamasino. O Faalapotopotoga Tumaoti ma Faalapotopotoga uma o lo o faia le sao i le tamaoiga o le tatou atunuu, ae a Samoa o lo o taputapu mai i Maota ma laoa i lenei itula o le afiafi.

I Aiga ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Ia, e le faagaloina foi le tapuaiga a le Aiga Sa Levi i so o se fatafaitaulaga i faafeagaiga taulagi o lo o faafalelemalu ma faatunapaulia i so o se alaalfaga ma nuu o lo o nonomanu ma tatalo lelea aua se manuia o Samoa.

E le mafai foi ona faagaloina le tapuaiga a le Motu i Sasae, ia Sua ma Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manutele ma Tootoo o le Faleula. O paia lava na mai le Taisamasama seia paia le Taiulaula, i Fili ma Puletuu na tauilo ai Malo.

E le mafai foi ona faagaloina le tapuaiga a si ou itumalo pele o Sagaga le Falefa, i si ou nuu i Faleula, i le paia i Vaialofa ma Paepaetuitui e afifio ai le Toetaufanua a le Malietoa. Ia, aemaise foi o Utumoa e afifio ai le paia i le Maopu o le Tuiaana, ae a Faleula ma Fogaa e susu ai Alo o le Malietoa, ae alaatai ai oe Laupa o le Tagata Fou a le Malietoa, le Faletolu ma Tapunuu.

E faapena foi ona ou faatalofa i susuga i faafeagaiga o le tatou nuu i Faleula i Fogaa o lo o faia le tatalo aua le manuia o le tatou itumalo ma le nuu. E faapena foi ona ou faatalofa atu i si ou nuu i Saleimoa mai lava i Paepaemagigi seia paia Satomai, o Fuafua ma le Fagava e susu ai Alo o le Malietoa, Sapau ma Leiataatimu, afifio ai Sa Tilialo, i Falesoa e afifio ai le Aiga Sa Pula, o Toetaufanua, Usoalii ma le Nofo a Maopu e alaatai ai Lutua ma le Gautaala ma le Faletolu. I Avevai e afio le faasaosao o le Aiga Sa Tilialo, o Mataale e afifio ai Aloalii ma Usoalii taufeagai. O Niuvai e afifio ai Toetaufanua a le Malietoa ma le Aiga Sa Lutuanuu. O Lotosoa e afifio ai Alosina ma le la Tama, aemaise foi le Aiga Sa Tilialo. A o paia ia e

polapuipui ma tausi vaatele e oe le Aitu Tagata na faialaga i le Tuamasaga lau Fetalai Luatua, le Faletolu ma lou Gautaala, aemaise Siuolefanua.

O paia ia o si ou itumalo ou te faamemelo i ai, faamalo le tapuai faafetai le tui mai o le mulipapaga. Ia, e le galo foi ona ou faatalofa atu i nai au faifeau e tatalo i aso uma aua se manuia o le tatou nuu i lau Afioga Patele Lu Collins aemaise foi Tiakono, le Susuga ia Ioane Livi, aemaise foi o le Susuga ia Avea Vagana ma le tatou Ekalesia ma le anoanoai o susuga i faafeagaiga. A misi lau tau, e le misi outou i le silafaga a le Atua aua o lo outou faiva alofilima o le nonomanu aua le tatou nuu i Saleimoa.

Ia, ona faapea lea o sau faamatalaga, lau Afioga i le Fofoga Fetalai, e muamua atu se manatu o lenei usugafono i mea foi o lo o manaomia e lenei foi nuu po o lenei itumalo. E le tele lava ni galuega o lo o manaomia foi e si ou itumalo. Ou te talitonu lau Afioga i le Minisita mo Galuega, Felauaiga ma Atinae Eseeese, o le tele o taimi e savalia ai lou ofisa ma tuitui, e pei lava foi ona aumai i le tele o taimi, o le tuitui lava ma le faalavea i tua, o le mea lava lea o lo o faia, i le tele o pitonuu o lo o asiasi atu, e tusi atu foi i lau Afioga i le Minisita, se i e alofa ane toe tagai i ai.

Ou te amata atu i le matou auala i le mea o lo o afio ai le Maopu o le Tuiaana, ma o lo o afio ai foi le susuga i le faafeagaiga Assembly of God, e pei ona asia ai lau susuga ma le tusi foi na tauaaoina, e ese le manaomia o lea auala.

O le auala lea e agai i uta i Aelee, e talitonu o le auala e le se aualagalua ao le toatele o tagata lotu o lo o nonofo i le auala lea ua agai uma foi i uta tagata uma ona o le matau lava i le sunami, aemaise foi o lenei auala e alu atu lava tau i Aelee, ou te talitonu a mafai ona faaleleia atili le auala lea e tau i uta i Aelee ua faigofie lava feoaiga e agai ai i uta, ao le tele foi o tagata lotu ua nofoia uma nuu a uta. Ona ou oo atu lea o.....

FOFOGA FETALAI: Ua ou vaelupeina le saunoaga a le sui mamalu, e manatu tele atu, sa avatu lava le avanoa ona o lo o e agai pea i faalagilagiga o le tatou itumalo, e talitonu ona o lea ua tatou taunuu tonu i le tatou taimi malolo. E momoli atu le faafetai tele i lenei vaega o le afiafi i tualumaga o le tatou galuega i lenei aso, e manatu o lea ua atoa le sefulufa sui usufono ua tulei saunoa i lenei aso, ma o se laasaga sili lea ona lelei mo i tatou. A toe maua le isi luasefulu taeao, ia o le faanaunautaiga lena o le Fofoga Fetalai. Silafia foi o lea tatou te nonofo ae olo ona o nisi o fuafuaga ona o le valaau paia a le Atua i se tasi o tama matua o le tatou Palemene nei, ae i ai lava le talitonuga ma le faamoemoe o le tatou galulue faatasi e taunuu ai i se taunuuaga lelei ma vave ona faasolo le tatou galuega e pei ona talosaga atu i le taimi ua sola. Ae faafetai atu i sui mamalu uma sa tulei saunoa i lenei taeao ma lenei afiafi, e talitonu ua tele se tatou galuega ua ausia, faamalo atu le saunoa, malo le tapena faafetai foi mo timaiga uma o lea ua manatu ua faalogologo ma le totoa le tatou Malo. O a foi tiuga ma suaga o le vaatele i lenei aso, o lo o matua atu iina le tuu i lo tatou Maota, i lau Afioga i le Palemia aemaise foi pe a tau siisii le tai i lau Afioga i le Taitai o le Itu Agai. Lauamatootoo, e le ni upu e avane ai, pei oe e le o se tama matua ma lau taalo e fai ma e taalo pisipisi i isi taimi, ae mau le toovae ia te oe le aiga malosi, o le agaga lava ia e avatu pea le faaeaea, ao se tuleiga foi ma saunoaga a sui usufono ia vaatele i lou finagalo. Ao mea uma e manatu tele i le tatou va nonofo ai leaga o le Maota e tiu i ona faalagilagiga, ae teu fatu i ona

faaaloaloga. O lenei la afiafi e momoli atu le faafetai tele i le paia ma le mamalu o le Maota, malo le onosai mai faafetai atu foi i le paia ma le mamalu o tupu ma ee tamalii ma failauga faletua ma tausī saoa ma tamaitai i Ofisa Sili o Pulega ma Faalapotopotoga tu maoti, malo lo outou onosai i lenei aso. Faafetai atu Samoa i la outou tapuaiga i lenei afiafi, e talitonu ua tu lalata foi e faia faigamalologa ma tapuaiga ao lo o galulue pea lou Palemene aua le faatinoina o lona valaauina. Taitai lo tatou soifua manuia i le aso fou a taeao, tatou tatalo i le Atua faafetai ua iu ma le manuia lenei aso, tatou tatalo ia taitai lo outou soifua manuia i le aso fou a taeao. Ao lei faaiuina le tatou Fonotaga, ou te tatalo atu i lau Afioga i le sui Fofoga Fetalai, tulai maia e fai se tatou faamanuia e faamanuia ai lenei po ma talosia ai le aso a taeao.

Na motusia Felafolafoaiga ina ua tolopo Tualumaga a le Fono Aoao i le itula e 7:03 i le po seia aulia le itula e 9:00 i le taeao o le Aso Lulu, 18 Iuni 2014.